

येसुए ओसाचीराए यायेन

आव पोस्तोको लूकाए ओसरो ज़। गेप्रभु येसु स्वर्गत ओबाव सोनो छैव पुरूस उपरीव छीनी (ओसाचीर १:१-११; २:१-४१) ओपाँ प्राइंड ज़ ओकेसो आल ज़ रैःज्या। डादा नो पाँ यरूसलेमनी सुरू ताद, नकिन यहूदिया सोनो सामरिया जीदा ब थास्के (१:८; ८:१,४), ननी फरी छुत जातलावराए ल्योड ब केस्के (१०:१-११:१८)। हो बेलाक ज़ मन्दलीराए याखिरी पसिज्याव पावलए परमेस्वरलाई सरेस्द (६:१-१६) मन्दलीरास खैद (६:२६-३०) सोंखेप पो पोड बाद परमेस्वरए ओपाँ मिँरालाई सथैद मन्दलीर खदा याजैक्यो (१३:१-१४:२८; १५:३६-१८:२२; १८:२३-२१:१६)। छीनी भन पावल रोम सहर पै केस्द नलावरालाई मनी परमेस्वरए ओपाँ यासथैक्यो (२८:१६-३१)। है जैद येसुए ओसाचीर याकेसो भरिड छैव पुरूस ब यास यास बाद अचम्बलाव सरेसर सतैदचाद यापाँ साचो ज़ थःरैद ओरायो सरैःसिउ लिज्या।

१ १-२माननिय थियोफिलस ज्यू, डादाडाव डासरो पोस्तोकोल, येसु ओयेनत उथूसिउकिन स्वर्गत ओबाज्याव छचाम पैकाव ओयेनर ओपाँर प्राइँ ज़ सर्द नैद डाईए। हो छचाम ज़ ओराछाँतिउ ओसाचीरालाई छैव पुरूसए ओसक्तीनी 'आव आव दोच्यो' है दाद याख्यानैक्यो।

३होकिन डादा ज़ बनै दुखस उसिउ छीनी येसु सैसिद चालीस दिन भरी घरी पाला ज़ नोराए याडाक सरैःसिद, 'आव डा ज़' लिद ओसरेसर ब सतैद ओराएज्याव, परमेस्वरए ओराज्यालाव पाँर ब ओरासथैज्याव। ४तछा नोरास ज़्यान्याए जूनी दुप्सिद यालिज्याक, "जे यरूसलेम मारास्द डाबाबु परमेस्वरए

ओयाकालाई कींद नैचिके। डा जेलाई नो ओयाकाए जूनी डादाकिन ज़ है दाद डानैचिए। ५किताव यूहन्नाए जेलाई रील ओसछैंचिउ, हिताव ज़ जाँ छीनी छैंव पुरूसनी जेछैंरिज़्या,” है यादोक्यो।

येसु स्वर्गत ओबाव

६नोर तछा दुप्सिद यालिज़्याक उसिसराए येसुलाई, “प्रभु, सैं आव बेलाक ज़ इस्राएलीराए गेराज्या रोमीरानी सोवोल्द नयासिरिज़्याव रो?” है यादोक ते, ७येसुए, “बेला तोन्या, जुक तोन्या डाबाबु परमेस्वरए उकुइत लिज़्या, जे सैंन्या ओमेला माले। ८बुरू जे जेक्याँत छैंव पुरूस उहुक बनै घ्योःव सक्ती दैद यरूसलेमल, यहूदियाल, सामरियाल सोनो नामलाव काना कुनीड पै डासाचीर जेतारिज़्या,” है यादोक्यो।

९हाःत ज़ येसु नोराए याडाकिन ज़ याचिऊज़्याक ज़ नमदा छीसिद बादलए लुम्बैद मासरैःक्यो। १०नोराए नमदा लँ लँ याचिऊज़्याक होक ज़ उमँःजानी पालो क्वा क्वाइसिउनी नेब्लो याडाक च्याँःसिहुकिनी। ११नोनी, “अ गालीललाव मिँर, काराव नमदा भाल्सिद जेलिज़्याव? नो जेडाकिन बाव येसु किताव नमदा उछींसिज़्याव जेरैःव, हिताव ज़ फरी तछा भरिहुरिज़्या।”

यहूदाए ओपोल छुतलाई याजैव

१२हाःत ज़ येसुए उसिसर जैतून दाँदातिन भरिद नजिककाव यरूसलेम सहरदा बाकेर। नो दाँदातिन आधा घन्तावाकाव येम उलिज़्याव। १३सहरल केस्द नोर हाः बेलाकाव यालिज़्याव ओतर्ताव ताललाव कुन्तील बाकेर। नो कुन्तील पत्रुस, यूहन्ना, याकूब, अन्द्रियास, फिलिप, थोमा, बारथोलोमाइ, मत्ती, अल्फयसए ओज़ा याकूब, देसभक्ता सिमोन सोनो याकूबए ओज़ा यहूदास सिप ज़ यालिज़्याव। १४नोरास नल येसुए ओआमा मरियम, येसुए ओभाइर सोनो येसुसकाव मेंमार दिनकाव ज़ दुप्सिद प्राइँए तयुँ जैद पोखारिउ ज़ यानैज़्याव।

१५तछा यायुँ हुबोर तसय बीसा दुप्सिद यालिज़्याक पत्रुस नोराए याडाक च्याँःसिद अइ लिद पाँके, १६“अ डानैँ डामेँर, आदा थैचिके। येसुलाई सँपिज़्याव यहूदा इस्करियोतए उजूनी भाःकाव धर्म-सास्त्रलाव सर्सिउ पाँ भरी योःके। नो पाँ भरी छैंव पुरूसए डादा ज़ दाऊद राजाए ओयाःनी है लिद ले। १७नो मिँ डादा गेस ज़ ओल्यो। आव गेयेनत मनी नोए उजूँ ब ओल्यो ज़।”

१८नो मिं येसुलाई क्योःन्या घुस ज़्याद नो पैसाए ँः तोबो लँःक्यो। नो ँःल ज़ बाप तेद उभूँदीर पाःद च्याल्नी ब्याल ताद सिके। १९यरूसलेम सहर भरिल नो पाँ थास्द नो ँःए उमिन या याखामनी आखेल्लामा नैदिकेर। नोए ओअर्थ 'भीए ँः'।

२०पत्रुस फरी, "होए उजूँनी डानै डामेर, भजन पोस्तोकोल इताव सर्सिउ लिज़्या,

'नोए ओपो रितो ओताक,

नल बासिन्या सु ज़ तातारक।'

सोनो,

'ओदैव येन ब छुतए ओनैवक।'


२१-२२है जैद गेप्रभु येसुलाई रँःव, ड़ादाकिन गेस गेस बारिउ मिं नोए ओपोल तोबो जैव ताके — गे मिताव ज़ नो मनी येसु सिउनी सैसिद ओसोव साची याधुन्याकाव ओताक। नो मिं रील सछैँज़्याव यूहन्नाए ओपालाकिन येसु स्वर्गत ओबाज़्याव पै गेस गेस लिज़्याव मिं ज़ ताव परिके," है ओरादोक ते, २३नोराए तोबो योसेफ बारसाबास यादोज़्याव (नोलाई युस्तस मनी है यादोज़्याव), सोनो तोबो मतियास यादोज़्याव, नोनी नेब्लोए निमिन हाइद, २४-२५अइ लिद परमेस्वरलाई पोंखारिकेर, "अ प्रभु

प्राइँए युँलाव पाँ सैँज़्याव, यहूदाए ते गेसकाव ओयेनलाई रास्द सराप दैन्या ओपोल ज़ बाके। है जैद नोए ओरासो येनत आव नेब्लोनी काताकावलाई नैन्या नपैँज़्याव, गेलाई सतैँदचाव ताके।" २६नोनी निमिनत गोला याभाःक मतियासए उमिन परिके। है जैद नो एघार जनात चाःसिके।

छैँव पुरूस याक्याँत उहुव

२ पेन्तिकोस पर्व हुद उलिज़्याव। हो छचाम पोंखारिन्याए जूँनी येसुए उमिनतावर प्राइँ दुप्सिद यालिज़्याक, २उमँःजानी नमतिन बुर बुर फर्लेसिहुज़्याव बनै घ्योःव बतासए ओर्गा मिताव थास्द नो दुप्सिद यालिज़्याव फिमल ज़ तसी ताके। ३हाःत ज़ मेंःए मुल्का स्यासोर रँःहुद नो मुल्कार आदा होदा राःसिनाद प्राइँए याक्याँत ज़ तोबो तोबो चुसिके। ४नाःत ज़ नोर छैँव पुरूसए ब्याल्द नो पुरूसए ओरायो मिताव प्राइँ ज़ छुत छुत खामनी पाँकेर।

५नो बेलाक पर्वए जूँनी प्राइँ राज्यानिकाव यहूदीर यरूसलेमल हुद यालिज़्याव। नोर परमेस्वरलाई रँःद छेःज़्यावर याल्यो। ६नो घ्योःव गा थैद मिँर बनै माहोल्या प्राइँनी ज़ धोंःहुद



ओसाचीर २:५-११

पेन्तिकोसल पाई स्वामनी यापांव स्वामराए यापोर

नो फ़िमलाव दुप्सिउराए यापाँज़्याव
 सु सु याखामनी ज़ थैद अचम्ब
 ताकेर। ७ नोर बनै अचम्ब ताद,
 “आव पाँज़्यावर ते प्राइँ गालीललाव
 मिँर ची सानी। ८ कै जैद आवराए
 यापाँ सु सु गेखामनी गेथैज़्याव?
 ९ गे ख्वार पार्थीया, मादी सोनो
 एलामीनी हुवर गेलिज़्या। ख्वार फरी
 मेसोपोतामियालावर, यहूदियालावर,
 कापादोकियालावर, पोन्तसलावर,
 एसियालावर, १० फ़िगियालावर,
 पामफिलियालावर, इजिपलावर सोनो
 लिबिया देसलाव कुरेनी जीदाडावर
 गेलिज़्या। ख्वार फरी रोमनी हुवर
 ब लिज़्यार। ११ (नोर ख्वार यहूदी
 जातलावर लिज़्यार, ख्वार यहूदी
 धर्म मानिज़्याव छुत जातलावर ब
 लिज़्यार।) ख्वार फरी क्रेत तापु सोनो
 अरब देसनी हुवर गेलिज़्या। कै जैद
 परमेस्वरए ओसक्तीलाव ओदोव
 येनर सु सु गेखामनी ज़ यापाँज़्याव
 गेथैज़्याव?” है लिकेर। १२ है जैद नोर
 बनै अचम्ब ताद ‘आवए ओअर्थ काता
 ओताव?’ लिद या याल सुधिसिकेर।
 १३ ख्वाराए फरी ल०द, “आवर ते
 मँ:वर ची सा,” है ब लिकेर।

पत्रुसए माहोल्यारालाई है ओरादोव

१४ हा:त ज़ पत्रुस सोनो एघार जना
 येसुए उसिसर च्याँ:सिद पत्रुसए ओर्गा

बनै सघ्यो:द नो माहोल्यारालाई है
 यादोक्यो, “अ यहूदियालाव मिँर
 सोनो यरूसलेमल लिज़्यावर, आदा
 थैचिके। आव जेरँ:व भरी पलास्द
 डायाचिरिज़्या। १५ जे है जेलिज़्याव
 मिताव आवर मँ:वर मा:क। भर्जा ज़
 छकाल्न्याकाव नौ बजिद ले सानी।
 १६ आव जेरँ:ज़्याव भरी ते योएल
 अगमबक्ताए सर्द ओनैज़्याव पाँ ची।
 नोए ओसरो आव ज़,

१७ ‘परमेस्वरए है लिज़्या,

जुक खेम्न्या बेलाक
 डा मिँ भरिराए क्याँत
 डापुरूस थुद डाराएरिज़्या।

जे खेपा मेंमा जेज़ाराए
 डापुरूसनी पाँन्या लेर।

जेसकाव धापाज़ाकावराए
 दर्सनर रँ:न्या लेर।

जेसकाव सेरोराए मनी
 अचम्बलाव मँर मँन्या लेर।

१८ हो बेलाक डायेन दाज़्याव
 डाबाँदा डाबाँदानीराए
 याक्याँत

डापुरूस थुद डाराएक
 नोर डापुरूसनी
 पाँन्या लेर।

१९ रोताव नमत छे छे डम्सिउर

रँ:न्यार डाराजैरिज़्या,

उधूँलाव नामल मनी अचम्बलाव
 सरेसर डासतैरिज़्या —

भी स्यासोर, मेंःए मुल्कार,
 सुम्ला सुम्ला मिकुइर।
 २० परमेस्वर बनै जगै मगैवस
 उहुरिज्याव छचाम ओमाताद
 डादा निमीए ओभार ब
 चुम चुमो तारिज्या,
 स्यावै मनी भी स्यासो
 घ्याम घ्यामो तारिज्या।
 २१ हो बेलाक जोए परमेस्वरए उमिन
 हाइद ओललाई खिम्ज्याव,
 नो सजानी पुलुस्द बाँचिन्या ले।’
 २२ “जे इस्राएली डानै डामें भरिए,
 आव ब सैंच्यो। नासरतलाव येसुए
 परमेस्वरए ओसक्ती दैद जे जेखार्ल ज
 अचम्बलाव येनर सोनो सरेसर ओदोव
 जे जे जेरेंःके। नो ओदोव ओयेननी
 ज परमेस्वरए, ‘डा ज डापरींव’
 लिद जेलाई ज थःरैव परींचिक्यो।
 २३ जे ते भन नो मिंलाई परमेस्वरए
 डादाकिन ज गोइँद ओनैज्याव
 मितावनी ज नोलाई परमेस्वरए ओपाँ
 मासैज्यावराए कुइत सँपिद कुसत
 तङ्गैद सैःव जेरापरींके। २४ परमेस्वरए
 फरी नोलाई सिउनी सोचोइद सिउका
 सिउ तान्यानी उस्कैक्यो। है जैद
 नोलाई खादरल काताए ब मानैधुक्यो।
 २५ नोए उज्जनी दाऊद राजाए मनी डादा
 ज धर्मसास्त्रल अइ लिद सर्द नैव,

‘डाप्रभुलाई एकतार डास ज
 उलिज्याव डारेंःज्या।
 डावोर्दा च्याँःसिद धुरिद
 ओयाँज्यावए,
 काताए ब डायुंलाई
 काता माँःती माजैधुव।
 २६-२७ है जैद डायुँ बनै होलाँ ताद,
 डायःए ब रेंद डापाँज्या।
 ‘डापुरूसलाई सिउराए याल्योल
 ख्यानैदचान्या नमाले’ लिद,
 आव डाजिउत डायुँ हुबो ज
 लिज्या।
 डा, छैव नमींलाई खादरल
 चिउ यान्या नमाले।
 २८ अजम्बरी जुनील बान्या येम
 डालाई नपैनाके।
 है जैद नँ डालाई नँस ज नैद,
 डायुँ होलाँ जैदचान्या
 नले।’ ”
 २९ हाःत ज पत्रुसए फरी ब है
 यादोक्यो, “अ डानै डामें, साचो
 ज है डालिज्या — गेपुर्खा दाऊद ते
 डाड ज सिद गमल बाके। ओखादर
 आःपै गेस ज लिज्या। ३० खाली नो मिं
 अगमबक्ता ओतावए छींनी हुन्या पाँर
 ब सैंद ओनैज्याव। परमेस्वरए नोलाई
 डादा ज किज्या भाःद, ‘नँ नथोरानी
 ज डाराज्या चलैन्या मिं डाउथैरिज्या,’

है दाद ओनैऽयाव। ३१ है जैद दाऊदए छीनी तान्या पाँर उरँःव मिताव ज़ ताद ख्रीस सिउनी ओसैँसिरिऽयावए जूँनी ज़ ओपाँव। है जैद डादा है उलिऽयाव मिताव ज़ ख्रीस सिउराए ल्योल ब मारहिए, ओक्याँ ब खादरल माचिए। ३२ नोलाई ओल परमेस्वरए ज़ सोचोऽक्यो। नो पाँ रँऽयावर गे प्राईं गेलिऽया। ३३ ओबाबु परमेस्वरए येसुलाई मान याद ओवोर्दा चुसिउ परींद ओयाकालाव छैँव पुरूस एक्यो। येसुए नो पुरूसलाई ज़ आछिम गेक्याँत थुदचासिक्यो। नो जेरँऽयाव जेथैऽयाव भरी हो ज़। ३४-३५ स्वर्गत पुलुस्द परमेस्वरए ओल्योड बाव दाऊद माःक। नोए उजूँनी ब ओल दाऊदए अइ लिद पाँके,

‘परमेस्वरए डाप्रभुलाई,
‘नसुतरालाई नखँ धूँल
भाःद डामाईंवा पै,
डावोर्दा चुसिद लिन्के,
है दोक्यो।’

३६ है जैद जे इस्राएली जातलाव प्राईं मिँराए आव सैँच्यो, नो क़ुसत जेसैःव येसुलाई ओल परमेस्वरए ज़ अजम्बरी जुनी यान्या ख्रीस ब थःरैदचासिक्यो, नाम स़ोनो नमतावराए गेप्रभु ब जैदचासिक्यो।”

पत्रुसए ओपाँ थैवराए यायेन

३७ नो माहोल्याराए पत्रुसए ओपाँ थैद यारुँ माचाव दाद पत्रुस स़ोनो येसुए छुत ओसाचीरालाई, “ओहो! डादाज्यु भाइर, हिताव ताकिन ते गे कै लिन्या ओताव?” है यारादोक ते, ३८ पत्रुसए फरी, “जेपापलाई रास्द परमेस्वरस सखैँसिन्याए जूँनी जेयुँर तोद येसु ख्रीसए उमिनत रील सछैँसिचिके। हो ताकिन ची छैँव पुरूस परमेस्वरए ल्योनी बरदान मिताव दैन्या जेले। ३९ नो पुरूस दैन्या याका जेलाई, जेज़ारालाई स़ोनो तादा तादा लिऽयावर, जो जोलाई गेप्रभु परमेस्वरए ओल्योदा खुल्सिउर लिऽयार, होराए जूँनी ज़ लिऽया,” है यादोक्यो।

४० पत्रुसए कुधु पाँर सथैद, “आव जुकलाव पापी मिँराए ल्योनी पुलुस्द बाँचैँसिचिके,” लिद यासम्जैक्यो। ४१ हो छचाम पत्रुसए ओपाँ भैँःद परमेस्वरए उमिनत चाःसिहुवर सोंहजारा याल्यो। नोर प्राईं ज़ रील सछैँसिकेर।

येसुए ओपाँत हुवराए याचलन

४२ नोर हाःकिन येसुए ओसाचीरास प्राईं तोबो फ़िमलाव मिताव ताद,

नोराए यापाँ पैसिद, प्रभु-भोजल दुप्सिद पोखारिउ ज़ यानैज़्याव। ४३मिँ भरी प्राइँ छे·वर यालिज़्याव। येसुए ओसाचीराए अचम्बलाव येनर, अचम्बलाव सरेसर दाव ज़ यानैज़्याव। ४४येसुए ओपाँत हुव भरी ते प्राइँ तोबो फ़िमलाव मिताव ताद यासकाव लिज़्याव भरी दुप्द याखार्त ज़ जैद यानैज़्याव। ४५याधन सम्पतीर यो·द या या माथैव मायो·वल सघैसिउ ज़ यानैसिज़्याव। ४६दिनकाव ज़ ध्यान फ़िमल दुप्सिद ननी भाःसिद याबावत फ़िम फ़िमक यानैरास दैसिद या याल बनै खैद रेंद काँर ब सिप याज़्युज़्याव। ४७परमेस्वरए ल्योदा खुसी ताद परमेस्वरए उमिन ब सघ्योःद याएज़्याव। मिँराए ब नोरालाई चाव ज़ यारारँःज़्याव। है जैद यायुँ हुप्ज़्यावर परमेस्वरए दिनकाव ज़ याबगालल चा·द ओराएज़्याव।

येसुए उमिननी तोबो घ्याँस्या
सोजोकाव ओताव

३ तछा पोखारिन्या बेलाक तीन बजेवाक पत्रुस स़ोनो यूहन्नानी ध्यान फ़िमदा निबाज़्याव। २हो बेलाक तोबो जर्मननी ज़ घ्याँस्या ताव मिँलाई ओनैराए ध्यान फ़िमदा घुर्द यालाँज़्याव। नो मिँ दिनकाव ज़ ‘चाव’ यादोज़्याव ग्रामक चुसिद ध्यान

फ़िमल पसिज़्यावरास पैसा उन्निज़्याव। ३पत्रुस स़ोनो यूहन्नानी ध्यान फ़िमल निहुज़्याव रँःद नो मिँए नोनिस ब न्निक्यो। ४हाःत ज़ पत्रुसए, ओनै यूहन्नास, नोलाई चिऊद, “आदा भाल्सिन्के,” है ओदोक ते, ५नोए, ‘कातार याँनी सै’ लिद उयुँ नदा ज़ भाःक्यो। ६पत्रुसए फरी, “डास सुन चाँदी ते माले, खाली जो लिज़्या, हो ज़ डाईरिज़्या। नासरतलाव येसु ख्रीसए उमिननी च्याँःसिद बान्के,” है दाद, ७नोलाई वोर्फताव उकुइनी क्योःद ओसोचोइव प्राइँना ज़ उखँर पलास्सिद, ८नो फुतु ज़ो·द च्याँःसिद आदा होदा लिके। पत्रुस स़ोनो यूहन्नानिस ध्यान फ़िमल पसिद बनै ज़ो·द परमेस्वरए उमिन सघ्योःद ‘धन्या धन्या’ है ल्यो ज़ लिके। ९परमेस्वरए उमिन निताव सघ्योःद ओबारिज़्याव रँःद ध्यान फ़िमल लिज़्याव मिँ भरिए नोलाई सरेस्द, १०“ओहो! आव ते नो ‘चाव ग्रामक’ चुसिद निज़्याव घ्याँस्या ची सानी। कै जैद बाधुन्या ओताव?” लिद अचम्ब ताकेर।

पत्रुसए ध्यान फ़िमल है ओरादोव पाँ

११हाःत ज़ मिँ भरी बनै अचम्ब ताद नो ध्यान फ़िमलाव सोलोमन मैरा यादोज़्यावल पत्रुस स़ोनो यूहन्नानी निल्योक धोःहुकेर। हाःपै

नो गराँव घ्याँस्या ओरेंतए नोनिलाई लापद उनिनैज्याव। १२पत्रुसए मिँर याहुज्याव रँःद नोरालाई, “अ इस्राएली डादाज्यु भाइर, काराव आवलाई रँःद अचम्ब ताद जेलिज्याव? सैं गिनलाई, ‘नी निसक्ती नितपसनी ज़ सोजोकाव निजैव ताखेहो,’ है लिद जेचिऊसिज्याव रो? १३गेपुर्वा अब्राहाम, इसहाक सोनो याकूबराए यापरमेस्वर, ओल ज़ आज्याल ओज़ा येसुलाई ज़गै मगै जैक्यो। नो येसुलाई जे ते भन सँपिद सैःन्या जेथःरैके। पिलातसए नोलाई रासो ओपैँज्यावत ब जे भैँःद जेमाएके। १४है जैद ओखत माल्यो छैँव मिँलाई अनाकल ज़ भीःद भन होए ओपोल मिँ सैःज्यावलाई रासो परीँद, १५प्राइँए गेस० भाःदचाज्याव गेधर्मीलाई जेसैःके। नोलाई फरी परमेस्वरए सिउनी ओसोचोइव गे गेमीए ज़ गेरँःके। १६नो है डालिज्याव येसुए उमिननिकाव सक्तीए ज़ आव जेरँःज्याव जेसरेस्ज्याव मिँ सोजोकाव ताद ले। नो येसुए उमिनत गिनयुँ गिन्सुहुबोनी ज़ आल जेडाक ओक्यार्र हालाँ होलों गराँद ले।

१७“आव ब ड़ासैँज्या ड़ानैँ ड़ामेर, जेघेप्पाराए यादोव मिताव ज़ जे मनी

येसुए ओक्यार्रताव जेदोव भरी मासैँद ज़ जेदोके। १८हुनी ज़ अगमबक्तराए यायाःनी ड़ादा ज़ ‘ख्रीसए दुखर दैन्या ले’ लिद ओपाँव पाँर योःके। १९है जैद जेपापलाई क्याल्ल्याए जूँनी जेयुँर तोद परमेस्वरए ल्योदा सखैँसिचिके। हो ताकिन ची परमेस्वरए युँलाई होलाँ जैदचान्या असिकर जेक्यार्रत जैदचाद, २०जेजूँनी ड़ादाकिन ज़ खतैद नैद ओयाचिउ येसु ख्रीसलाई फरी तछा परीँदचान्या ले। २१खाली नोकिन ड़ादा आव नाम नमलाव परमेस्वरए ओयेन भरी दाद ओमातुपैवा पै येसु स्वर्गत ज़ लिन्या ले। नो बेलए जूँनी परमेस्वरए भाःकिन ज़ छैँव अगमबक्तराए यायाःनी है ल्यो ज़ उलिज्याव। २२मोसाए मनी अइ लिद पाँके,

‘जेजातलाव मिँराए याखानी ज़ परमेस्वरए जेजूँनी तोबो
डा मिताव अगमबक्ता
उथैदचाचिरिज्याव।
जे नोए ओपाँ भरित
बनै धिद ल्यो ताके।

२३जोराए नोए ओपाँ माभैँःर
होराए यामिन ओपोःस ज़
परमेस्वरए ओथोनी
क्याल्लिन्या ले।’

२४“हो मिताव ज़ अगमबक्ता भरी, समूएलए ओपालाकिन छीनीकाव पाला पैकावर प्राईए आव बेलाए जूनी ज़ पाँकेर। २५नो अगमबक्तराए याथोर जे ज़ जेतावए नो जेजिज्यु बाज्युरास परमेस्वरए ओनैव बाचालाव पाँ भरी जे जेक्याँत ज़ हुके। नो पाँ झादा परमेस्वरए अब्राहामलाई अइ लिद एक्यो,

‘नँ नथोरानी ज़ मानुवाताव प्राई जातलाव मिर्राए असिक दैन्या लेर।’

२६है जैद जेदोज़्याव पापरानी फकैद असिकर यान्याए जूनी परमेस्वरए ओसेवा दान्या उथैद ओनैज्याव येसुलाई उस०कत जे जेल्योक ज़ परीदचाचिक्यो,” है यादोक्यो।

पत्रुस स्रोनो यूहन्नानिलाई घ्योःव कचरील यारालाँव

हाःत ज़ पत्रुस स्रोनो यूहन्नानी माहोल्यारास निपाँज्याक ज़ ध्यान फिमलाव पाल्याराए कप्तान, नलाव पुजारीर स्रोनो सदुकीर नोनी निल्योक केस्हुकेर। २पत्रुस स्रोनो यूहन्नानी ‘येसु सिउनी ओसैसिउए छुत सिउर ब सैसिन्या लेर’ लिद थःरैद निराएज्यावए नोर बनै यारिस

चोके। ३है जैद नोनिलाई क्योःद जाँ रिमदा रिमदा ओतानावए हो पराःती खोलेःन्याए जूनी भयालखानाल यारानैकेर। ४हैदी मनी नोनी निपाँ थैज्यावरानी कुधुए भैःद येसुए ओपाँत चाःसिहुकेर। नो झादाडाव भैःज्यावरस प्राई जैद पाँच हजारा तानाकेर।

५हो पराःती यहूदीराए याघेप्पार, यासेरर स्रोनो सास्त्रीर प्राई यरूसलेमल दुप्सिद यालिज्याव। ६नोरास प्रधान पुजारी हन्नास ब उलिज्याव। नोस फरी कैयाफा, यूहन्ना, अलेक्जेन्दर स्रोनो छुत नोए ओखलकलाव घेप्पा पुजारीर ब यालिज्याव। ७नोराए पत्रुस स्रोनो यूहन्नानिलाई घ्योःव कचरी झाक यारासच्याँक नो घेप्पाराए नोनिलाई खोलेःद, “आव घ्याँस्यालाई काताए ओसक्तीनी, सुए उमिननी जिन्सगराँव?” है यारादोक ते, ८पत्रुस छैँव पुरुसए ब्याल्द, “अ यहूदीराए याघेप्पार, यासेरर, ९गिन आव घ्याँस्यालाई गिनयुँ नाद गिन्सगराँवए जूनी जेखोलेःसिज्याव ताकिन, गिन नोलाई कै जैद गिन्सगराँव लिद ते, १०जे स्रोनो इस्राएली भरिराए आव सैच्यो — जे क्रुसत जेसैःव, परमेस्वरए सिउनी ओसोचोइव

नासरतलाव येसु ख्रीसए उमिननी आव मिं जेड़ाक सोजोकाव ताद च्यांसिद ले। ११ धर्मसास्त्रलाव आव पां होए उजूनी ज़ सर्सिउ लिज़्या —

‘भुलीराए कान्ल ज़ माज़्यासे लिद याख्याव लुं

नो ज़ भन भुयारलाव लुं ताके।’

१२ है जैद पापए सजानी पुलुसुन्या उपुर सुए ओल्योनी ब माले। गे मिरालाई अजम्बरी जुनी दैन्या मनी आव मानुवाताव मिन भररानी उपुर सुए उमिन ब यासिउ माले, ” है यादोक्यो।

१३ पत्रुस स़ोनो यूहन्नानी निलेखा प्री काता ज़ ओमालिदी ब नियुं हुपद पक्कास निपांज्याव रँ:द नो कचरीलाव घेप्पार बनै अचम्ब ताद, ‘आवनी ते येसुसकावनी ज़ निल्यो’ लिन्त्या थःरैकेर। १४ फरी नो निसगराँव मिं ब याड़ाक सोजोकाव ज़ च्यांसिद उलिज़्याव रँ:द कातानी ज़ मापाँधुद थाम थुम ज़ ताकेर। १५ है जैद नोनिलाई कचरीनी लाँ:दा पले:द या याज़ जलफल दाद, १६ “आवनिलाई कै जैन्या ओताव? आवनी तोबो अचम्बलाव येन निदोव यरूसलेम भरी प्राइँ सैज़्यार, नो पाँत ‘मा:क’ है गेमालिधुइ। १७ खाली नो पाँ भन आदा होदा माफींजैन्याए जूनी

नोनिलाई हप्कैद, ‘येसुए उमिननी सुरास ज़ तापाँचिन’ है लिद अर्थैव ताके, ” है लिन्त्या थःरैकेर।

१८ है जैद नोनिलाई कचरील फरी ब खुल्द रैद, “जिन अबकिन येसुए उमिननी सुलाई ज़ काता पाँर सथैन्या ब मा:क, पैन्या ब मा:क, ” है लिद याराअर्थैकेर। १९ हा:त ज़ पत्रुस स़ोनो यूहन्नानी, “परमेस्वरए उयुं किताव उलिज़्याव, जे ज़ सैचिके — जे जेपाँ दान्या सैं ओल ओपाँ दान्या? २० गिन ते गिन्थैव स़ोनो गिन्ःव भरी कै जैद मापाँन्या?” है निरादोक ते, २१ नो घेप्पाराए फरी ब यारासिडार्केर। खाली मिं भरिए नोनी निदोव येनत परमेस्वरए उमिन बनै सघ्यो:द यापाँज्यावए नोनिलाई कैज़ माजैधुद यारारास्केर। २२ निताव अचम्बलाव येननी निसगराँव मिं ते चालीस बर्सकिन यादाडाव ओल्यो।

येसुए ओपाँत बाज़्यावराए

यापोँखारिउ पाँ

२३ पत्रुस स़ोनो यूहन्नानी निरास्सिउ छींनी निनैराए ल्योक बाद नो मुख्या पुजारीर स़ोनो यहूदीराए यासैरराए है यारादोव भरी है यारादोकिनी। २४ नोराए निपाँ भरी थैद प्राइँ तयुं जैद

परमेस्वरलाई अइ लिद पोंखारिकेर,
 “अ गोप्रभु, आव नाम नम सोनो रीर
 जैज्याव नँ ज़। नलाव लिज्याव भरी
 जैज्याव ब नँ ज़। २५ नँ छैव नपुरूसनी
 ज़ ननोकोर गोपुर्खा दाऊद राजाए
 ओयाःनी अइ लिद नपाँके,

‘मानुवाताव मिँर काराव
 यारसिज्याव?’

काराव अनाकलाव येनत
 बुद्धी याकलैज्याव?’

२६ मानुवाताव राजार सोनो
 मिँराए याघेप्पार

प्राइँ दुप्सिद परमेस्वर सोनो
 छाँतिद ओनैज्याव ख्रीसकिन
 तँदा जैसिकेर।’

२७ साचो ज़ प्रभु, आव सहरल ज़
 हेरोद सोनो पन्तियस पिलातसनी छुत
 जातलाव मिँर सोनो इस्राएलीरास
 खैद, छाँतिद ननैज्याव छैव नज़ा
 येसुकिन तँदा जैसिद, २८ नँ डादाकिन
 ज़ नयुँल गोइँद नरायो येन ब दोनाकेर।
 २९ अब ते, गेलाई हप्कैद सचे-व
 यापैँज्याव नँ ज़ चिऊके, प्रभु। सोनो
 गे ननोकोररालाई ब नपाँ सथैन्या
 माछे-द ज़ पाँन्या जैसियो। ३० नो
 गेरासथैज्याव पाँत फरी नँ नसक्तीए ज़
 छैव नज़ा येसुए उमिननी याजोरो हुवर
 ब ओगरारँक, अचम्बलाव सरेसर,

अचम्बलाव येनर ब ओतारक,”
 ३१ है लिद पोंखारिकेर। हो प्राइँना
 ज़ नो दुप्सिद यालिज्याव फ़िम बनै
 थोनो-सिद, छैव पुरूसए ब्याल्द
 प्राइँए परमेस्वरए ओपाँ माछे-द ज़
 यारासथैनाकेर।

येसुए ओपाँत बाज्यावराए प्राइँ
 याखार्त ज़ याजैव

३२ येसुए ओपाँत बाज्यावर प्राइँ खैद
 तोबो युँस ज़ यालिज्याव। यासकाव
 लिज्याव भरी ब प्राइँ याखार्त जैद
 ‘आव डामीं ज़’ है लिद सुए ज़ है
 यामालिज्याव। ३३ येसुए ओसाचीराए
 फरी बनै सक्तीस, ‘येसु सिउनी सैसिद
 स्वर्गत बाके’ है लिद प्राइँलाई ज़
 सथैद प्रभुए ओसाची याराएज्याव।
 उपुर्काव येसुए ओपाँत लिज्यावरालाई
 मनी परमेस्वरए ओअसिक याक्याँत
 ज़ ओताज्याव। ३४ याखार्ल माथैव
 मायो-व मिँर ब सु ज़ यामालिज्याव।
 याफ़िम, याएँ: ल्योर नो भरी यो-द
 ओए: भरी रैद, ३५ नो पैसार येसुए
 ओसाचीराए ल्योक यादुप्ज्याव। सोनो
 जोल चाहिज्या होल नो पैसार भाःद
 याराएज्याव।

३६ हा: बेलाक नोरास तोबो
 साइप्रस तापुनी हुव लेबी थरलाव

योसेफ यादोज्याव उलिज्याव।
येसुए ओसाचीराए नोए उमिन
बारनाबास नैदिकेर। (नोए ओअर्थ
'युं सभेःदयान्या'।) ३७ नोए पाला
तोबो ओएँःलाई योःद ओएः भरी
येसुए ओसाचीराए ल्योक लाँक्यो।

हननिया सोनो सफीरानी

५ फरी तोबो हननिया यादोज्यावए
ओज्या सफीरास निएँः तोथो
योःद, २ ओरेए नो एँःए ओएः ओज्या-
सकाव निसल्लाए तभा ओलस नैद
उपुर्काव भरी येसुए ओसाचीराए
ल्योक लाँक्यो। ३ ओसाचीराए ल्योक
ओरैव प्राइँना ज़ पत्रुसए, “ए हननिया,
कै जैद सैतानए नयुँल पसिद छैव
पुरूसलाई धुतैव उपरीनिज्याव? नो
एँःए ओएः तभा नँस नैद ‘आःज़’ है
नलिज्याव। ४ नो एँः ड़ादा नँ नमीं ज़
ओल्यो। योःद ओएः भरी जो नजैदी ब
नमाहाँ ज़ ओल्यो। कै जैद नयुँल इताव
नचेतैव? नँ गेलाई नधुतैसिज्याव
माःक, परमेस्वरलाई नधुतैज्याव
ची,” है दोक्यो।

५ हननिया नो पाँ भरी ओथैव
प्राइँना नक ज़ धलिद सिके। नो
थैवर प्राइँ ज़ बनै छेःकेर। ६ हाःत
ज़ नक लिज्याव धापाज़ाकावराए
नोए ओमोरोलाई क्वाए लुम्बैद
गादैनैकेर।

७ नो भरी ओताव स्रोंघन्ता छीनी
हननियाए ओज्या सफीरा मनी नक
हुके। ओरेलाई अइ ताके लिन्या
काता ज़ ओमासैँज्याव। ८ हाःत ज़
पत्रुसए, “नो जिन्योःव एँःए ओएः
आःज़ रो?” है ओदोक ते, नोए,
“नाः ज़,” है दोक्यो। ९ नकिन
पत्रुसए फरी, “जिन ज्याःरीए काराव
परमेस्वरए उपुरूसलाई उयुँ कोला
कोला जैदयान्या बुद्धी जिन्कमैव? दे,
नरेलाई गादैनै बावर ग्रामक ज़ हुद
लेर। नँलाई मनी लाँद गादैनिरिज्यार,”
है ओदोव प्राइँना ज़, १० नो मनी
होक ज़ धलिद उस० प्याःके। हाःत
ज़ नो ओरेलाई गादैनै बाव छोज्यार
खादरनी ओल्द हुद भिमल यापसिक
ओज्यालाई मनी सिउ ज़ दैकेर।
नोलाई मनी लाँद ओरेए ओलापक ज़
गादैकेर। ११ नो पाँनी ज़ मन्दली भरी
सोनो उपुर्काव थैज्याव मिँ भरी ब बनै
छेःकेर।

येसुए ओसाचीराए याजोरो हुवरालाई यारासगराँव

१२ हाः बेलाक मिँराए याखार्ल येसुए
ओसाचीराए याक्याँनी ज़ अचम्बलाव
सरेसर ओताज्याव। येसुए ओपाँत
लिज्यावर प्राइँए तयुँ जैद ध्यान
भिमलाव सोलोमन मैराल दुप्सिउ
ज़ यालिज्याव। १३ उपुर्काव मिँराए

नोरालाई बनै घ्योःव यारामानिदी ब नोरास खदेप लिन्या याछेऽयाव। १४ हैदी ब कुधु मिँर, खेपा मेंमा प्राइँ प्रभुए ओपाँत चाःसिहुव ज़ यालिऽयाव। १५ मिँराए, “याजोरो हुवराए याक्याँत पत्रुसए ओसाँ वाज़ उपरिदी ब गराँन्या ज़ लेर,” लिद नो याजोरो हुवरालाई याभेलोङ्गा यातैरास पत्रुसए ओयेमक यारानैऽयाव। १६ यरूसलेम सहर लापजीकाव नाखार नाखारलाव मिँराए मनी याजोरो हुवर सोनो माचाव पुरूसराए क्योःद यारानैऽयावरालाई येसुए उसिसराए ल्योक यारारैक नोर मनी यागराँऽयाव।

येसुए ओसाचीराए याखिरी यापसिनाव

१७ छींनी प्रधान पुजारी सोनो ओलसकाव सदुकी दललाव ओनैराए येसुए ओसाचीरालाई रँःद यामी बनै तूद, १८ नोरालाई क्योःद भयालखानाल याराभाःकेर। १९ हो छचाम रील परमेस्वरए ओचाकज्या हुद भयालखानालाव यामर फैदचाद नोरालाई पलेःद, २० “जे ध्यान भिमल बाद प्राइँए याङ्का च्याँःसिद आव साःरो जुनीए जूनी ओपोःस ज़ यारासथैचिके,” है दाद याख्यानैक्यो। २१ नोए है ओरादो पाँ भैःद नोर नम

उसँनाक ध्यान भिमल बाद मिँरालाई यारासथैकेर।

हो छचाम ज़ छकाल्न्या प्रधान पुजारी सोनो ओलसकाव लिऽयाव ओनैराए इस्राएल देसलाव यासेररालाई घ्योःव कचरील दुपद तोबो नेब्लो यासिपाईरालाई नो भयालखानाल लिऽयाव येसुए ओसाचीरालाई चानाव यारापरीकेर। २२ नोर बाद भयालखानाल सुलाई ज़ यामारादैवए ननी ओल्द बाद नो घेप्पारालाई, २३ “गे भयालखानाल गेबाक प्राइँत ज़ तालकुची भाःसिउ लिऽया, पाल्यार मनी यामक च्याँःसिउ ज़ लिऽयार। खाली याम फैद नल गेराचिऊक ते सु ज़ मालेर,” है यारादोक ते, २४ नो ध्यान भिमलाव पाल्याराए याकप्तान सोनो मुख्या पुजारीराए नो पाँ थैद, “अब कै तान्या ओताव?” लिद यारुँ बनै आँचानी पाँचा ओताऽयाव। २५ हो प्राइँना ज़ याल्योक तोबो मिँ हुद, “दे, नो भयालखानाल जेराभाःव मिँर ते ध्यान भिमल ची च्याँःसिद प्राइँलाई ज़ येसुए ओपाँ यारासथैऽयार,” है ओरादोक ते, २६ नो ध्यान भिमलाव कप्तान उसिपाईरास लाला लुलु बाद नोरालाई ननी कचरी भिमल चावस ज़ यारारैकेर। “मिँराए गेलाई लुँराए प्रोसिऽया,” लिद जबरज्यास्ती क्योःन्या याछेऽयाव।

२७ नो घयोःव कचरील दुप्सिउ
सेरराए याड़ाक फरी ब यारासच्याँवत
नो प्रधान पुजारीए, २८ “गे जेलाई
‘येसुए उमिननी काता पाँर ब
तारासथैच्यो’ है गेदाचिउ सैं माःक?
जे ते भन नोए ओपाँ यरूसलेम
भरिल फींजैद, नोलाई यासैःव गलती
ब गे गेडैत भाःव जेपैज्या,” है
ओरादोक ते, २९ पत्रुस सोनो येसुए
छुत ओसाचीराए, “मिँराए यापाँकिन
बुरू गे परमेस्वरए ओपाँ भैंःव ताके।
३० नो क्रुसत तङ्गैद जेसैःव येसुलाई
गेजिज्यु बाज्युराए यापरमेस्वरए ज
सिउनी सोचोइक्यो। ३१ नोलाई ज
फरी परमेस्वरए स्वर्गताव प्राइँरानी
ओमान ल्यो भैंःव पोल नैद गेराजा
जैदयासिक्यो, पापनी रास्न्या ब
जैदयासिक्यो। गे इस्राएलीरालाई
गेयुँर तोदयाद गेपापर क्याल्दयान्या
ओल ज लिज्या। ३२ गे फरी नो पाँ
भरित ओसाचीर गेलिज्या। खाली गे
वाज माःक, छैँव पुरूस ब लिज्या। नो
पुरूस गे परमेस्वरए ओपाँ भैंःज्याव
भरिरालाई गेक्याँत ज याद नैसिउ,”
है यारादोकेर।

गमलिएलए ओसल्ला

३३ नो घयोःव कचरीलाव मिँराए
पत्रुसए ओपाँ भरी थैद यायुँर बनै
कोला कोला ताद नो उसिसरालाई

सैःव पैकेर। ३४ हाःत ज तोबो
यासकाव गमलिएल यादोज्याव नो
कचरीराए याड़ाक च्याँःसिके। नो
मिँ बनै मान दैव फरिसीरासकाव
कानुनलाव यागुर्बा ओल्यो। है
जैद नोए येसुए उसिसरालाई तखेप
लाँःदा पलेःव परींद नो घेप्पारालाई
है यादोक्यो, ३५ “अ इस्राएली डानैर,
आवराए याक्याँत जेदोरिज्याव येन
बनै जोगोइसिद वाज दोच्यो। ३६ नो
तालाडाव थुदासए मनी तघरीत ज
उमिन बनै सघयोःद ओल्योदा चार
सयवा मिँर याजैक्यो। छींनी नोलाई
यासैःवत उमीर प्राइँ चितराँ पुतराँ ताद
उमिन ज माके। ३७ नकिन फरी नो
गालीललाव यहूदाए मनी, जनसंख्या
यासज्याव बेलोक, मिँरालाई सर्बा
ज ओल्योदा याजैक्यो। नोलाई मनी
यासैःक उमीर आदा बाकेर लिन्या
ज माताके। ३८ है जैद आछिम डा
जेलाई आव सल्ला डायचिज्या —
आव मिँरालाई कैज ताराजैच्यो, बुरू
यारासास्चिके। आवराए याबिचार
यायेनर अइज मिँनिकाव हुव ताकिन
नो ओलनी ज मान्या ले। ३९ नो यायेन
फरी परमेस्वरनिकाव हुव ताकिन जे
वैंधुन्या जेमाले। भन परमेस्वरकिन
तँदा जैसिद ओलस लरैँ जेदोज्याव
मिताव तान्या ले,” है ओरादोक
ते, ४० नोराए नोए ओपाँ भैंःद येसुए

ओसाचीरालाई फरी ब याल्योक खुल्द, “येसुए उमिननी काता पाँर ब तारासथैच्यो,” लिद हप्कैद रीःद अइज़ यारास्रस्केर। ४१ नोर नो कचरीनी पुलुस्द, ‘परमेस्वरए गेलाई येसुए उमिनत दुख सहिन्या स्यासोर ओथःरैसिउ ओल्यो’ लिद बनै रेंए रेंए बाकेर।

४२ नकिन दिनकाव ज़ ध्यान फ़िमल सोनो मिंराए फ़िम फ़िमक दुप्सिद, “येसु परमेस्वरनी हुव खीस ज़,” लिद च़िम मादाद सथैव ज़ यारानैकेर।

सात जना सथैन्यार

६ हाः बेलाक येसुए ओपाँत बाज़्यावर सर्बा याबा·नावत यासकाव ग्रीक पाँज़्याव यहूदीर हिब्रू पाँज़्याव यहूदीराए याडैत जाँ यारूम्रूमैज़्याव। हिब्रू पाँज़्याव यहूदीराए माथैव मायो·वरालाई दिनकाव ज़्यावर भाःद याराएक कैताक ग्रीक पाँज़्याव राँदी मेंमारालाई बलेंद याराख्यानैज़्याव। २ है जैद बाह्व जना येसुए उसिसराए परमेस्वरए उमिनतावरालाई दुप्द, “गे परमेस्वरए ओपाँ सथैज़्यावराए नो गेध्यावनालाई रास्द ज़्यावर भाःदचान्या जाँ माज़्यासे। ३ डानै डामेंर, बुरू जे ज़ नो येन चलैन्यात जे जेखानी ज़ सात जना यातह ल्यो छैव पुरूसए ब्यालो

यामान ल्योरालाई याराखतैचिके। ४ गे ते परमेस्वरलाई पोंखारिद ओपाँ सथैन्या ध्यावना वाज़ गेदोरिज़्या,” है यारादोक ते, ५ प्राडैँ ज़ भैःद नोरालाई याराखतैकेर। उसंक्तावए उमिन स्तिफनस। नो मिँ परमेस्वरए ओपाँत बनै थंरिउ, छैँव पुरूस दैव मिँ ओल्यो। नकिन फिलिप, प्रखरस, निकनोर, तीमोन, पर्मिनास, सोनो एन्तिओखिया सहरनी हुद ड़ादा ज़ यहूदी जैसिउ निकोलाउसलाई ब जैकेर। ६ आव भरिरालाई येसुए ओसाचीराए याल्योक यारारैक, नोराए पोंखारिद असिक निदचाद याकुइ याडैत भाःद याराएकेर।

७ परमेस्वरए ओपाँ भन ज़ फैलिद, यरूसलेमल येसुए ओपाँत हुज़्यावर बनै ज़ याबा·ज़्याव। पुजारीर मनी कुधुए ज़ यायुँ उहुज़्याव।

स्तिफनसलाई याक्योःव

८ नो स्तिफनसए परमेस्वरए ओअसिक सोनो ओसक्तीर ओक्याँत ओतावए, मिंराए खार्ल बनै अचम्बलाव येनर ओदोज़्याव। ९ हो बेलाक ज़ यरूसलेम सहरल ‘फुर्सुल ताव’ है यारादोज़्याव यहूदीराए धर्मसास्त्र फ़िम तोबो जैद यानैज़्याव। नोर ख्वार कुरेनी सोनो अलेक्जेन्द्रिया सहरनी हुवर, ख्वार किलिकिया सोनो

एसिया खन्दनी हुवर यालिङ्याव।
 नोर स्तिफनसकिन तँदा जैसिद नोस
 खर्लेसिउ ज़ यालिङ्याव। १०खाली
 स्तिफनस परमेस्वरए उपुरूसनी
 ओदैव बुद्धीनी ओपाँवए नोराए ओपाँ
 जात्त ज़ मापल्लैधुकेर। ११है जैद नोराए
 अन्नाकलाव पाँर ससैद, “ ‘आव
 मिँ मोसाए उउपर्त स्रोनो परमेस्वरए
 उउपर्त माचाव ओपाँङ्याव गे ज़
 गेथैके’ है लिचिके,” लिद मिँरालाई
 यारामचैकेर। १२नोराए माहोल्यार,
 यहूदीराए यास्रेर स्रोनो सास्त्रीरालाई
 मनी यारामचैकेर। नकिन प्राईँ ज़
 स्तिफनसए ल्योक हुद नोलाई क्योःद,
 नो घ्योःव कचरीलाव घेप्पाराए
 डाक लाँद सच्याँकेर। १३नोए उजूनी
 रूवार धुत गोहाईर जैसिद, “आव मिँ
 एकतार ज़ गेध्यान फ़िम स्रोनो मोसाए
 ओकानुनए उउपर्त पाँव ज़ लिङ्या।
 १४आवए ते फ़न, ‘नो नासरतलाव
 येसुए ध्यान फ़िमलाई तैःद, मोसाए
 ओयासिउ चलनर ब तोदचान्या ले,
 इताव पाँर है उलिङ्याव ब गेथैके,”
 है लिकेर। १५हाःत ज़ नो घ्योःव
 कचरील दुप्सिद लिङ्याव भरिए
 स्तिफनसलाई लँ लँ याचिऊक ओडाः
 परमेस्वरए ओचाकज्याए ओडाः
 मिताव ज़गै ज़गैव रँःकेर।

स्तिफनसए ओरायो जवाप

७ हाःत ज़ नो घ्योःव कचरी-
 लाव प्रधान पुजारीए, “आव
 नडैत फ़ाःद याईँङ्याव पाँर
 साचो सैं माःक?” है ओदोक ते,
 २स्तिफनसए, “अ डास्रेर, डादाज्यु
 भाइर, आव डापाँ थैचिके। गेपुर्खा
 अब्राहाम हारानल ओमाबाद, डादा
 मेसोपोतामिया देसल उलिङ्याक
 ज़ ज़गै मगैव परमेस्वर ओडाक
 सरैःसिद, ३‘आव नलिङ्याव देस
 स्रोनो नक्याँदाडावरालाई रास्द नँलाई
 सतैद डाईरिङ्याव पोड लिनान्के,’
 है ओदोक ते, ४अब्राहाम ओल
 उलिङ्याव कल्दीराए यादेसलाई
 रास्द हारानल बाद नल ज़ जाँवा पै
 लिके। नकिन ओबाबु उसिउ छीनी
 परमेस्वरए आव गेलिङ्याव पोल ज़
 सारैक्यो।

५“खाली हो बेलोक आव देसल
 ओल लिन्या पो परमेस्वरए तके ब
 ओमाएताव, ओज़ार मनी तोबो ब
 यामाताताव। हितावत मनी परमेस्वरए
 नोलाई, ‘आव पो नँ नपो स्रोनो नथोर
 लिन्या पो जैद डायाचिरिङ्या,’ है
 लिद याका याद ओनैङ्याव। ६खाली
 होए उजूनी परमेस्वरए इतावनी ब



पाँके, 'नँ नथोर छुतराए यादेसल खासिद लिद नोराए याधूँल चार सय बर्स पै याबाँदार ताद दुख ब दैन्या लेर। ७ छीनी डा ज़ नो बाँदा ताद यालिज़्याव देसलाई सजा डाएरिज़्या। हाःकिन नो नथोर ननी पुलुस्द आव डायाचिरिज़्याव पोल डासेवा दाहुन्या लेर,' है दोक्यो। ८ नकिन परमेस्वरए अब्राहामलाई बाचालाव क्यालन्या सरेस एक्यो। है जैद अब्राहामए ओज़ा इसहाक उजर्मिउ आथ दिनत नो सरेस जैदिक्यो। नकिन इसहाकए ओज़ा याकूब ताके, याकूबए ओज़ार बाह्व जना बाह्व थरराए यापुर्खार ताकेर।

९ "याकूबए ओज़ा योसेफलाई छुत ओदाज्युराए यामी तूद इजिप देसदा योकेर। हैदी ब परमेस्वर योसेफस ओल्योए, १० उदुख भरिनी जोगोइद, नोलाई बनै अचम्बलाव बुद्धीर याद इजिपलाव राजा फारोलाई योसेफए ओल्योदा दाइनो जैक्यो। है जैद नो राजाए योसेफलाई इजिपलाव हाकिम जैद दरबार चलैन्या ब जैक्यो।

११ "छीनी इजिप सोनो कनान देस भरिल घ्योःव अनिकाल हुद

प्राइँलाई ज़ बनै दुख ताके। गोपुर्खाराए मनी ज़्याव मादैकेर। १२ है जैद याकूबए 'इजिपल ज़्यावर दैसिज़्या दी' लिन्या बयेन थैद ओज़ारालाई नदा तखेप ज़्यावर लँःनाव यापरीक्यो। १३ फरी छीनीकाव पालाकाव ओरापरीक योसेफ ओदाज्यु भाइराए याङ्काक सरेस्सिके। हाःकिन राजा फारोए मनी योसेफए उक्मिमलावरालाई यासरेस्क्यो। १४ नाःत ज़ योसेफए, ओबाबु याकूब सोनो ओक्याँदाडाव भरिरालाई 'आदा ज़ उहुरक' लिद किनाव यापरीक्यो। नोर प्राइँ जैद पचहत्तर जना याल्यो। १५ है जैद याकूब इजिपल बाद नल ज़ सिके। गोपुर्खार ब नल ज़ सिके। १६ खाली नोराए यामोरोर नल मानैद, अब्राहामए हमोरए ओज़ाराए याल्योनी उलँःव सकेम नाखार डाकाव खादर पुपल ज़ यारागादैनकेर।

१७ "हाःकिन ज़ परमेस्वरए अब्राहामलाई ओयो ग्राका सयोःन्या बेला उहुनावत नोए ओथोर इजिपल ज़ लिद बनै ज़ बाःनाकेर। १८ छीनी इजिपल योसेफए उमिन माथैव तोबो

७:६-७ उत १५:१३-१४; प्रस ३:१२

७:८ उत १७:१०-१४; २१:२-४; २५:२६; २६:३१-३५:२६ ७:९ उत ३७:११,२८; ३६:२,२१

७:१० उत ४१:३६-४१ ७:११ उत ४२:१-२ ७:१३ उत ४५:१,१६

७:१४ उत ४५:६-१०,१७-१८; ४६:२७ ७:१५ उत ४६:१-७; ४६:३३

७:१६ उत २३:३-१६; ३३:१६; ५०:७-१३; यहो २४:३२



सा:रो राजा पुलुस्के। १६नो राजाए
गेखलक भरिरालाई जाल दाद बनै
दुख याएक्यो। याभाउज़ारालाई मनी
सफ्या-न्याए जूनी करस ज़ पाखादा
पले-व ओरापरींज्याव।

२०“होए ओपालाक ज़ मोसा
जर्मिके। नो भाउज़ा परमेस्वरए उयुं-
लाव ज़ ओल्यो। नोलाई सोमैना पै
ओबाबु ओआमानी निफिमल ज़
मोंद डाकेनी। २१छीनी नोलाई पाला
पाखाड ख्याद यानैज्याक राजाए मेंमा
ओज़ाए नोलाई लाँद ओल ओज़ा
ज़ जैद डाक्यो। २२है जैद मोसाए
इजिपलाव प्राईं ग्यान सिऊसिद,
सैन्या सोनो दान्या भरित बनै ओगहक
ल्यो मिँ ताके।

२३“चालीस बर्स ओतावत ओभेरा
इसाएलीरास दैसिन्या युँ दोक्यो। २४है
जैद तछा याल्योक ओबाक तोबो
इजिपीए इसाएलीलाई ओप्रोज्याव
रँ:द नो प्रोसिउलाई धुरिदद्याद उखिस
फेरैदद्याद, प्रोज्यावलाई सै:दिक्यो।
२५ओल उयुँल ते, ‘डाभेरारालाई
यादुखरानी फुर्सुल जैन्या परमेस्वरए
डालाई जैद नैनाव। आव पाँ नोराए
मनी सैंज्याखेरहो,’ है उलिज्याव।
खाली नोराए मासैंकेर। २६है जैद हो

परा:ती मनी याल्योक ओबाक नेब्लो
इसाएलीनी नी नी निखप्सिज्याव
रँ:द, ‘अ डानैनी, जिन दाज्यु भाइनी
काराव जिन जिन ज़ जिन्प्रोसिज्याव?’
लिद नोनिलाई सखैव ओपैंज्याक,
२७नो डादा छुपिउए मोसालाई हुतैद,
‘नँलाई गेडैताव ताद पाँ फाल्न्या सुए
ओजैनिउ? २८काता नँ आभयोकाव
इजिपीलाई नसै:व मिताव डालाई
ब सै:व नपैंज्याव रो?’ है ओदोक
ते, २९मोसाए नो पाँ थैद ओछ्याचेए
धों:द मिदद्यान देसल खासिद
लिनाके। नल ज़ ओज़ानी ब दुई भाइ
ताकिनी।

३०“मोसा नल ओल्यो चालीस
बर्स ओतावत सीनै खागरताव बनल
भोपोरा चाँ:ज्यावनी परमेस्वरए
ओचाकज्या ओडाक सरै:सिके।
३१मोसाए नो भोपोरा ओलनी ज़
ओचाँ:ज्याव रँ:द बनै अचम्ब ताद जाँ
ओल्योकसै बाद चिऊद ओनैज्याक
परमेस्वरए ओर्गाए, ३२‘डा जेजिज्यु
बाज्युराए यापरमेस्वर, अब्राहाम,
इसहाक सोनो याकूबराए यापरमेस्वर
ज़,’ है लिन्या ओथैव प्राईंना मोसा
ओछ्याचेए बनै गूद माभाल्सिधुके।
३३हा:त ज़ परमेस्वरए, ‘नखँताव



पोला हाडके, नँ च्याँ:सिद नलिज्याव पो चोखो लिज्या। ३४ इजिपल लिज्याव डामीं इस्राएलीराए धो सहिउ दुखर यादैज्याव डा ज़ रँ:द डानै। नोर यागहनिज्याव ब थैद डानै। है जैद नोरालाई जोगोइना हुद डाले। दे नँ भा:सिन्केदा, इजिपदा डापरीनिरिज्या, है दोक्यो।

३५“है जैद नो डादा ‘नँलाई गेडैताव ताद पाँ फाल्न्या सुए ओजैनिउ?’ है लिद यामाभै:व मोसालाई ओल परमेस्वरए ज़ चाँ:ज्याव भोपोरानी पाँज्याव ओचाकज्यालाई ओल्योक परीदयाद भन यालाई जोगोइन्या याडैताव जैद याएक्यो। ३६ मोसाए नोरालाई ननी ओरासारैक इजिपल, लाल समुन्द्रल, सोनो चालीस बर्स पै याल्यो बनल अचम्बलाव येनर सतैद याएक्यो। ३७ नो मोसाए ज़ फरी नोरालाई, ‘परमेस्वरए जेजातलाव मिँराए याखार्नी ज़ जेजूनी तोबो डा मिताव अगमबक्ता उथैदचाचिरिज्याव,’ है ओरादोज्याव। ३८ नो मोसा मनी नोरास चालीस बर्स भरी बनल लिद सीनै खागरत परमेस्वरए ओचाकज्या सोनो गेसाखा

पुखाराए याखार्लाव त्याला ताद नो बाँचिन्या पाँर गेलाई मनी यासिक्यो।

३९“खाली नोराए भन ओपाँर माभै:द ओललाई ज़ भी:केर। यार्युं जम्मा यारासो पो इजिपदा वाज़ खोतोरो याजैज्याव। ४० है जैद नोराए मोसाए ओदाज्यु हारूनलाई, ‘गेलाई इजिपनी पले:ज्याव मोसा काना ओबाव सुए ज़ गेमासैए। है जैद नँ ज़ गेलाई गेडा गेडा बन्या देवतार जैदचाव ताके,’ है दोकेर। ४१ नो बेलाक बाछाए अडग्या तोबो जैद नो अडग्याए उमिनत मार सै:द चरै:द बनै घ्यो:व जात्रा जैकेर। नो अडग्या याज़ याजैवए बनै रँकेर।

४२“है जैद परमेस्वरए ओडा: तँदा फकैद, ‘आवरालाई कै जैद ब माताके’ लिद, ‘नमताव स्यावै, निमी, सोरोरालाई ब पुजा घदोज्यारक ते,’ है लिद यारास्क्यो। होए उजूनी अगमबक्तराए यासरो पोस्तोकोल ब इताव सर्सिउ लिज्या,

‘अ इस्राएललाव मिँर, नो चालीस बर्स भरी बनल जेलिज्याकाव मारर सै:द जेचरै:व डा डाजूनी मा:क।



४३ खास जे यासेवा दान्याए जूंनी
जैद जेस जेरालाँव
मोलोख देवता लिन्या पाल
सोनो सोम्पा सोरोए
ओअङ्ग्यानी ची।
है जैद डा जेलाई जबरज्यास्तीस
बेबिलोन देसदा
डालाँचिरिङ्या।

४४ “हो बेलाक ज़ गेसाखा पुर्खारास
बनल यालिङ्याक परमेस्वरए
ओध्यान दान्या पाल ब उलिङ्याव।
नो पाल परमेस्वरए मोसालाई
सतैद ओयो गोईंनी ज़ जैसिउ
उलिङ्याव। ४५ छीनीकाव पिरील
मनी गेसाखा पुर्खाराए यहोसूस
कनान देसल याबाक नो पाल यास
ज़ यालाँङ्याव। हो बेलाक ज़ नो
देसलाव छुत जातरालाई परमेस्वरए
खेपैद ओरायोनी नो पो गेसाखा
पुर्खाराए यामीं ज़ ताके। है जैद नोर
नल लिद दाऊद राजाए ओपालाक
पै नो पाल यास ज़ यानैङ्याव।
४६ दाऊद परमेस्वरए उयुँलाव मिताव
मिँ ओतावए नोए ‘नँलाई लिन्या पो
तोबो फ़िम जैद गेई रो’ लिद याकूबए
ओपरमेस्वरलाई बिन्ती दोक्यो।

४७ खाली नो फ़िम होए ओपालाक
माताद ओज़ा सोलोमनए ओपालाक
वाज़ ताके।

४८ “हैदी ब ओल माहान परमेस्वर
उलिन्या पो ते मिँए जैसिउ फ़िमल
माःक। अगमबक्ताए मनी परमेस्वरए
ओपाँ अइ लिद सर्द नैव,

४९ ‘डा डारिहासन स्वर्गत लिङ्या।

डाखँ नैन्या पो नामल लिङ्या।

इतावए डाजूनी किताव फ़िम ची
जैद जेयोरिङ्याव?

डा डानासिन्या पो

काङ्क ची उलिङ्याव?

५० आव जेरँःङ्याव नाम नम भरी

आव डाकुइए ज़ डाजैव

माःक रो?’

५१ “जे बनै मामुइलिउर, जेयुँ
परमेस्वरए ओपाँ मासैङ्यावराए यायुँ
स्यासो लिङ्या। जेर्ना ब सूइसिउ
मिताव ज़ ताद छैव पुरूसनिकाव
हुङ्याव पाँ भरी काता ज़ जेमाथैधुइ।
जे जेयेन चबनै जेसाखा पुर्खाराए
यायेन स्यासो ज़ लिङ्या। ५२ नोरानी
खिरी मापसिउ अगमबक्ताए सु ची
यालिङ्यावदा? नो डादा ‘परमेस्वरए
छैव उमीं गेल्योक हरिङ्या’ है लिद

७:४२-४३ आमो ५:२५-२७ ७:४४ प्रस २५:६,४० ७:४५ यहो ३:१४-१७

७:४६ २ समू ७:१-१६; १ इति १७:१-१४ ७:४७ १ राज ६:१-३८; २ इति ३:१-१७

७:४९-५० यसै ६६:१-२ ७:५१ यसै ६३:१०

सथैऽयाव भरिरालाई मनी ओपोःस ज़ यारासैःकेर। जे ते भन नो हुव ओज़ालाई ज़ धोका याद जेसैःके। ५३ है जैद जे परमेस्वरए ओचाकऽयारानी परमेस्वरए ओकानुन दैवराए ते, जे ज़ भन नो कानुन जेमाभैःके,” है यादोक्यो।

स्तिफनसलाई लुँए भेःद यासैःव

५४ नो घ्योःव कचरीलाव घेप्पाराए स्तिफनसए ओपाँ याथैवत यारिसए बूलिवा ताद याहार डर डर कैकेर। ५५ स्तिफनस ते छैँव पुरुसए ब्याल्द नमदा ओभाल्सिक परमेस्वरए ओज़गै ब रँःक्यो, परमेस्वरए ओवोर्दा येसु च्याँःसिद उलिऽयाव ब रँःक्यो। ५६ हाःत ज़, “ओहो! नम फैसिउल मिँ मिन्सिउलाई परमेस्वरए ओवोर्दा च्याँःसिद उलिऽयाव डारँःऽया,” है ओल्यो प्राईंना ज़, ५७ नोर बनै चिर चिर क्रिद यानारि सूइद, प्राईं ज़ भोरोःसिनाद, ५८ नोलाई लुँए भेःद सैःन्याए जूँनी सहरनी सेल्द पाखाड लाँकेर। हो बेलाक नोरास बाव तोबो साऊल यादोऽयाव धापाज़ाकाव ब उलिऽयाव। नो छ्याप लैऽयावराए याफुतुर हाइद नोए उजिम्बाल नैकेर। ५९ नोलाई लुँ लुँए याभेःऽयाक स्तिफनसए परमेस्वरए उमिन हाइद, “अ प्रभु येसु, डापुरुस नल्योदा

लाँदचाँके,” है लिद, ६० उघूँदानी तिकिसिद बनै चोइस, “अ प्रभु, आवराए डाक्याँत यादोऽयाव पाप याक्याँत ताताक,” है ओल्यो प्राईंना ज़ उस० फ्याःके।

नो साऊलए मनी, ‘आवलाई सैःन्या ज़’ लिद नोरास तयुँ ज़ ओजैऽयाव।

साऊल मन्दलीए उखिरी उपसिउ

हो छ्यामकिन ज़ यरूसलेम सहरलाव मन्दलीए उखिरी बनै पसिनाकेर। हुनी ज़ नोर प्राईं यहूदिया सोनो सामरिया खन्दल धोंःद राःसिनाकेर। येसुए ओसाचीर वाज़ यरूसलेमल रहिकेर। २ हाः बेलाक फरी, धर्मी मिँराए स्तिफनसए ओमोरोलाई बनै घरे घरे लाँद गादैकेर। ३ साऊलए ते मन्दलीलावरालाई बनै ज़ हाप हाप ख्याद फ़िम फ़िमक बाद खेपा मेंमा प्राईंलाई ज़ क्योःद सेले सेले लाँद भ्यालखानाल ओराभाःऽयाव।

येसुए ओपाँ सामरियाल ओथासो

४ नो यरूसलेमनी धोंःद बावर प्राईंदा राःसिद जोड याकेस्दी ब येसुए ओपाँ यारासथैकेर। ५ फिलिपए सामरिया सहरल बाद परमेस्वरनी हुव ख्रीसए उजूँनी यासथैक्यो। ६ नलाव मिँराए नोए ओपाँर थैद अचम्बलाव

ओदोव येनर रँ:द ओपाँ बनै चावस थैकेर। ७माचाव पुरूसर कुधु मिँराए याक्याँतिन बनै चिर चिर क्रिद पुलुस्द याबाज्याव, सोनो याखँ याकुइ सिउर, दूँदार यागराँज्याव। ८है जैद नो सहरल मिँर बनै ज़ यारेंज्याव।

सिमोन धामी

६नो सहरल तोबो सिमोन यादोज्याव बनै उमिन थासो धामी ब उलिज्याव। नो बनै सघ्यो:सिद ओमन्तर तन्तरए सामरियालाव मिँरालाई डादाकिन ज़ अचम्ब जैद ओरानैज्याव। १०घेप्पा जिम्ज़ा मिँराए नोलाई बनै घ्यो:व थ:रैद, “आव ज़ ची ओल्यो, परमेस्वरए ओसक्ती ल्यो मिँ,” है यालिज्याव। ११है जैद कुधु बर्स पै ओमन्तर तन्तरए अचम्ब ओराजैवए, प्राइँए ज़ यामानिज्याव।

१२हा:त ज़ फिलिप यासहरल हुद येसु ख्रीसए उमिननी परमेस्वरए ओराज्यालाव चाव था ओरासथैक खेपा मेंमार कुधु ज़ ओपाँर भैं:द रील सछैंसिकेर। १३ओल सिमोन धामी मनी परमेस्वरए ओपाँत उयुँ हुप्ट सछैंसिके। ओसछैंसिउ छींनी फिलिपस आदा होदा सिप सिप लिद फिलिपए ओदोज्याव अचम्बलाव सरेसर येनर रँ:द बनै ज़ अचम्ब ताद उलिज्याव।

१४छींनी यरूसलेमल लिज्याव येसुए ओसाचीराए ‘सामरियालाव मिँराए मनी परमेस्वरए ओपाँ भैं:द लेर दी’ लिन्या याथैवत पत्रुस सोनो यूहन्नानिलाई नदा यारापरीकेर। १५नोनी नड बाद नोरालाई छैंव पुरूस दैन्याए जूँनी परमेस्वरस पोंखारिद निद याराएकिनी। १६हा:पै छैंव पुरूस याक्याँत ओमाहुताव, नोर प्रभु येसुए उमिननी वाज़ सछैंसिद यालिज्याव। १७है जैद नोनी निकुइ याक्याँत नैदचाद निपोँखारिक छैंव पुरूस दैकेर।

१८नो सिमोन धामीए अइज़ निकुइ नैद निरायोनी ज़ नो पुरूस उहुज्याव रँ:द, होक ज़ ओपैसार हाइद, १९“दे डासेरनी, निताव सक्ती डालाई ब याव ताके। डा मनी मिँराए याक्याँत डाकुइ नैद डाराएक छैंव पुरूस ओदैरक,” है उलिक ते, २०पत्रुसए, “नो नपैसा नँस ज़ ओमाक। नँ है नलिज्याव मिताव परमेस्वरए ओअसिक ज़ खर्क पैसाए लँ:द ओदैसिज्याव? २१नँ नयुँ परमेस्वरकिन तँदा ओतावए आव पाँत नजुँ काता ज़ दैन्या नमाले। २२आव दोव नपैज्याव माचाव येननी नयुँर त्तोद परमेस्वरलाई पोंखारिद माफी निके, कसा नपाप क्याल्द माईव। २३माछैंव येनत नयुँ मानैधुद पापल सुर्सिउ मिताव नलिज्या,” है दोक्यो।

२४हा:त ज़ सिमोन बनै छे:द, “जिन ज़ परमेस्वरलाई पोंखारिदचाव ताके। आव है जिन्लिज़्याव मिताव काता ज़ डाक्याँत ताताक,” है लिद बिन्ती दोक्यो।

२५नकिन पत्रुस सोनो यूहन्नानी नो सहरल परमेस्वरए ओपाँ बनै चावस थ:रैद पलास्द निरायोत, फरी नोनी ननी पुलुस्द सामरियालाव नाखार याल चाव था सथैए सथैए यरूसलेमदा ओल्द बाकिनी।

फिलिप इथियोपियालाव मन्त्रीस ओदैसिउ

२६हा:त ज़ परमेस्वरए ओचाकज्या फिलिपए ल्योक सरै:सिद, “नँ आनी बाद नो दखिनलाव यरूसलेमनी भरिद नाङग्या पात्या बनलाव घ्याँ गाजा सहरदा बाज़्याव येमदा बान्के,” है ओदोव प्राइँना ज़, २७फिलिप च्याँ:सिद बाके। नो येमत ओबाज़्याक नक तोबो इथियोपिया देसलाव सिडारू मिँ ब नदा ज़ ओबाज़्याव। नो मिँ इथियोपियालाव माहारानी कन्दाकीए ओपैसा चलैज़्याव मन्त्री ओल्यो। नो यरूसलेमल बाद ध्यान दाद, २८उक्तिमदा ओल्द ओबाज़्याव। नो मिँ उगदील

चुसिद यसैया अगमबक्ताए ओसरो पोस्तोको उपरिज़्याव। २६हा:त ज़ परमेस्वरए उपुरुसए फिलिपलाई, “नँ नो गदीलाई दैनाद नोस बान्के,” है ओदोक ते, ३०फिलिपए नोलाई धों:नाद ओदैनाक नो मन्त्रीए यसैया अगमबक्ताए ओसरो पोस्तोको उपरिज़्याव थैद, “नो नपरिज़्यावए ओअर्थ नमाबुभिज़्या?” है ओदोक ते, ३१नो मन्त्रीए, “डालाई पैन्या मिँ माल्यो। कै जैद डाबुभिधुरिज़्याव?” है दाद, फिलिपलाई ओलस चुसिउ परीक्यो।

३२नो धर्मसास्त्रलाव उपरिज़्याव खन्द आव ज़ ओल्यो,

“पल्ला यालाँज़्याव बेधा माँ:ती
नोलाई ब लाँकेर।

याएन्ज़्याव पाथा ओमाकिज़्याव
मिताव

नो मनी घाइ ज़ मालिके।

३३बिनु न्याय ज़ बीज्यात जैकेर।

ओललाई ज़ यासफ्या:वए,

ओथोर कातानी ची

यारै:रिज़्याव?”

३४नो मन्त्रीए फिलिपलाई, “डालाई है दाँके, अगमबक्ताए आव पाँर ओल उजूनी ओपाँव सैं छुतए उजूनी ओपाँव?” है ओदोक ते, ३५फिलिपए,

“आव भरी येसुए ओक्यांत ताव पाँर ज़,” लिद नो धर्मसास्त्रलाव खन्दनी ज़ येसुए उजूनी चाव था पलास्दिक्वो।

३६येमत निबाज़्याक तोबो री लिज़्याव पोक निहुवत नो मन्त्रीए, “दे आक री लिज़्या, डा नल सछैसिन्या माताज़्या?” है ओदोक ते, ३७ [फिलिपए, “नँ येसुए ओपाँत नयुँ उहुप्किन, ताए ज़,” है दोक्वो। हाःत ज़ नो मन्त्रीए, “येसु ख्रीस परमेस्वरए साचो ओज़ा ज़ लिद डायुँ हुबो ज़ लिज़्या,” है दाद,] ३८नो गद्दी चलैज़्यावलाई अदैव परीद नोनी नेब्लो रील बाद फिलिपए मन्त्रीलाई होक ज़ सछैक्वो। ३९नोनी रीनी निपुलुसो प्राइँना परमेस्वरए उपुरूसए फिलिपलाई क्योःद छुतदा ज़ लाँक्वो। मन्त्री ते बनै रेंए रेंए उक्किमदा बाद फिलिपस फरी मादैसिकिनी।

४०नकिन फिलिपए ओल ओक्याँ-लाई अस्दोद सहरल दैद नजीदाडाव नाखार नाखार भरिल बाद कैसरिया सहरक पै चाव था यासथैक्वो।

साऊलए प्रभु येसुलाई उरँःव

६ साऊलए हाःपै प्रभुए ओपाँत लिज़्यावरालाई यामिन समै-दयान्याए जूनी उसुनी बनै फों फों ओमोज़्याव। है जैद प्रधान पुजारीए ल्योक बाद, २दमस्कस

सहरलाव धर्मसास्त्र फिमलाव घेप्पारालाई सतैदयान्याए जूनी पुर्जी कागत निद ओनैज़्याव। नोए येसुए ओपाँत बाज़्याव खेपा मेंमारालाई सापद क्योःद, यरूसलेमदा लाँन्या ओपैँज़्याव। ३येमत ओबाज़्याक दमस्कस केस्न्यावाक उमँःजानी बनै मी भीःन्या ज़गै नमतिन म्याल्याकनी मिलिक हुके। ४साऊल होक ज़ धलिद कातानी तोबो गाए, “ए साऊल, ए साऊल, नँ काराव डाखिरी नपसिज़्याव?” है लिद ओपाँज़्याव थैक्वो। ५साऊलए फरी, “नँ सु प्रभु?” है ओदोक ते, नो गाए, “डा नो डाखिरी नपसिज़्याव येसु ज़। ६नँ सोद सहरल बान्केदा, नड ज़ नँ दान्या येन भरी थैन्या नले,” है दोक्वो।

७साऊलस बाज़्याव ओनैराए ते नो गा थैज़्यावत ब सुलाई ज़ यामारँःवए नोर बनै तोतास्केर। ८हाःत ज़ साऊल सोद च्याँःसिद आदा होदा ओभाल्सिक उमी ज़ मारँःके। है जैद ओनैराए उकुइनी दोरैद दमस्कसल लाँकेर। ९स्रोंला भरी उमी मारँःद, ज़्याव ब माज़्युक्वो, री ब माओक्वो।

हननिया साऊलस ओदैसिउ

१०दमस्कसल येसुए ओपाँत बाज़्याव तोबो हननिया यादोज़्याव उलिज़्याव।

नोलाई दर्सनल परमेस्वरए, “अ हननिया,” है ओदोव ओथैक, “काराव प्रभु?” है दोक्यो। ११ परमेस्वरए फरी, “नँ सोद बजारलाव दाँव येम यादोज्याव दोहाल बाद यहूदाए उक्किमल पसिद, ‘तार्ससलाव साऊल काङ्क उलिज्याव?’ है यादोनाके। नो साऊलए भर्जा ज़ पोंखारिज्याव। १२ होए मनी दर्सनल नँलाई ज़ रँ:निज्याव। नँ ओल्योक बाद, नकुइ ओक्याँत नैद उमी सरै:द नएरिज्याव ब सतैद डाएके,” है दोक्यो।

१३ हा:त ज़ हननियाए, “ओहो प्रभु! आव है नलिज्याव मिँए उजँनी कुधु ज़ थैद डानै। नोए यरूसलेमलाव छैँव नमीरालाई बनै ज़ दुख याएज्याव दी। १४ भन आल मनी मुख्या पुजारीराए ल्योनी नमिन हाइज्याव भरिरालाई क्यो:न्या हक ब रैद नैव दी,” है ओदोक ते, १५ परमेस्वरए, “नँ घबानी, नो मिँलाई डाय़ेनत छाँतिद डानै। नोए डामिन छुत जातलावर, इस्राएलीर सोनो राजाराए ल्योदा सथैन्या ले। १६ नोए डामिनताव दैन्या दुख भरी नोलाई डा ज़ सतैदचान्या डाले,” है दोक्यो।

१७ है जैद हननिया ननी पुलुस्द परमेस्वरए ओपैव फ़िमक बाद, साऊलए ओक्याँत उकुइ नैद, “अ भाइ साऊल, नँ आदा येमत नहुज्याकाव

नड़ाक सरै:सिउ प्रभु येसुए डालाई नल्योदा नमी सरै:दचान्याए जूँनी सोनो छैँव पुरूसए घब्याल्क लिद उपरीनाव,” है ओदोव प्राइँना ज़, १८ साऊलए उमीनी सींका मिताव कातार तेद उमी रँ:के। हा:त ज़ ननी च्याँ:सिद रील सछैँसिनाद, १९ ज्यावर ज्याद ओसार् पुलुस्के।

साऊलए दमस्कसल येसुए ओपाँ ओरासथैव

साऊल येसुए ओपाँत लिज्यावरास जाँवा पै दमस्कसल लिद, २० धर्मसास्त्र फ़िम फ़िमल बाद, “येसु परमेस्वरए ओज़ा ज़,” लिद ओरासथैज्याव। २१ ओपाँ थैज्याव भरी बनै अचम्ब ताद, “आव ते नो यरूसलेमल येसुए उमिनत लिज्यावरालाई खेमो पैज्याव मिँ मा:क रो? आवए ते आल मनी नितावरालाई क्यो:द, मुख्या पुजारीराए याकचरील सेले सेले लाँन्याए जूँनी हुव ची सानी,” है लिकेर। २२ खाली साऊलए ओसक्ती भन ज़ घ्यो:नाद, “येसु परमेस्वरए ओज़ा खीस ज़,” लिद थ:रैद ओरा-योनी दमस्कसलाव यहूदीराए यायुँ बनै आँचानी पाँचा जैद याएक्यो।

२३ छींनी सर्बा कुधु दिन ओतावत नलाव यहूदीराए साऊललाई सै:न्या बुद्धी कलैकेर। २४ खाली नो पाँ



(६:२५)

ओल साऊलए मनी थैद ओनैङ्याव।
है जैद नोराए, ‘जुनी ब सैःन्या ज़’
लिद नो सहरनी पुलुस्न्या येम भरिल
पाल्यार नैद लाकनी रील वैसिद
यालिङ्याव। २५ खाली ओनैराए तछा
रील साऊललाई भेल भाःद नो सहर
घिरिसिउ भार्नातिन भरैकेर।

साऊल यरूसलेमदा ओल्द ओबाव

२६ साऊल दमस्कसनी पुलुस्द
यरूसलेमल बाद येसुए ओपाँत
बाङ्यावरास तखेप सरैस्सिउ
ओपैङ्याव। खाली नोलाई यारुँ
माहुप्द, “आव ते येसुए ओपाँत

साचो लिङ्याव माःक सानी,” है
लिद छेःकेर। २७ बारनाबासए वाङ़
साऊललाई पतिद येसुए ओसाचीराए
ल्योक लाँद, “आव मिँ दमस्कसदा
ओबाङ्याक प्रभु येसु ओल्योक
सरैःसिद, ओलस ज़ पाँके दी।
दमस्कसल मनी येसुए उमिन माछेःद
ज़ यासथैक्यो,” है यादोक्यो। २८ है
जैद साऊल नोरास यरूसलेम सहरल
आदा होदा लिद, नल ब प्रभुए उमिन
माछेःद ज़ यासथैक्यो। २९ खाली
नलाव ग्रीक खामनी पाँङ्याव
यहूदीरास याखर्लेसिक ते नोराए भन
साऊललाई सैःन्या निउँ याखिमङ्याव।

३० ओनैराए नो पाँ थैद साऊललाई ननी पलेःद कैसरिया सहरक पै सारैद, नकिन उभिम तार्सस सहरदा परींकेर।

३१ हाः बेलाक यहूदिया, गालील स्रोनो सामरिया खन्दलाव मन्दली जाँवा पै रान छानस लिन्या ताके। येसुए ओपाँत बाज़्यावर परमेस्वरलाई यार्युँल चेतैद, छैँव पुरूसनी यार्युँर भेँःद, भन ज़ याबा-नाज़्याव।


एनियास स्रोनो दोरकासनी

३२ पत्रुस नजीदा आदा होदा उलिज़्याक लुद्दा नाखारल परमेस्वरए उमिनत लिज़्यावरास दैसिनाके। ३३ नल तोबो एनियास यादोज़्याव उखँ उकुइ सिउ, आथ बर्स भरी घ्याँसिद लिज़्याव मिँलाई दैक्यो। ३४ पत्रुसए नोलाई रँःद, “अ एनियास, येसु स्त्रीसए नँलाई सगराँनिज़्याव। नँ सोद नतैर यारूल्के,” है ओदोव प्राइँना ज़, नो मिँ थर च्याँःसिके। ३५ नकाव लुद्दा स्रोनो सारोन नाखारल लिज़्यावराए निताव रँःद यार्युँ हुपद प्रभुए ओपाँत हुकेर।

३६ फरी योप्पा सहरल तोबो तबीता यादोज़्याव परमेस्वरए ओपाँताव मेंमा ओल्यो। ग्रीक खामनी होए उमिन दोरकास है यादोज़्याव। नो मेंमा बनै उयुँ गराँद प्राइँलाई सधैव ज़ ओरानैज़्याव। ३७ तछा नो मेंमा ओजोरो

हुद सिके। मिँराए ओमोरोलाई हुर्द ओतर्ताव ताललाव कुन्तील नैकेर।

३८ हाः बेलाक पै पत्रुस योप्पाकिन नजिकक लिज़्याव लुद्दाल उलिज़्याव सैँद नलाव यार्युँ हुबोराए नेब्लो मिँनिलाई, “जिन पत्रुसलाई, ‘हतप्त ज़ हुन्साँ दी’ है दोचिन,” है लिद किनाव यारापरीकेर। ३९ है जैद पत्रुसए नो पाँर थैद नोनिस बाके। योप्पाल याकेसो प्राइँना पत्रुसलाई नो सिउ मेंमालाई यानैज़्याव ओतर्ताव कुन्तील लाँकेर। नल नो नाखारलाव राँदी मेंमार दोरकासए जैद ओरायो क्वार सतैद याघज़्याव। ४० पत्रुसए नोरालाई लाँःदा परींद नो सिउए ओलापक उघुँदानी तिकिसिद परमेस्वरलाई पोँखारिद, सिउए ल्योदा भाल्सिद, “अ तबीता, सोनिके,” है ओदोव प्राइँना नो मेंमा सैँसिद भाल्सिके। पत्रुसलाई उरँःव प्राइँना सोद चुसिके। ४१ हाःत ज़ पत्रुसए नोलाई उकुइनी क्योःद सच्याँद, नो लाँःक लिज़्याव परमेस्वरए उमिनताव राँदी मेंमारालाई खुल्द सिउनी बाँचिउलाई सतैद याएक्यो। ४२ नो पाँ योप्पा भरिल प्राइँदा ज़ थास्द कुधुए प्रभुलाई यार्युँ हुपके। ४३ नो भरी ओतावत पत्रुस कुधु दिन पै योप्पाल तोबो स्यालोए येन दाज़्याव सिमोन यादोज़्यावए उभिमक ज़ लिके।



(१०:१०-१६)

परमेस्वरए ओचाकज्या कर्नेलियस
ओपाँव

१० हा: बेलाक कैसरिया सहरल तोबो कर्नेलियस यादोज्याव मिँ इतालिया फौजीलाव कप्तान उलिज्याव। २नो मिँ बनै धर्मी ओल्यो, उफिमलावरास परमेस्वरए ओमान नैज्याव मिँ ओल्यो। उयुँ गराँव ओतावए गरीबरालाई ज्यावर पैसार ब याव ज़ उलिज्याव, परमेस्वरलाई ब पोखारिउ ज़ ओनैज्याव। ३तछा लाकाव तीन बजेवाक कर्नेलियस भजल्किद परमेस्वरए ओचाकज्या

ओल्योदा उहुज्याव रँ:क्यो। नो चाकज्याए कर्नेलियसए उमिन ओहाइक ते, ४कर्नेलियस बनै छेद ओल्योदा लँ लँ चिऊद, “काराव प्रभु?” है दोक्यो। हा:त ज़ नो चाकज्याए, “परमेस्वरलाई नपोखारि-ज्याव सोनो गरीबराए ल्योदा नयुँ ग्राल्द नदोज्याव येनर परमेस्वरए ओल्योक केस्के। ५नँ तोबो नेब्लो नमींरालाई योप्पाल तोबो सिमोन पत्रुस यादोज्यावलाई चानाव यापरीके। ६नो मिँ समुन्द्र छचोकाव स्यालोए येन दाज्याव सिमोनए उफिमक लिज्या,” है दोक्यो।

७नो चाकज्या ओबाव छीनी, कर्नेलियसए ओयेन दाज्याव भरिरानी ओसेवा दोज्याव तोबो धर्मी उसिपाई सोनो नेब्लो ओनोकोरनिलाई खुल्द, ८नो चाकज्याए है ओदोव पाँ भरी नोरालाई है दाद योप्पादा यापरीक्यो।

पत्रुसए उरँ:व दर्सन

६हो परा:ती लाकाव बाह बजेवाक नो सोम्लो योप्पाल याकेस्नाव बेलाक ज़ पत्रुस थालात बाद परमेस्वरलाई ओपोंखारिज्याव। १०पत्रुस बनै करेद काँ ज्युव ओपैज्याव। खाली काँ ओमाताताव, भर याजैज्याव। हा:त ज़ पत्रुस भजल्किद, ११नम फैसिउ रँ:क्यो। नमतिन तोबो घ्यो:व फेरवा स्यासो चार चोंच्यानी क्यो:सिउ उभरिहुज्याव रँ:क्यो। १२नो फेरवाल जै जन्तुर, रूइज़ा वान्ज़ार सोनो बाज़ा बिज़ार यालिज्याव। १३हा:त ज़ तोबो गाए, “अ पत्रुस, नँ सोद आवरालाई सै:द याकैके,” है ओदोज्याव थैद, १४पत्रुसए, “माता प्रभु, निताव कैन्या माताज्यावर खर्क ज़ डामाकैए,” है दोक्यो। १५नो गा फरी ब हुद, “जोलाई परमेस्वरए चोखो थरैद नैव, होलाई नँ माछैव थरैन्या माताए,” है दोक्यो। १६निताव सोंखेप ओतावत नो फेरवा नमदा छींसिद मारै:के।

१७पत्रुस बनै अचम्ब ताद, “आव

डारँ:वए ओअर्थ काता ओताव?” लिद उयुँल ओखामिज्याक ज़ कर्नेलियसए ओरापरींव मिँराए, “सिमोनए उफिम काङ्क उलिज्याव?” लिद पैसी पैसी साँबिलाक हुकेर। १८साँबिलाक च्याँ:सिद, “सिमोन पत्रुस यादोज्याव आल मालिज्या?” है लिद क्रिकेर। १९हा:पै पत्रुस थालात चुसिद दर्सनलाव पाँ ओखामिज्याव। हा:त ज़ परमेस्वरए उपुरूसए, “सोम्लो मिँराए नँलाई खिमिज्यार। २०नँ च्याँ:सिद मेल भरिद नयुँ धुक्क जैद नोरास बान्के। नोरालाई डा ज़ डारापरींव,” है दोक्यो।

२१है जैद पत्रुस मेल भरिद नोरास दैसिद, “जेखिमनाज्याव मिँ डा ज़, काताए जूनी जेहुव?” है ओरादोक ते, २२नोराए, “तोबो कर्नेलियस यादोज्याव रोमी कप्तानए गेलाई उपरींसिउ। नो मिँ बनै धर्मी, परमेस्वरए ओमान नैदयाज्याव मिँ ज़, यहूदी भरिराए बनै चाव थरैज्यार। नोलाई परमेस्वरए ओचाकज्याए, ‘योप्पाल लिज्याव पत्रुसलाई नफिमक रैव यापरींके। नो मिँ नँलाई तोबो पाँ सथैनिरिज्याव’ है दोक्यो दी,” है यादोक ते, २३पत्रुसए नोरालाई उलिज्याव फिमक चावस नैद नल ज़ याबासैक्यो। हो परा:ती येसुए ओपाँत लिज्याव योप्पालाव ओनैरालाई तोबो नेब्लो लाँद नो खुल्ना हुवरास बाके।

पत्रुस कर्नेलियसस ओदैसिउ

२४ हो पराःती पत्रुस ओनैरास कैसरिया सहरल केस्केर। ओल कर्नेलियसए ते ओनैर सोनो ओक्याँदाडावरालाई उक्मिमक दुप्द पत्रुसलाई कींद यानैज्याव। २५ पत्रुस हुद क्मिमल उपसिज्याक कर्नेलियस ओल्योक दैसिनाद उखँत फुलुप्सिद धो दोक्यो। २६ पत्रुसए नोलाई सोचोइद, “डालाई धो दान्या माःक, च्याँःसिन्के। डा मनी नँ स्यासो मिँ ज़ ची,” है दाद, २७ पाँए पाँए क्मिमल निपसिक नल मिँर बनै कुधु दुप्सिद यालिज्याव रँःद, २८ नोरालाई, “गे यहूदीर जे मिताव छुत जातलावरास सिप लिन्या ब माताए, जेक्मिमल पसिन्या ब माताए लिन्या जे ज़ जेसैँज्या। हितावत ब परमेस्वरए डालाई, ‘सु मिँ ज़ माछैँव माले, अछुत्या ब माले’ है लिन्या सतैँदचाँक्यो। २९ है जैद डालाई जेखुल्नाक ‘माता’ है मालिद ज़ डाहुके। अब काताए जूँनी जेखुल्नाव, है दाँचिके,” है ओरादोक ते, ३० कर्नेलियसए, “चार दिन डादा लाकाव तीन बजेवाक डाक्मिमक परमेस्वरलाई डापोँखारिज्याक

तक तकौ क्वा क्वाइसिउ परमेस्वरए ओचाकज्या डाडाक सरैँःसिहुद, ३१ डालाई, ‘अ कर्नेलियस, परमेस्वर-लाई नपोँखारिज्याव सोनो गरीबराए ल्योदा नयुँ ग़ाल्द नदोज्याव येन परमेस्वरए रँःक्यो। ३२ नँ योप्पाल लिज्याव सिमोन पत्रुस यादोज्यावलाई नमीरालाई क्मिनाव यापरीके। नो मिँ समुन्द्र छचोकाव स्यालोए येन दाज्याव सिमोनए उक्मिमक लिज्या,’ है दाँक्यो। ३३ है जैद डा नँलाई हतप्त ज़ डाथानिके। नँ ब नयुँ नाद हुद नयासिके। गे परमेस्वरए ओपैनिउ पाँर थैँन्याए जूँनी आव डानैरास दुप्सिद गेले,” है दोक्यो।

पत्रुसए कर्नेलियसए उक्मिमल ओरासथैव

३४ हाःत ज़ पत्रुसए अइ लिद यासथैक्यो, “साचो ज़ ओल्यो डानैँ डामेर, परमेस्वरए जात रँःद ओमा-दोज्याव ओल्यो, डा मनी आछिमकिन ज़ डासैँके। ३५ जो जातल तादी ब, जो मिँए परमेस्वरए ओमान नैँज्याव, चाव येन ब दोज्याव, होलाई ज़ परमेस्वरए चाव रँःज्याव। ३६ गे उमीँ इस्राएलीरालाई ओज़ा येसु ख्रीसनी सखैँन्या येम ब सतैँदचासिक्यो —

नो प्राईं मिंराए गेप्रभु ज़ लिज़्या। ३७ रील सछैंज़्याव यूहन्नाए ओयेन उतुपैवकिन गालील खन्दनी सुरू ताद, यहूदिया खन्द भरिल रा·सिनाव पाँर जे मनी थैद जेनेज़्याखेहो। ३८ नो पाँर आव ज़ — परमेस्वरए नासरतलाव येसुए ओक्याँत छैँव पुरूस ब भाःदद्याद ओसक्तीर ब एक्यो। परमेस्वर ओलस ज़ उलिज़्यावए येसु आदा होदा बाद चाव येनर दाद याजोरो हुवर सोनो माचाव पुरूसए क्योःद ओरानैज़्यावरालाई ब ओरासगराँज़्याव। ३९ गे उसिसर फरी नो यरूसलेमल सोनो यहूदीराए यादेसलाव ओदोव येनरात ओसाचीर ताद गेले। नोलाई भन तछा कुसत तङ्गद सैःकेर। ४० हैदी ब उसिउ सोलात परमेस्वरए नोलाई सोचोइद गेल्योक सरैःदद्यासिक्यो। ४१ सरैःद ओरायो प्राईं मिंरालाई माःक, परमेस्वरए गे डादाकिनकाव रूजिद ओनैसिउ ओसाचीरालाई वाज़ ची। सैसिद ओसोव छींनी गेस सिप ज़ ज़्युक्यो, सिप ज़ ओक्यो। ४२ गेलाई ओसाचीर जैद, ‘जे प्राईं मिंरालाई डापाँ सथैद, ‘सिउ मासिउरालाई यान्याय फाल्न्या ओल परमेस्वरए ज़ डा ओज़ालाई जैद नैनाव’ लिद यारासथैनाच्यो,’ लिद गेलाई अर्थैसिक्यो। ४३ अगमबक्ता भरिराए मनी नो हरिज़्याव येसुए

उज्जनी ज़ पाँकेर। नोराए यापाँल मनी, ‘जोए नोलाई उयुँ हुपज़्या, हो नोए उमिननी ज़ ओपापर क्याल्सिद परमेस्वरस खैरिज़्या,’ है लिद लेर।”

छुत जातलावराए छैँव पुरूस यादैव

४४ पत्रुस आव पाँर ओपाँज़्याक ज़ नो ओपाँ थैज़्यावराए याक्याँत छैँव पुरूस हुके। ४५ नो पत्रुसस हुव येसुए ओपाँत बाज़्याव यहूदीराए, छुत जातलाव मिंराए याक्याँत मनी छैँव पुरूस उहुव रँःद, ४६ “नोराए ते छुत छुत खामनी पाँद, परमेस्वरए उमिन ची सघ्योःज़्यार!” है लिद अचम्ब ताकेर। हाःत ज़ पत्रुसए ओनैरालाई, ४७ “आवरालाई गे काराव रील सछैँसिन्या भैःद मायान्या? आवर मनी गे मिताव छैँव पुरूस दैवर ज़ लिज़्यार सानी,” है दाद, ४८ येसु खीसए उमिननी रील सछैँसिउ यापरीक्यो। नकिन कर्नेलियस ओनैरास, “गेस जाँवा पै ल्यो ताके,” है यारादोक ते, नोर जाँवा पै लिकेर।

पत्रुसए ओदोव येनर पलास्द
ओरायो

११ छींनी येसुए ओसाचीर सोनो यहूदिया खन्दलाव येसुए ओपाँत बाज़्यावराए, ‘छुत जातलावर मनी परमेस्वरए ओपाँत

हुकेर दी' लिन्या थैकेर। २ है जैद पत्रुस यरूसलेमल ओल्द ओबाक नलाव येसुए ओपाँत हुव यहूदीराए ओदोव येनर माभैःद, ३ “नँ काराव छुत जातलावराए ल्योक बाद नोरास सिप नज़्यु?” है यादोक ते, ४ पत्रुसए नोराए यापाँए ओअर्थ ओजरानी ज़ अइ लिद पलास्द याएक्यो, ५ “डा योप्पाल डालिज़्याक तछा परमेस्वरलाई डापोंखारिज़्याक, भजल्किद तोबो फेरवा स्यासो चार चोंच्यानी क्योःसिउ, नमतिन डाल्योक उभरिहुज़्याव डारँःके। ६ नोलाई लँ लँ चिऊद डानैज़्याक नल जै जन्तुर, रूइज़ा वान्ज़ार सोनो स्यार बाज़ार डारारँःके। ७ हाःत ज़ कातानी तोबो गाए, ‘अ पत्रुस, नँ सोद आवरालाई सैःद याकैके,’ है ओदाँज़्याव डाथैके। ८ डा फरी, ‘माता प्रभु, निताव कैन्या माताज़्यावर डासेत खर्क ज़ डामाभाःए,’ है डादोक ते, ९ नो गा फरी ब नमतिन हुद, ‘जोलाई परमेस्वरए चोखो थःरैद नैव, होलाई नँ माछैव थःरैन्या माताए,’ है दाँक्यो। १० निताव पाँर सोंखेप ओतावत नो फेरवा नमदा स्रेल्सिद मारैःके।

११ “हाःत ज़ डालिज़्याव भिम डाकाव साँबिलाक सोम्लो मिँर

हुद यालिज़्याव। नोर डाल्योक कैसरियानी परींसिउर याल्यो। १२ परमेस्वरए उपुरुसए फरी, ‘आवरास माअन्कनिद घबानी,’ है दाँक्यो। है जैद आव डास लिज़्याव छ जना डानैर लाँद नो परींज़्याव मिँए उक्मिल गेपसिके। १३ हो प्राइँना ज़ डादा उरँःव भरी गेलाई है दासिक्यो — नो मिँए उक्मिल परमेस्वरए ओचाकज्या च्याँःसिद उलिज़्याव रँःक्यो दी। नो चाकज्याए फरी, ‘योप्पाल लिज़्याव सिमोन पत्रुसलाई चानाव यापरीके। १४ नो सिमोन आल हुद नक्मिललावरास जेलाई अजम्बरी जुनी दैन्या पाँर सथैचिरिज़्याव,’ है दोक्यो दी।

१५ “है जैद डा नोरालाई परमेस्वरए ओपाँ डारासथैज़्याक ज़ किताव डादा छैँव पुरुस गे गेक्याँत उहुव, हिताव ज़ नोराए याक्याँत मनी हुके। १६ हाःत ज़ गेप्रभु येसुए डादा गे उसिसरालाई है ओदासिउ पाँर याका डादोके —

‘यूहन्नाए किताव जेलाई
रीनी ओसछैँचिउ,
हिताव ज़ छींनी तछा
छैँव पुरुसनी जेछैँरिज़्या।’

१७ है जैद परमेस्वरए गेलाई गेप्रभु येसु ख्रीसलाई गेयुँ सुहुपदकाव

ओयासिउ असिकर नोरालाई मनी ओरायोए डा परमेस्वरए ओयेनलाई कै जैद डार्वैधुरिऱ्याव?” है लिद पत्रुसए है ओरादोक ते, १८नोर सुए ज़ काता ज़ मापाँधुद परमेस्वरए उमिन सघ्योःदद्याद, “परमेस्वरए छुत जातलाव मिँरालाई मनी यायुँ याफकैवनी अजम्बरी जुनी दैन्या असिक ओरायो ओल्यो,” है लिकेर।

येसुए ओपाँ एन्तिओखियाल ओथासो

१६स्तिफनसए ओपालाकिनकाव यरूसलेमलाव येसुए ओपाँत हुवरालाई याखिरी यापसिक ख्वार फोनिके खन्ददा, ख्वार साइप्रस तापुदा, ख्वार एन्तिओखिया सहरदा धोःद खासिद लिनाकेर। नोराए नड मनी येसुए ओपाँ यारासथैक यहूदीरालाई वाज़ यारासथैऱ्याव। २०खाली नोराए याखानी साइप्रस तापु सोनो कुरेनी देसनी हुवर तोबो नेब्लोए एन्तिओखियाल बाद छुत जातलाव मिँरालाई मनी प्रभु येसुए ओपाँ यारासथैकेर। २१परमेस्वर नोरास उलिऱ्यावए बनै कुधुए यायुँ हुपद प्रभु येसुए ओपाँत हुकेर।

२२नो पाँर छीनी यरूसलेमलाव

मन्दलील मनी थास्द बारनाबास-लाई एन्तिओखियादा परींकेर। २३बारनाबास होड ओकेस्क परमेस्वरए नोराए याखार्ल ओदोव असिकर रँःद बनै खुसी ताके। नोरालाई, “प्रभुए ल्योदा जेयुँ थःरैद ओसत तारास्च्यो,” लिद यायुँ सभेःद याएक्यो। २४बारनाबास धर्मी, उयुँ हुबो, छैव पुरुसए ब्यालो मिँ ओल्यो। नोए ओपाँ थैद मिँ सर्बा माहोल्या ज़ येसुए ओपाँत चाःसिहुकेर।

२५नकिन जाँवाक बारनाबास तार्सस सहरल बाद साऊललाई खिम्नाक्यो। २६ओदैवत नोलाई मनी एन्तिओखियाल रैक्यो। नोनी नेब्लो बर्सदिन पै नल ज़ लिद मन्दलीलाव मिँरास खैद परमेस्वरए ओयेम कुधुलाई यारापैकिनी। नो एन्तिओखियाल येसुए ओपाँत बाऱ्यावरालाई हाःकिन यामिन ख्रीस्त्यान जैद याराएकेर।

२७हाः बेलाक यरूसलेमनी अगम-बक्तर तोबो नेब्लो एन्तिओखियाल हुकेर। २८नोरानी तोबो अगाबस यादोऱ्यावए छैव पुरुसनी, “संसार भरिल बनै घ्योःव अनिकाल हुरिऱ्या,” है लिद डादा ज़ पाँके। थिक है ओल्यो मिताव ज़ नो पाँ रोमी माहाराजा

क्लौदियसए ओपालाक योःके। २६ है जैद एन्तिओखियालाव यायुं हुबोराए यहूदिया खन्दल लिङ्याव यादाज्यु भाइरालाई सघैन्या युं दाद याधुवा भरी सु सु यापैसार स्योःद, ३० नो पैसा बारनाबास सोनो साऊलनी निकुइत यरूसलेम मन्दलीलाव सेररालाई परीद याराएकेर।

पत्रुस भयालखानानी उपुलुसो

१२ हाः बेलाक हेरोद राजाए मन्दलीलाव रूवा रूवा-रालाई क्योःद बनै दुख याएक्यो। २यूहन्नाए ओदाज्यु याकूबलाई ते भन खोच्योए पल्द सैःक्यो। ३यहूदीर ननी बनै खुसी याताव रँःद हेरोदए पत्रुसलाई मनी क्योःव यापरीक्यो। नो बेलाक माँदा भरेस ज़्यान्या पर्व ताद उलिङ्याव। ४पत्रुसलाई क्योःद, भयालखानाल भाःद सोह्व जना सिपाईराए याजिम्बाल नैद, ‘पर्व ओखेमोत ची जनताराए याडाक डासतैया ब’ है उलिङ्याव। ५पत्रुस भयालखानाल उलिङ्याक मन्दलीए नोए उजूनी परमेस्वरलाई बनै पोखारिउ ज़ यानैङ्याव।

६हेरोद राजाए जनताराए डाक पत्रुसलाई सतैव ओपैङ्याव ओङ्गालाव छचाम रील, पत्रुस भयालखाना जील नेब्लो सिपाईनी निखार्ल साँगलए

किसिउ स्याँद उलिङ्याव। ग्रामक मनी पाल्यार च्याँःसिद गुद यानैङ्याव।

७हाःत ज़ उमँःजानी परमेस्वरए ओचाकज्या सरैःसिद ओज़गैए भयालखानाल पलाँ जैद, पत्रुसलाई कोतैद, “सोद घल्सिन्के,” है दाद ओसोचोइव प्राईना ज़ ओसाँगलर यानी ज़ पलाःसिद तेकेर। ८हाःत ज़ नो चाकज्याए, “नवाँःफोर पोःसिद नपोलार जासिन्के,” है ओदोक ते, पत्रुसए हैज़ जैक्यो। नकिन, “नबर्की क्वाइसिद डाछींत हुन्के,” है ओदोक ते, ९पत्रुस लाँःदा पुलुस्द उछीं उछीं ज़ बाके। खाली उयुँल ते, ‘आव भरी भजल्किद डारँःङ्याव ज़ ताखेहो’ लिद नो साचो ज़ ओल्यो लिन्या ओमासैङ्याव। १०नोनी उस०कताव पाल्यालाई बलेद, फरी हुकिनकाव पाल्यालाई ब बलेद सहरल बाङ्याव भँए ग्रामक निकेस्क नो ग्राम ओलनी ज़ फैसिके। ननी पुलुस्द येमत निबाङ्याक नो चाकज्या उमँःजानी समैसिके।

११हाःत ज़ पत्रुसए ओचेत फर्किद, “साचो ज़ ओल्यो, परमेस्वरए डाल्योक ओचाकज्यालाई परीद ओयाँव ची ओल्यो। नोए डालाई राजा हेरोद सोनो यहूदीराए याजालनी जोगोइद ओपलेःनाव ची ओल्यो!” है लिके। १२है जैद आव पाँ भरी चेतैद

पत्रुस मरियमए उक्किमक बाके। नो मरियम मर्कूस यादोज्याव यूहन्नाए ओआमा ओल्यो। नल हो बेलाक कुधु मिँर दुप्सिद परमेस्वरलाई यापोँखारिज्याव। १३पत्रुस ग्रामक हुद कोतो कोतो ओजैक तोबो रोदा यादोज्याव नोकोर्नी मेंमाए ग्रामक चिऊनाक्यो। १४रोदाए पत्रुसए ओर्गा ओसरेसो प्राइँना ओरेंतए ग्राम माफैद भन किमल धों:नाद, “दे, पत्रुस हुद ग्रामक च्याँ:सिद ले,” है ओरादोक ते, १५प्राइँए, “काता नपाँज्याव निताव स्यावदिनी ब्यावदी?” है यादोक ते, नो लुजाए, “हो ज़ ब्याँ, हो ज़,” है यादोक्यो। नोराए भन, “उपुरूस नरँ:व ताखेहो,” है दोकेर।

१६ना: भरिल पत्रुस ग्रामक च्याँ:सिद कोतोका कोतो जैव ज़ ओनैज्याव। बल्ल नोराए ग्रामक बाद याफैनाक पत्रुसलाई रँ:द बनै अचम्ब ताकेर। १७पत्रुसए ‘भयाउँ तालिच्यो’ लिद उकुइए सान दाद परमेस्वरए भयालखानानी ओपले-काव पाँ भरी है यादोक्यो। नकिन, “आव पाँ भरी याकूब सोनो उपुर्काव गेनैरालाई मनी है यारादोच्यो,” है दाद ओल ननी पुलुस्द छुतड बाके।

१८हो परा:ती भयालखानाल ‘पत्रुस काना ओबाव’ लिद पाल्याराए याखार्ल राउँनी भयाउँ ताके।

१९हेरोदए उसिपाईरालाई नोलाई सापो ओरापरींक यामादैवए नो पाल्यारालाई तोबो तोबोनी खोले-द, नोरालाई सै:न्या सजा याएक्यो।

हेरोद राजा उसिउ

नकिन हेरोद राजा यहूदियानी पुलुस्द कैसरिया सहरल बाद नल ज़ उलिज्याव। २०हा: बेलाक तुरोस सोनो सीदोन सहरलाव मिँरास हेरोद बनै रसिद उलिज्याव। खाली नोराए याज्याव भरी हेरोदए ओपोनी उहुज्यावए नोराए होस सखैसिउ यापैँज्याव। है जैद याघेप्पार हेरोदए ल्योक हुद तोबो उयुँ हुबो ओकर्मचारी बलस्तसलाई याल्योदा जैद राजास पाँव यापैँज्याव। २१जलफल दान्या याथ-रैव छ्याम, हेरोद बनै तह महौ जैसिद उसिंहासनत चुसिद ओपाँ यासथैक्यो। २२ओपाँ थैज्यावराए, “आव पाँ ते मिँए ओपाँ मा:क, ईस्वरए ओपाँ ची,” है लिद बनै ज़ किकेर। २३हा:त ज़ हेरोद स०द परमेस्वरलाई ओमान नैद ओमायोए प्रभुए तोबो ओचाकज्याए फार्लाप फुर्लुप ओख्याक रूइद सिके।

२४परमेस्वरए ओपाँ भन ज़ बा:द प्राइँदा ज़ रा:सिनाके। २५बारनाबास सोनो साऊलनी यरूसलेम मन्दलीलाव पैसा भा:न्या नियेन निखेमोत, यूहन्ना

यादोज्याव मर्कूसलाई ब नीस ज़ लाँद
एन्तिओखियादा ओल्द बाकेर।

बारनाबास सोनो साऊलनिलाई
खतैद यारापरींव

१३ एन्तिओखियालाव मन्दलीए
खार्ल अगमबक्तार सोनो
परमेस्वरए ओपाँ पलास्ज्यावर
यालिज्याव। नोराए यामिनर आवर
ज़ — बारनाबास, काल्या यादोज्याव
सिमियोन, कुरेनीलाव लुकियस,
साऊल, सोनो ज़िम्ज़ाकिन ज़ हेरोद
राजास तोबो फ़िमल सिप हुर्किउ मनेन
याल्यो। २नोर तछा दुप्सिद, उपासिद
परमेस्वरलाई यापोंस्वारिज्याव बेलाक
छैव पुरूसए, “डा बारनाबास सोनो
साऊलनिलाई डाजूनी डानिउथैव येनत
जे ज़ नोनिलाई खतैद यारापरींच्यो,”
है यादोक्यो। ३है जैद नोर उपासिद
पोंस्वारिद नोनी निक्याँत याकुइ
नैदचाद हो येनत यारापरींकेर।

साइप्रसत येसुए ओपाँ ओथासो

४है जैद बारनाबास सोनो साऊलनी
छैव पुरूसए उनिखतैव येनत
बाकिनी। सिलुकिया सहर पै फ़रिद,
नकिन री जहाजल पसिद साइप्रस
तापुत बाकिनी। ५नल सलामिस सहर
निकेसोत यहूदीराए धर्मसास्त्र फ़िमल
बाद परमेस्वरए ओपाँ यारासथैकिनी।

नोनिलाई सघैन्या यूहन्ना ब
उलिज्याव।

६नो तापु भरिल तछचोनी ज़ दुलिद
पाफोस सहर याकेसोत नल तोबो बार-
येसु यादोज्याव यहूदी धामीस दैसिकेर।
नोए परमेस्वरए उमिन हाइद धुतनी
ओरापैज्याव। ७नो धामी तापुताव
हाकिम सर्गियस पौलुसए ओसेवात
उलिज्याव। नो हाकिम बनै ओगहक
ल्यो मिँ ओल्यो। नोए परमेस्वरए
ओपाँ थैन्याए जूनी बारनाबास सोनो
साऊलनिलाई ओल्योदा सथैना
निखुल्क्यो। ८खाली बार-येसु
यादोज्याव एलुमास धामीए (ग्रीक
खामनी एलुमासए ओअर्थ ‘धामी’ ज़)
नोनी निपाँलाई वैंद, हाकिमलाई नो
पाँनी तँदा बलेव ओपैज्याव। ९है जैद
साऊल (छीनी उमिन पावल) छैव
पुरूसए ब्याल्द, नोलाई लँ लँ चिऊद,
१०“ए सैतानए ओज़ा, धुतैद ज़्याज्याव,
साचो पाँ भरी वैंज्याव, नँ खा पै
परमेस्वरए दाँव ओयेमलाई गाँत्या गुँती
जैव नपैज्याव? ११नँ इताव नदोवए
आछिमकिन परमेस्वरए ओसजा
नक्याँत हुद जाँवा पै नमी लाम लुम
ताद निमीए ओज़लाँ ब रँ:न्या नमाले,”
है ओदोव प्राइँना ज़ उमी मारें:द छाम
छाम ताद दोरैन्या मिँ खिम्क्यो। १२नो
हाकिमए निताव रँ:द परमेस्वरए
ओपाँत अचम्ब ताद उयुँ हुप्के।

एन्तिओखियाल येसुए ओपाँ ओथासो

१३नकिन पावल ओनैनिस री जहाजल पसिद पाफोसनी बाद पामफिलिया खन्दलाव पर्गा सहरल केस्केर। नकिन ज़ यूहन्ना नोनिस भाःसिद यरूसलेमदा ओल्द बाके। १४पावल स्नो नो बारनाबासनी ते पिसिदिया खन्दलाव एन्तिओखियाल बाद न्नासिन्या छ्याम ओतावए धर्मसास्त्र भिमल बाद चुसिकिनी। १५नो भिमलाव घेप्पाराए मोसाए ओकानुन स्नो अगमबक्ताराए यापाँर यारासथैवत बारनाबास स्नो पावलनिलाई, “अ भाइनी, जिनस यूँ सभेःन्या काता पाँर उलिकिन गेलाई सथैव ताके,” है यारादोकेर।

१६हाःत ज़ पावल याड़ाक च्याँःसिद उकुइए सान दाद, “अ इस्राएली डानैर स्नो परमेस्वरए ओमान नैज्याव छुत जातलाव मिँर, आदा थैचिके। १७इस्राएली जातलावराए गेपरमेस्वरए गेसाखा पुर्खारालाई छाँतिद, इजिपल खासिद यालिज्याव बेलाक नोरालाई बनै ज़ सबा-द, ओल उकुइनी ननी पले-द दोरैद

यालाँक्यो। १८माचाव यादिउदीलाई ब चालीस बर्स भरी सहिद बनल पाथस यानैक्यो। १९नोरालाई लिन्या पो जैदचान्याए जूँनी कनान देसलाव सात राज्यारालाई यामिन समैदचाद नो पो यामीं ज़ जैद याएक्यो। २०नो भरी चार सय पचास बर्सवा लागिके।

“नकिन समूएल अगमबक्ताए ओपालाक पै नोरालाई याराज्या चलैन्याए जूँनी परमेस्वरए न्याधिसर खतैद याएक्यो। २१हाः बेलाक इस्राएलीराए, ‘गेलाई चलैन्या तोबो राजा जैदचासिके,’ है यादोक ते, परमेस्वरए नोरालाई तोबो साऊललाई याराजा जैद याएक्यो। नो मिँ बेन्यामीन थरलाव कीसए ओज़ा ओल्यो। नो मिँए चालीस बर्स पै याराज्या चलैद याएक्यो। २२छीनी परमेस्वरए नोलाई पले-द दाऊदलाई याराजा जैद याएक्यो। होए उजूँनी ओल परमेस्वर ज़ अइ लिद उलिज्याव, ‘यिसैए ओज़ा दाऊदलाई डायुँलाव मिँ ज़ थ-रैद डानै। नोए डायेन भरी चावस ज़ दान्या ले।’ २३परमेस्वरए नो मिँए ओथोनी ज़ गे इस्राएलीरालाई ओय्नाकालाव पाँर सयो-दचाद गेलाई तोबो बाँचैज्याव

१३:१७ प्रस १:७; १२:५१ १३:१८ गन्ती १४:३४; ब्य १:३१ १३:१९ ब्य ७:१; यहो १४:१
१३:२० न्याय २:१६; १ समू ३:२० १३:२१ १ समू ८:५; १०:२१
१३:२२ १ समू १३:१४; १६:१२; भज ८६:२०

परींद्यासिक्यो। नोए उमिन येसु ज़। २४खाली नो ओमाहुवा पै, रील सछैँज्याव यूहन्नाए इस्राएलीरालाई, 'जेपापलाई रास्द रील सछैँसिहुचिके,' है लिद ओरासथैँज्याव। २५नोए ओयेन ओखेम्नावत, 'जे ख्वाराए डालाई ख्रीस है जेदाँज्याखेहो। डा हो माःक, नो डाकिन छीनी हरिज्या। डा ते नोए ओपोलाए ओत्रें पलाःन्या स्यासो ब डामाले,' है ओरादोज्याव।

२६“जे डादाज्यु भाइर, अब्राहामए ओथोर सोनो परमेस्वरए ओमान नैज्याव छुत जातलाव मिँर, आव है डादाचिज्याव परमेस्वरनिकाव बाँचैँन्या पाँर गे प्राइँए गेजूनी ज़ लिज्या। २७यरूसलेमलाव मिँर सोनो गेघेप्पाराए भन नो येसुलाई ज़ मासरेस्थुकेर। नासिन्या छचाम साताकाव तखेप दुप्सिद अगम-बक्ताराए यापाँर प्ररिद ब नो पाँए ओअर्थ माप्राल्धुकेर। है जैद भन येसुलाई सैःन्या थःरैद, मासैँद ज़ नो पाँर सयोःकेर। २८नोलाई सैःन्या खत कान्त ज़ यामादैज्यावत ब, 'सैःन्या ज़' लिद पिलातसलाई सूँपिकेर। २९नोए उजूनी धर्मसास्त्रलाव सर्सिउ पाँ भरी प्राइँ ज़ यासयोःवत ओमोरोलाई क्रुसतिन हाइद खादरल भाःकेर।

३०खाली परमेस्वरए भन नोलाई सिउनी सोचोइक्यो। ३१सिउनी ओसोवत ओलस गालील खन्दनी यरूसलेमल हुव ओनैँराए ल्योक कुधु दिन पै सरैँःसिके। नोर ज़ आज्याल ओसाचीर लिज्यार।

३२“है जैद गेसथैँचिज्याव चाव था आव ज़ — गेसाखा पुर्खारालाई ओरायो ग्राका भरी ३३येसुलाई सिउनी सोचोइद गे याथोराए गेक्याँत ज़ सयोःदद्यासिक्यो। किताव भजन पोस्तोकोलाव दुईल सर्सिउ लिज्या, हिताव ज़ योःके। नलाव सर्सिउ आव ज़,

‘नँ डाजा ज़,

आछिम ज़ नँलाई डाजमैँनिके।’

३४फरी धर्मसास्त्रल परमेस्वरए येसु-लाई सिउनी सोचोइद फरी ब सिउ यान्या माले लिन्या डादाकिन ज़ ओरैँःज्याव। तोथो आव ज़,

‘दाऊदलाई डायो ग्राकालाव

थःरिउ छैँव असिकर,


जे छीनीकावराए जेक्याँत ज़

सयोःदद्यान्या डाले।’

३५फरी तोथोल अइ लिद ब सर्सिउ लिज्या,

‘अ परमेस्वर, नँ छैँव नज़ालाई,

खादरल चिउ यान्या नमाले।’



पावल उस०कताव ओबाव

ओसाचीर १३:४-१४:२७

३६ “ओल दाऊद ते उप्रिरील वाज्ज लिद, परमेस्वरए ओयेनर सयोःद उजिज्यु बाज्युराए मां:ती सिद खादरल बाद चिके। ३७ खाली परमेस्वरए येसुलाई सिउनी ओसोचोइवए ओक्यां माचिए। ३८ है जैद डादाज्यु भाइर, आव ब सैंच्यो — आव है डादाचिज्याव येसुनी, जेदोव पापए सजा क्याल्सिज्या। ३९ मोसाए ओकानुननी उस्किउ गोमादैवए जो

मिंए येसुलाई उयुं हुज्या, नो पाईनी ज़ फुर्सुल ताद परमेस्वरस खैज्या। ४० है जैद आव पांत जोगोइसिच्यो, मानी अगमबक्ताराए यापां जे जेक्यांत ज़ तान्या ले। नो पां आव ज़, ४१ ‘अ डापांलाई हसैद ल०ज्यावर, अचम्ब ताद नास ताच्यो। जे जेपालाक ज़ अचम्बलाव येन तोबो डादोरिज्या।

नो येन सुवाराए है यादाचिदी ब
पतिन्या जेमाले।’ ”

४२ पावल सोनो बारनाबासनी
धर्मसास्त्र फिमनी पुलुस्द निबाज्याक
नो थैवराए, “आव जिनपाँ फरिकाव
साताक मनी गेलाई सथैव ताके,”
है यारादोकेर। ४३ भाःसिद निबावत
मनी कुधु यहूदीर सोनो छुत जातलाव
यहूदी धर्म मानिज्यावर नीस ज़ बाकेर।
है जैद पावल सोनो बारनाबासनी,
“आव जेथैव पाँत थ०रिद परमेस्वरए
ओयाचिउ असिकलाई तारास्च्यो,” है
लिद यारासथैकिनी।

४४ नो हुव साताकाव नासिन्या
छचाम सहरलाव लिज्याव जाँकोसै
मिँर परमेस्वरए ओपाँ थैना हुकेर।
४५ यहूदीराए, मिँर नाः कुधु याहुज्याव
रँःद यामी तूद पावलए ओपाँ
पल्लतैदचाव पैद नोलाई थल्केर।
४६ नाःत ज़ पावल सोनो बारनाबासनी,
निपाँ छत्कैद है यारादोकिनी,
“परमेस्वरए ओपाँ थैन्या मौका डादा
ते जे यहूदीरालाई ज़ याव ताके है
गिन्लिज्याव। खाली जे नो पाँलाई
भीःद अजम्बरी जुनी दैन्या मौका
जेमाभैःवए, गिन ते छुत जातलाव
मिँरालाई गिन्रासथैनारिज्या। ४७ आवए

उजँनी परमेस्वरए धर्मसास्त्रल मनी
अइ लिद ले,

‘बाँचैन्या डापाँ मानुवाताव
काना कुनीड पै
जेनी ज़ ओकेस्क लिद,
छुत जातलाव मिँराए ल्योदा ब
ज़गै मिताव जैद डानैचिए।’ ”

४८ नो परमेस्वरए ओपाँ थैद नकाव
लिज्याव छुत जातलाव मिँर बनै रेंद
नो पाँए उजँनी धन्या धन्या है लिकेर।
है जैद परमेस्वरए अजम्बरी जुनील
बान्या थ०रैद ओरानैज्याव भरिए नो
पाँत यायुँ हुप्के।†

४९ है जैद परमेस्वरए ओपाँ नो खन्द
भरिल प्राइँदा ज़ ओरा०सिनाज्याव।
५० खाली नलाव यहूदीराए माभैःद
याधर्म मानिज्याव धनी मेंमार सोनो
सहरलाव घेप्पारालाई मचैद पावल
सोनो बारनाबासनी निखिरी पसिउ
परींद यापोनी याराखेपैकेर। ५१ है
जैद पावल सोनो बारनाबासनी,
माभैःज्यावरालाई परमेस्वरए ज़ न्याय
ओदोवक लिद निखँताव गालो धुइरो
ब सीद ख्यानैदचाद आइकोनियन
सहरदा बाकिनी। ५२ परमेस्वरए
ओपाँत हुव भरी ते छैँव पुरूसए
ब्याल्द रेंव ज़ यालिज्याव।

† १३:४८ छुत बुफिन्या — अजम्बरी जुनील बान्या थ०रैज्याव भरिए नो पाँत यायुँ हुप्के।

१३:४१ हब १:५ १३:४७ यसै ४२:६; ४६:६

आइकोनियनल येसुए ओपाँ ओथासो

१४ आइकोनियन सहरल मनी पावल सोनो बारनाबासनी यहूदीराए धर्मसास्त्र फिमल बाद परमेस्वरए ओपाँ निरासथैक चावस पलास्द निरायोए यहूदीर सोनो छुत जातलावर बनै कुधु ज़ नो पाँत यायुँ हुप्के। २खाली माभैःज्याव यहूदीराए ते छुत जातलाव मिंरालाई मचैद, ‘नोनी निपाँ ताथैच्यो’ लिद यार्नाल भाःद याराएकेर। ३हितावत मनी नोनी नो सहरल कुधु पै लिद प्रभुए ओक्याँत ख्यासिद माछेःद ज़ ओपाँर यारासथैकिनी। परमेस्वरए मनी थैज्यावराए यायुँल यालो ओपाँर साचो ज़ थःरैदचान्याए जूनी पावल सोनो बारनाबासनी निक्ख्याँनी अचम्बलाव येनर सरेसर ब दाव उनिएज्याव। ४है जैद नो सहरलाव मिँर नेभा ताकेर। तभा यहूदीराए ल्योदा यालिज्याव, तभा पावल सोनो बारनाबासनी निल्योदा यालिज्याव। ५छींनी नलाव छुत जातलाव मिँर सोनो यहूदीर याघेप्पारास तोबो बुद्धी कलैद नोनिलाई बीज्यात जैद लुँए भेःव यापैँज्याव। ६नोनी था निदैवत ननी धोँःद लुकोनिया खन्दलाव लुस्त्रा सोनो दर्बी सहर जीदा बाकिनी। ७नल मनी परमेस्वरए ओपाँ यारासथैकिनी।

लुस्त्राल येसुए ओपाँ ओथासो

८लुस्त्राल तोबो मिँ जर्मननी ज़ उखँ सिउ चुसिद उलिज्याव। नो मिँ खर्क ज़ ओमाबाधुज्याव। ९पावलए नल मनी परमेस्वरए ओपाँ ओरासथैज्याक नो मिँए बनै धिद ओथैज्याव। पावलए नोलाई रँःद सगराँसिन्याए जूनी उयुँ उहुप्ज्याव मिताव रँःद, १०बनै चोइस, “नखँर पलास्द च्याँःसिन्के,” है ओदोव प्राइँना नो मिँ थर च्याँःसिद आदा होदा लिके। ११नलाव माहोल्याराए पावलए ओदोव येन रँःद अचम्ब ताद, लुकोनिया खामनी, “देवतार मिँ जैसिद गेल्योक ज़ याहुव ओल्यो,” है लिद किकेर। १२बारनाबासलाई ‘जिउस’ देवता है दोकेर, पावललाई परमेस्वरए ओपाँ सथैज्याव मुख्या मिँ ओतावए ‘हर्मस’ देवता है दोकेर। १३जिउस देवताए ओथान सहर लापक उलिज्याव। है जैद नो देवताए उपुजारीए माहोल्यारास खैद, वासर जास्सिउ बहरर सहरलाव ग्रामक रैद, नोनिलाई पुजा दाव पैँकेर।

१४हाःत ज़ बारनाबास सोनो पावलनी ‘अइ ची याजैज्याव ओल्यो’ लिन्या सैद, हार मानिद निक्वार चीए चीए माहोल्याराए याखार्ल बाद, १५“काता जेजैसिज्याव इताव? गिन

मनी जे स्यासो मिंनी ज़ ची। गिन गिन्सथैचिज़्याव चाव पाँनी ते इताव माचाहिउ पुजा दान्यालाई रास्द, नाम नम स़ोनो नलाव लिज़्याव भरी जैज़्याव, जींदो परमेस्वरलाई मानिन्या लिज़्या। १६ परमेस्वरए डादाकिन जे मिताव छुत जातलाव मिंरालाई जेमन लागिउदा बाव ओयाचिज़्याव। १७ हैदी मनी ओललाई सरेस्न्या सरेसर प्राईलाई ज़ याएक्यो। जेल्योदा मनी दाइनो ताद नम सवादद्याद, ज़्यावर सपरीदचाचिज़्याव। जेचाहिज़्याव भरी जोरैदद्याद जेफू तसी जैदद्याद जेरुँर होलाँ जैदचाचिज़्याव,” है लिद, १८ है निरादोज़्यावत मनी नो माहोल्यारालाई पुजा दान्यात धो वैव ताकिनी।

१९ छींनी एन्तिओखिया स़ोनो आइकोनियनलाव यहूदीराए लुस्त्राल हुद नलाव माहोल्यारालाई मचैद, पावललाई लुँ लुँए भेःद लल्यातोरो जैद, ‘उसिउ ची ओल्यो’ लिद सहरकिन पाखाड ख्याकेर। २० खाली नो सहरलाव येसुए ओपाँत बाज़्यावर पावलए ओल्योक गुरिगाँ यादुप्सिक, पावल सोद यास ज़ सहरदा बाके। हो पराःती बारनाबासस दर्बी सहरदा बाकिनी।

सिरियालाव एन्तिओखियादा निओलो

२१ पावल स़ोनो बारनाबासनी दर्बील मनी चाव था सथैद येसुए ओपाँत हुन्यार कुधु ज़ याराजैकिनी। नकिन फरी ओल्द लुस्त्रा स़ोनो आइकोनियन सहरलाव घ्याँ पिसिदिया खन्दलाव एन्तिओखियादा बाद, २२ नलाव, परमेस्वरए ओपाँत हुवरालाई, “परमेस्वरए ओपाँ तारास्च्यो,” लिद यारुँर सभेःदद्याद, “परमेस्वरए ओराज्याल कुधु दुखर सहिद वाज़ केस्न्या गेले,” लिद यारासम्जैकिनी। २३ सु सु यामन्दलील सेवा चलैन्त्या सेरर खतैदद्याद नोराए जूनी उपासिद पोंखारिद यारुँ यासुहुबो परमेस्वरए ओपासल याराभाःकिनी। २४ नकिन पिसिदिया खन्दलाव घ्याँ बाद पामफिलिया खन्दल केस्किनी। २५ नल पर्गा सहरल बाद फरी ब परमेस्वरए ओपाँ यारासथैकिनी। ननी पुलुस्द अतालिया सहरल बाकिनी। २६ नकिन फरी री जहाजल पसिद सिरिया खन्दलाव एन्तिओखियादा बाकिनी। डादा नो एन्तिओखियानी ज़ नोनिलाई परमेस्वरए ओपाँ सथैन्त्याए जूनी नलाव यारुँ हुबोराए परमेस्वरए

ओपासल भाःद परींद यारानैज्याव। है जैद नो येन सयोःद नल ज़ ओल्किनी। २७ पावल स़ोनो बारनाबासनी नल निकेसो प्राइँना मन्दलीलाव मिँरालाई दुप्द परमेस्वरए नीस ओदोव येन भरी है यारादोकिनी। “परमेस्वर गिनस गिनस बाद छुत जातलाव मिँरालाई पाला ओराज्याल पसिन्या येम फैद याएक्यो,” है लिन्या पाँर ब यारासथैकिनी। २८ नोनी नो सहरल यायुँ हुबो निनैरास कुधु पै लिकिनी।

पुराँदो चलनत याखर्लेसिउ

१५ पावल स़ोनो बारनाबासनी एन्तिओखियाल निलिज्याक यहूदिया खन्दनी तोबो नेब्लो मिँर हुद नलाव येसुए ओपाँत हुवरालाई, “जे मोसाए ओकानुननी क्यालन्या सरेस जेमाजैसिवा पै अजम्बरी जुनी दैन्या जेमाले,” है यारादोज्याव। २ नो पाँत पावल स़ोनो बारनाबासनी नोरास माखैद बनै खर्लेसिकेर। छीनी नलाव यायुँ हुबोराए या यामीर तोबो नेब्लो जैद पावल स़ोनो बारनाबासनिस यरूसलेमदा बान्या थःरैकेर। ‘होड बाद येसुए ओसाचीर स़ोनो मन्दलीलाव स़ेररास दैसिद आव पाँए उजूनी सल्ला दाव ताके’ लिद,

३ मन्दलीए नोरालाई यापरींक्यो। नोर ननी पुलुस्द फोनिके स़ोनो सामरिया खन्दलाव घ्याँ बाद, ‘छुत जातलाव मिँर मनी परमेस्वरए ओपाँत हुज्यार’ है लिन्या थार यारासथैक, नलाव यादाज्यु भाइर बनै ज़ रेकेर। ४ यरूसलेम याकेसोत नलाव मन्दलीलावर यास़ेररास स़ोनो येसुए ओसाचीराए नोरालाई यारासुम्केर। पावल स़ोनो बारनाबासनिस परमेस्वरए ओदोव येन भरी है यारादोकिनी।

५ निताव पाँ थैद येसुए ओपाँत हुव फरिसीर ख्वा ख्वार जाँ माभैःद च्याँःसिद, “छुत जातलाव मिँर मनी परमेस्वरए ओपाँत याहुव प्राइँना क्यालन्या सरेस जैसिद, मोसाए ओकानुन ब सयोःव ज़ परींव ताके,” है लिकेर।

यरूसलेमलाव स़ेरराए याथःरैव पाँ

६ है जैद नो पाँ थःरैन्याए जूनी येसुए ओसाचीर स़ोनो मन्दलीलाव स़ेरर दुप्सिद, ७ कुधु यापाँवत पत्रुस याडाक च्याँःसिद अइ लिद यासथैक्यो, “अ डादाज्यु भाइर, आदा थैचिके। छुत जातलाव मिँरालाई चाव था सथैद परमेस्वरए ओल्योदा जैन्याए जूनी

डालाई जेखानीं डादाकिन ज़ खतैद ओनैनाज्याव जे ज़ जेसैज्या। ८ प्राइँए यायुँलाव पाँ सैज्याव परमेस्वरए गेलाई ओयासिउ मिताव ज़ नोरालाई मनी छैँव पुरुस याद उमीर ज़ ओराजैव सतैद याएक्यो। ९ सोनो परमेस्वरए जातए ओलेखा मानैद नोरालाई मनी यायुँ यासुहुबोनी ज़ यायुँर सछैँद याएक्यो। १० है जैद काराव गेसाखा पुर्खाराकिन ज़ गेमासहिधुहुज्याव चलनर भन नोरालाई दाव परींद परमेस्वरलाई जाँचिन्या? ११ नोराए मिताव, गे मनी प्रभु येसुए गेल्योदा उयुँ ओगराँवनी वाज़ अजम्बरी जुनी दैन्या गेताज्या,” है ओरादोक ते, १२ नो पाँत प्राइँ ज़ थाम थुम ताकेर।

नकिन पावल सोनो बारनाबासनी निपाला ताद छुत जातलाव मिँराए याखार्ल नोनी निक्याँनी ज़ परमेस्वरए दाद ओरायो अचम्बलाव येनर है निरादोक ते नोराए बनै ज़ धिद थैकेर।

१३ नोनी निपाँ ओखेमोत याकूबए अइ लिद यासथैक्यो, “अ डादाज्यु भाइर, आदा थैचिके। १४ सिमोन पत्रुसए ओयाःनी जे ज़ थैद जेनै — परमेस्वरए छुत जातलाव मिँराए याखार्नी मनी ओल उमीर ओराजैज्याव ओल्यो। १५ नो पाँत अगमबक्तराए

यापाँ ब चबनै खैज्या। नोराए यापाँ इताव सर्सिउ लिज्या,

१६ नाः भरी ओतावत डा फरी हुद, चितराँ पुतराँ ताव दाऊदए ओराज्या बनैदयान्या डाले। ताव ओभार्नारालाई फरी रिम्द, माव उमिन फरी ब नैदयान्या डाले।

१७ नाःत ज़ मानुवाताव मिँर प्राइँए ज़ परमेस्वरलाई खिम्न्या लेर। डामिनत डाराछाँतिउ छुत जातलाव मिँर ब डाल्योदा हुन्या लेर।

१८ आव पाँर परमेस्वरए नाम नम ओजैवकिन ज़ गोइँद ओनैज्याव।’

१९ “है जैद डादाज्यु भाइर, डा डाबिचार इताव लिज्या — नो परमेस्वरए ल्योदा हुज्याव छुत जातलाव मिँरालाई माचाहिउ वैन्या मिताव पाँर भाःदयान्या माःक।

२० बुरू नोरालाई गेल्योनी चिथी तोबो परींद, नो चिथील ‘खाली अडग्यालाई चरैःसिउ ज़्यावर ताज्युच्यो, ओधें फर्लेद सैःसिउ स्याकरी ताकैच्यो, भी ताज्युच्यो, पातज्या पातर्नी ब ताजैसिच्यो’ है लिन्त्या पाँर वाज़ सर्द परींव ताके। २१ नोरालाई मोसाए

ओकानुन थैऩ्या मौका ते भाःकिन ज़ उलिज़्याव। नोए ओपाँ सहर सहरल धर्मसास्त्र फ़िम फ़िमक नासिन्या छचाम सथैव ज़ यारानैज़्यार,” है लिद यासथैक्यो।

२२ है जैद येसुए ओसाचीर, ओपाँत बाज़्याव सेरर सोनो मन्दलीलाव मिँर प्राइँ तोबो पाँत खैद यासकाव नेब्लो मिँनिलाई पावल सोनो बारनाबासनिस एन्तिओखियादा बान्या याराखतैकेर। नोनी घेप्पा मान दैव मिँनी ज़ निल्यो, निमिन बारसाबास यादोज़्याव यहूदा, सोनो सिलासनी। २३ नोनी निकुइत इताव चिथी परींकेर,

“गे येसुए ओसाचीर सोनो मन्दली-लाव लोम्बा जेदाज्यु भाइराए गेल्योनी, जे एन्तिओखिया, सिरिया सोनो किलिकियाल लिज़्याव छुत जातलाव गेदाज्यु भाइरालाई आव चिथी परींद गेयाचिज़्या।

२४ गेल्योनी बाव तोबो नेब्लो मिँर जेल्योड हुद यापाँए जेयुँलाई आँचा पाँचा जैद याचिकेर दी लिन्या गेथैके। निताव सल्ला गे गेल्योनी हुव माःक, यानी ज़ ची। २५ है जैद गे भरी दुप्सिद तोबो नेब्लो गेमींरालाई गेयुँलाव पावल सोनो बारनाबासनिस जेल्योदा परींन्या गेथःरैके। २६ नो पावल सोनो बारनाबासनी गेप्रभु

येसु ख्रीसए ओयेनत निक्याँलाई मया मारिद निजिउ ज़ थॉंद नैनी। २७ है जैद नोनिस यहूदा सोनो सिलासनिलाई मनी गेरापरींज्या। नोनी ज़ आलाव सर्सिउ पाँर साचो गेनी ज़ हुव लिद जेलाई है दान्या लिनी। २८ अब गे भरी दुप्सिद छैव पुरूसनी जे दान्या येन आव ज़ थःरैद गेने — उपुर काता कर ज़ माले, खाली आव खास पाँर भन्या भैःव ताके — २९ अडग्यालाई चरैःसिउ ज़्यावर ताज्युच्यो, भी ताज्युच्यो, ओधें फर्लेद सैःसिउ स्याकरी ताकैच्यो, पातज्या पातर्नी ब ताजैसिच्यो। आव मादान्या येनर जेमादोकिन जेलाई चाव तान्या ले। गेपाँ आःज़, जेरो।”

३० नो चार जना यारापरींवर एन्तिओखियाल बाद नलाव मन्दली-लाव मिँरालाई दुप्द नो चिथी याराएकेर। ३१ नो युँ सभेःन्या चिथी दैवराए प्राइँलाई परिद यारासथैक यायुँ होलाँ ताद प्राइँ ज़ बनै रेकेर। ३२ यहूदा सोनो सिलासनी मनी अगमबक्ता नितावए नोनी मनी नलाव मिँरालाई परमेस्वरए ओपाँर सथैद यायुँर बनै सभेःद याराएकिनी। ३३ नो सहरल सर्बा ज़ निल्योत नलाव यायुँ हुबोराए फरी यरूसलेमदा चावस

यारापरींकेर। ३४ [खाली सिलासए नल ज़ लिन्या चाव डम्सिके।] ३५ पावल सोनो बारनाबासनी ते एन्तिओखियाल ज़ लिद छुत कुधुरास खैद परमेस्वरए ओपाँ पैद यारासथैकेर।

पावल सोनो बारनाबासनी निभाःसिउ

३६ छींनी तछा पावलए बारनाबास-लाई, “गिन नो परमेस्वरए ओपाँ गिन्रासथैव पो पोड बाद नलाव दाज्यु भाइर किताव यालिज़्याव फरी तखेप चिऊना गिन्बा,” है ओदोक ते, ३७ बारनाबास मनी भैःद निनै यूहन्ना यादोज्याव मर्कूसलाई ब लाँव ओपैज़्याव। ३८ खाली पावलए ते माभैःद, “आव येनत ओजाँगर माहुद गिनलाई पामफिलियाल रास्द ख्यानैव मिँलाई गिन काराव लाँन्या?” है दोक्यो। ३९ है जैद नोए उजूंनी नोनी जात्त ज़ माखैद भाःसिकिनी। बारनाबासए मर्कूसलाई ओलस ज़ लाँद री जहाजल पसिद साइप्रस तापुदा बाकिनी। ४० पावलए ते सिलासलाई रूजिद ओनै जैक्यो। नलाव लिज़्याव दाज्यु भाइराए नोनिलाई उयुँ ग्राल्ज़्याव परमेस्वरए ओपासल भाःद चावस यारापरींकेर। ४१ नोनी सिरिया सोनो

किलिकिया खन्दल बाद नलाव मन्दलीलाव मिँरालाई पाथ पारैद यायुँर सभैःद याराएकिनी।

पावल सोनो सिलासनी तिमोथीलाई नीस निलाँव

१६ नकिन पावल सोनो सिलासनी दर्बी सोनो लुस्त्रा सहरल बाकिनी। नल परमेस्वरए ओपाँत तोबो उयुँ हुबो तिमोथी यादोज्याव उलिज़्याव। होए ओआमा पाला उयुँ हुबो यहूदिनी ओल्यो, ओबाबु ग्रीक जातलाव ओल्यो। २ लुस्त्रा सोनो आइकोनियनलाव यायुँ हुबोराए तिमोथीलाई बनै चाव मिँ थःरैद यानैज़्याव। ३ पावलए मनी नो मिँलाई ओलस बान्या ओनै जैव ओपैज़्याव। खाली नजीदाडाव यहूदीराए ग्रीक जातलाव ओबाबुलाई प्राइँए ज़ यासरेस्ज़्याव। है जैद नोरालाई सभैःन्याए जूंनी तिमोथी-लाई क्याल्न्या सरेस जैदिक्यो। ४ हाःकिन नोनी सहर सहर, पो पोड ‘यरूसलेमलाव येसुए ओसाचीर सोनो नलाव सेरराए याथःरैव पाँर दोच्यो’ लिद याराअर्थैकिनी। ५ ननी ज़ मन्दलीर यायुँर भन ज़ हुप्नाद, या ब भन ज़ बाःनाकेर।

पावलए दर्सनल माकेदोनियालाव
मिँलाई उरँ:व

६ छैँव पुरूसए पावल सोनो सिलासनिलाई एसिया खन्दल परमेस्वरए ओपाँ सथैन्या उनिवैवए फ्रिगिया सोनो गलातिया खन्दलाव घ्याँ बाकिनी। ७ नकिन माइसिया खन्द निकेसोत बिथिनिया खन्दल बाव निपैँज्याक येसुए उपरूसए फरी ब निवैँक्यो। ८ है जैद माइसियानी पुलुस्द त्रोआस सहरल बाकिनी।

९ नल निलिज्याक तछा रील पावलए दर्सनल माकेदोनियालाव मिँलाई च्याँ:सिद उलिज्याव रँ:क्यो। नोए, “जिन माकेदोनिया खन्दल हुद गेलाई ब परमेस्वरए ओपाँ सथैव ताके,” है लिद बिन्ती दोक्यो। १० है जैद पावलए निताव दर्सन उरँ:व छीनी, “परमेस्वरए गेलाई नदा मनी चाव था सथैना उपरीसिज्याव ओल्यो,” लिन्या थ:रैद हतप्त ज़ बान्या गेभा:सिके।

फिलिप्पीलाव लिदियाए
परमेस्वरलाई उयुँ उहुबो


११ त्रोआसकिन री जहाजल पसिद एकसब्दचा ज़ सामोथ्राके तापुदा गेबाके। नकिन हो परा:ती नियापोलिस सहरदा गेबाके। १२ नकिन बल्ल माकेदोनिया खन्दलाव तोबो

फिलिप्पी यादोज्याव मुख्या सहरल गेकेस्के। नलाव मिँर जाँकोसै रोमी जातलावर यालिज्याव। नो सहरल सर्बा ज़ गेलिके।

१३ नासिन्या छचाम सहरलाव ग्रामनी पुलुस्द, ‘भै छचोक पोंखारिन्या पो लिज्याखेहो’ लिद नदा ज़ गेबाके। नड दुप्सिद लिज्याव मेंमारालाई मनी परमेस्वरए ओपाँ गेरासथैके। १४ नोरास परमेस्वरए ओमान नैज्याव थिआतीरा सहरनी हुव तोबो लिदिया यादोज्याव मेंमाए बनै धिद ओथैज्याव। नो मेंमाए घ्यामो क्वाए बेपार ओदोज्याव। प्रभुए नोलाई पावलए है ओरादोज्याव पाँर बुफिन्या युँ जैदिक्यो। १५ ओल सोनो उफिमलाव भरी रील सछैँसिद, “डालाई परमेस्वरलाई उयुँ हुबो मेंमा जेथ:रैनाकिन डा डाफिमक हुद गेस ज़ ल्यो ताके,” है दाद गेलाई मालाँद मातान्या जैक्यो।

पावल सोनो सिलासनिलाई
भयालखानाल याराभा:व

१६ फरी तछा नो पोंखारिन्या पोदा गेबाज्याक तोबो जोखना चिऊन्या पुरूस दैव बाँदानी लुज़ास गेदैसिके। नो लुज़ाए, ओल्योक हुज्यावरालाई हुन्या पाँर पाँदचाद ओघरपतीरालाई कुधु पैसा कमैद ओराएज्याव। १७ हो छचाम नो मेंमा गेछीं गेछीं हुद बनै



पावल दोस्रोलाव ओबाव

ओसाचीर १५:३६-१८:२२

चोइस, “आवर माहान परमेस्वरए ओनोकोरर ज़। यासथैचिज़्याव पाँर अजम्बरी जुनील सकेस्न्या पाँर ज़,” है लिद उक्किज़्याव। १८कुधु दिन पै निताव क्रिउ ज़ उलिज़्याव। तछा पावलए उयुं कोला कोला ताद नो मेंमाए ल्योदा भाल्सिद ओक्याँताव चरिउ पुरूसलाई, “डा नँलाई येसु ख्रीसए उमिननी है डादींज्या, नोए ओक्याँतिन पुलुस्द बान्के,” है ओदोव प्राइँना ज़ पुलुस्द बाके।

१६नो लुज़ाए ओघरपतीराए निताव रँ:द, ‘गेपैसा हुन्या येम सूइदयासिकिनी’ लिद पावल सोनो सिलासनिलाई क्यो:द बजार खार्ल सेले सेले अदालतल लाँद, २०हाकिमराए याड़ाक सच्यौँद, “आव यहूदीनी गेसहरलाव मिँरालाई गरबर याराजैज्यानी। २१गे रोमीराए गोकानुनस माखैव, गोमाभै:ज्याव रितिथितीर यारापैज्यानी,” है यारादोकेर।

२२हाःत ज़ नलाव माहोल्याराए नोनी निक्क्याँत भोरोःसिउ पैकेर। है जैद हाकिमराए नोनी निक्कार सिउःदद्याद स्याकोराए रीःव यारापरीकेर। २३बनै ज़ प्रोद भयालखानाल भाःद पाल्यालाई बनै चावस गुव परीकेर। २४है जैद नो पाल्याए नोनिलाई प्राईरानी उजीलाव कुन्तील भाःद, निखँत हला भाःद निक्क्यो।

२५आधा रील पावल सोनो सिलासनी पोंखारिद परमेस्वरए उमिनत भजन निगैज्याक, नीस लिज्याव उपुर्काव कैदीराए याथैज्याव। २६हाःत ज़ उमँःजानी बनै घयोःव भोंचालो हुद भयालखाना भरी बनै थोनोःसिद ग्रामर ब यानी ज़ फैसिकेर। कैदीराए यासाँगलर ब पलाःसिकेर। २७हाःत ज़ नो पाल्या सैसिद ग्राम भरी फैसिउ रँःद, “ओहो! कैदीर पुलुस्द याधोंःव ची ओल्यो,” लिद ओखोर्च्यो हाइद ओल ज़ सैःसिउ ओपैज्याव। २८पावलए निताव रँःद बनै चोइस क्रिद, “थारे थारे, तासैःसिनी। गे प्राई आल ज़ गेलिज्या,” है ओदोक ते, २९नो पाल्याए ओनैरालाई बत्ती रैव परीद, बनै भुम भुम गूद भयालखानाल धोंःनाद पावल सोनो सिलासनी निखँत फुलुप्सिके। ३०नोनिलाई ननी पलेःद, “दे डाधर्मीनी, डा कै जैद बाँचिन्या ओताव?” है उनिदोक ते,

३१“प्रभु येसुलाई नयुँ सुहुप्द ओक्याँत नख्यासिकिन नँ सोनो नक्किम-लावरास बाँचिद अजम्बरी जुनी दैन्या जेले,” है दाद, ३२नो पाल्यालाई उक्किमलाव भरिरास परमेस्वरए ओपाँ यारासथैकिनी। ३३निताव आधा रील मनी नो पाल्याए पावल सोनो सिलासनिलाई निघाइर छेद निक्क्यो। हो प्राईना ज़ पाल्या उक्किमलावरास रील सछैँसिद, ३४पावल सोनो सिलासनिलाई उक्किमक लाँद, ज़्यावर जैद निक्क्यो। उक्किमलावरास परमेस्वरए ल्योदा यायुँ यासुहुबोए बनै रेंकेर।

३५नम छेलाला उसँक हाकिमराए, “पावल सोनो सिलासनिलाई निरास्के,” लिद सिपाईरालाई भयाल-खानादा है दानाव यारापरीकेर। ३६है जैद पाल्याए नो था दैद पावललाई, “हाकिमराए जिनलाई ‘रास्न्या’ लिद था परीद नैर। है जैद जिन आनी पुलुस्द चावस बाचिन्के,” है उनिदोक ते, ३७पावलए नो सिपाईरालाई, “गिन रोमी नागरिकनिलाई मनी नाःकाव जनताराए डाक अनाकल ज़ गिनलाई प्रोद गिनन्याय माफाल्द ज़ भयालखानाल भाःसिन्केर। अब कै जैद गिनलाई अलगज़ा पलेःव यापैज्याव? माता। पलेःन्या ताकिन याज़ ओपलेःसिहुरक,”

है ओरादोक ते, ३८नो सिपाईराए हाकिमरालाई है यारादोनाकेर। नोराए नोनी रोमी नागरिकनी निल्यो लिन्या यामासैज्याव। है जैद नो पाँ थैद, हाकिमर बनै छेद,† ३९याज्ज निल्योक बाद माफी निद लाँ:दा पलेद, “गेसहरलाई रास्द बाचिन्के,” है दाव ज़ यारानैकेर। ४०है जैद नोनी भयालखानानी पुलुस्द लिदियाए उक्किमक बाद येसुए ओपाँत बाज्यावरास फरी तखेप दैसिद यायुँर सभै:दचाद बाकिनी।

पावल सोनो सिलासनी थेसलोनिकेदा निबाव

१७ नकिन पावल सोनो सिलासनी अम्फिपोलिस सोनो अपोल्लोनिया सहरलाव घ्याँ बाद थेसलोनिके सहरल केस्किनी। नल यहूदीराए धर्मसास्त्र फिम तोबो उलिज्याव। २पावलए डादाकिनकाव ओदोज्याव मिताव ज़ सोंसाता पै नासिन्या छचाम नो याक्किमल बाद धर्मसास्त्रलाव सर्सिउ पाँर पलास्दचाद, ३“ ‘ख्रीस दुखर सहिद, सिद सैसिउ परिन्त्या ज़’ लिद भा:किन

ज़ धर्मसास्त्रल सर्सिउ उलिज्याव,” है दाद थऱैद याएक्यो। फरी, “आव है डादाचिज्याव येसु ज़ नो ख्रीस,” है मनी यादोक्यो। ४नो पाँत रूवा रूवा यहूदीर यायुँ हुप्द पावल सोनो सिलासनिस खैकेर। परमेस्वरए ओमान नैज्याव कुधु ग्रीकर सोनो सहरलाव यामिन थासो मेंमाराए ब यायुँ हुप्के।

५छुत यहूदीर ते यामी तूद बजार जीलाव अइज्ज दुलिरिज्याव सँधुवारालाई दुप्द नो सहरल खैलानी बैला जैव यारापरीकेर। नोर पावल सोनो सिलासनी निलिज्याव तोबो यासोनए उक्किमक बाद नोनिलाई पलेव पैकेर। ६खाली नोनिलाई मादैद भन यासोनलाई रूवा रूवा यायुँ हुबोरास क्यो:द अदालतदा सेले सेले लाँद, “नो सहर सहर दुलिद खैलानी बैला जैज्यावनी गे गेसहरल ब निहुवत, ७यासोनए ओल्योक बासिउ निएक्यो दी। नोर माहाराजाकिन प्राई तँदा जैसिद नोराए याराजा येसु ज़ है लिज्यार,” है लिद क्रिउ ज़ लिकेर। ८नोराए यापाँ थैद सहरलाव मिँर सोनो याघेप्पार बनै ज़ मचिकेर। ९है जैद

†१६:३८ रोमी नागरिकरालाई रोमी कानुननी न्याय यामादोवा पै सजा यान्या ओमाताज्याव, भयालखानाल भा:न्या ब ओमाताज्याव। है जैद नो हाकिमराए या यान्याय मनी ताए सै लिन्या ओछचास उलिज्याव।

यासोन सोनो ओनैरालाई धरौतील
यारारास्केर।

पावल सोनो सिलासनी बेरियादा निबाव

१० नम ओभ्याक नलाव दाज्यु
भाइराए पावल सोनो सिलास-
निलाई हतप्त ज़ बेरिया सहरदा
यारापरींकेर। नल निकेसोत फरी
ब यहूदीराए धर्मसास्त्र फिमक
बाकिनी। ११ बेरियालाव यहूदीर ते
थेसलोनिकेलाव मिँराकिन यातह
ल्योर यालिज़्याव। नोराए पावल
सोनो सिलासनी निपाँत बनै ज़ धिद
थैद, 'आवनी निपाँ साचो मालिज़्या'
लिद दिनकाव ज़ धर्मसास्त्रल
याचिऊज़्याव। १२ है जैद नोर येसुए
ओपाँत कुधुए यायुँ हुप्के। नोरास
यामान ल्यो ग्रीक खेपा मेंमार ब सर्बा
ज़ याल्यो।

१३ खाली थेसलोनिकेलाव यहूदी-
राए, 'पावलए बेरियाल मनी
परमेस्वरए ओपाँ यासथैज़्याव दी'
लिन्या थैद, नदा मनी माहोल्यारालाई
यारामचैनाकेर। १४ है जैद नलाव
यायुँ हुबोराए पावललाई जोगोइन्याए
जूनी समुन्द्र छचोक पै सारैनाकेर।
सिलास ते तिमोथीस नल ज़ लिकिनी।
१५ है जैद पावललाई सारैना बावराए
एथेन्स सहरक पै लाँकेर। ननी ओल्द

बाव यापैंज़्याक पावलए नोराए
कुइत सिलास सोनो तिमोथीनिलाई,
'ओताकिन चाँदो ज़ हुचिन' लिन्या था
परींक्यो।

पावल एथेन्सल

१६ पावलए एथेन्स सहरल सिलास
सोनो तिमोथीनिलाई कींद उनिनैज्याक
नलाव कुधु अडग्यार रँ:द उयुँर
माचाव दाद, १७ धर्मसास्त्र फिमल
बाद नलाव यहूदीर सोनो परमेस्वरए
ओमान नैज्याव ग्रीकरास कुधु ज़
याखर्लेसिज़्याव। बजार जील आदा
होदा लिज़्यावरास मनी दिनकाव ज़
ओपाँज्याव। १८ तछा इपिक्युरी सोनो
स्तोइकी यादोज्याव धर्म मानिज़्यावर
हुद ओपाँ थैद खर्लेसिनाकेर। पावलए
येसुए ओपाँ सथैद, 'सिउनी सैसिके'
है लिन्या पाँर ओरासथैवए नोर ख्वा
ख्वाराए, "काता ओपाँज्याव, निताव
त्यात्यानी तितिव?" है यालिज़्याव।
ख्वाराए फरी, "काताडाव देवताराए
यापाँ ओपाँज्याव ताक्या?"
है ब यालिज़्याव। १९ छीनी नोराए
अरियोपागस कचरीक लाँद, "नो
सा:रो पाँए ओअर्थ खास काता
उलिज़्याव? गेलाई है दासिके।
२० गे अनवाज्यासो ज़ गेथैज्या।
ओअर्थ पलास्दचाद फरी ब तखेप थैव
गेदैक," है दोकेर। २१ नो एथेन्सलाव

मिँर सोनो यासहरल छुतनी हुद लिङ्यावराए पाला जम्मा साःरो पाँर थैन्यात वाज़ लहर यादोङ्याव।

२२ है जैद अरियोपागस कचरीक पावल प्राइँए याड़ाक च्याँःसिद, “अ एथेन्सलाव मिँर, जे धर्म खिन्न्यार जेलिङ्याव ओल्यो डामीए ज़ रँःद डानैचिए। २३ जेसहरलाव पुजा दान्या पोर आदा होदा डालिक तोबो थानत, ‘सुए ज़ यामासरेस्ताव ईस्वर’ सर्सिउ उलिङ्याव डारँःके। डा है डादाचिङ्याव परमेस्वर नो मासरेस्द जेमानिङ्याव ईस्वर ज़। २४ प्राइँ जैङ्याव परमेस्वर नाम नमलावराए गेडैताव ओतावए कुइए जैसिउ मन्दिरल मालिधुइ। २५ होलाई मिँए ल्योनी काता ज़ खाँचो ब माले। भन गेलाई चाहिङ्याव भरी होए ओल्योनी ज़ हुङ्या। आव गेजिउ ब होए ओल्योनी ज़, गेस० ब ओल भाःद ओयासिउ ज़। २६ तोबो मिँए ओक्याँनी ज़ आव मानुवाताव प्राइँ जातलाव मिँरालाई याजैक्यो। नोरालाई सु सु लिन्या यापो, सु सु याबेला ब ओल ज़ थःरैद याएक्यो। २७ है जैद ‘डालाई छाम छाम जैद तादी ब कसा खिम्द मादैनार’ है लिद ओल ज़ इताव जैक्यो। हैदी ब परमेस्वर गेकिन

तादाड माले। २८ गे होए उकुइत ज़ ताद ओलनी ज़ गेबाँचिङ्या, ओलनी ज़ गेचलिङ्या। जेसकाव सैन्याराए मनी, ‘गे ओल ओज़ार ज़ गेलिङ्या,’ है लिद लेर।

२९ “है जैद गे परमेस्वरए ओज़ार गेताकिन, कै जैद ओल ते सीं लुँ ओताङ्याव? सुन चाँदीए जैसिउ अङ्ग्या ते अइज़ मिँए युँ स्यानी जैसिउ ची। ३० ड़ादाकिन परमेस्वरलाई मासरेस्दकाव अन्नाकलाव गेदोव भरी ते आथ पाला पै गेचार ताके। आकिनी ते परमेस्वरए प्राइँनिकाव मिँरालाई ‘निताव माचाहिउ येन भरी रास्द डाल्योदा हुचिके,’ है दासिङ्याव। ३१ मानुवाताव मिँराए न्याय फाल्न्या ब ‘आव छचाम ज़ तारिङ्या’ लिद थःरैद नैव। सतस न्याय फाल्न्या मिँ ब ‘आव ज़’ लिद प्राइँए याड़ाक सिउनी सोचोइद थःरैद याएक्यो,” है यादोक्यो। ३२ ‘सिउनी ओसोचोइव’ है ओरादोव याथैक ख्वा ख्वार सास्केर। ख्वाराए फरी, “छीनी ब तछा नपाँ थैव गेदैक,” है दोकेर।

३३ है जैद पावल ननी पुलुस्द ओबाक, ३४ ख्वा ख्वार ओल्योदा जैसिद ओपाँत यायुँ हुप्के। नोरानी अरियोपागस कचरीलाव

तोबो दियनुसियस ओल्यो, तोबो दामारिस यादोज्याव मेंमा ब ओल्यो। नोनिस छुतर ब याल्यो।

पावल ओनैरास कोरिन्थल याबाव

१८ नकिन पावल एथेन्स सहरलाई रास्द कोरिन्थ सहरदा बाके। ^२होड बाद तोबो पोन्तस खन्दल जर्मिउ अकिलास यादोज्याव यहूदीस दैसिकिनी। ओज्याए उमिन प्रिस्किला। माहाराजा क्लौदियसए यहूदी भरिरालाई रोम सहरनी ओरापलेवए नोनी ज्या-री भर ज़ इतालिया देसनी कोरिन्थल हुद निलिज्याव। ^३नोनी नियेन ब पावलए ओयेन स्यासो पाल जैन्या ओतावए, पावल नोनिस लिद यायेन ब सिप ज़ दोकेर। ^४साताकाव तखेप नासिन्या छचाम धर्मसास्त्र फिमल बाद यहूदीर स्नो नो ग्रीकरास खर्लेसिद सभैःन्या ओपैज्याव।

^५छीनी सिलास स्नो नो तिमोथीनी पावलए ल्योक माकेदोनिया खन्दनी निहुवत पावलए ओध्यावना परमेस्वरए ओपाँ सथैन्या वाज्ज जैद, यहूदीरालाई 'येसु ज़ पापनी रास्ज्याव खीस' लिद साची ओराएज्याव। ^६नोर पावलए ओपाँर माभैःद ओपाँलाई थल्द बीज्यात जैव

यापैवए पावलए ओक्वाताव गालो धुइरोर याङ्काक थरैदद्याद, "जेपाप भरी जे जेडैत ज़ ओताक। जे नो पाँ जेमाभैःव प्राईना फुर्सुल डाताके। अबकिन डा छुत जातलावरालाई ची डारासथैनारिज्या," है दाद, ^७ननी पुलुस्द धर्मसास्त्र फिम लापकाव तीतस युस्तसए उफिमक बाके। नो मिँ ब परमेस्वरए ओमान नैज्याव ज़ ओल्यो। ^८धर्मसास्त्र फिमलावराए याघेप्पा ब तोबो क्रिस्पसए उफिमलाव भरिरास परमेस्वरए ओपाँत यायुँ हुपके। कोरिन्थलाव छुत छुतराए मनी परमेस्वरए ओपाँ थैद, यायुँ हुपद रील सछैसिकेर।

^९तछा रील पावलए दर्सनल प्रभु ओपाँज्याव रँःक्यो। प्रभुए, "पावल, नँ माछेद ज़ आव सहरल डापाँ सथैव ज़ घरानैयो, चिम दान्या माःक। ^{१०}डा नँस ज़ डालिज्या। सुए ज़ नँलाई कैज्ज जैन्या मालेर। आव सहरल डामीर कुधु ज़ तान्या लेर," है दोक्यो। ^{११}है जैद पावल नो सहरल अथार मैना लिद परमेस्वरए ओपाँ पलास्द ओराएज्याव।

^{१२}अखैया खन्दल गलियोन हाकिम उलिज्याव बेलाक, यहूदीर पावलकिन तँदा जैसिद पावललाई क्योःद अदालतदा लाँद, ^{१३}"आव मिँए परमेस्वरए ओसेवा तँदा बङ्गैद मोसाए

ओकानुनकिन छुत येम यापैऱ्याव,” है लिकेर। १४ पावलए जवाप याव ओपैऱ्याक ज़ गलियोनए ओल ज़, “अ यहूदीर, आव मिँए मादान्या येनर ओदोव ताकिन डा जेपाँ सहिद डायाचिखेहो। १५ खाली जे जेधर्म रोक मेक ताद, काता काताराए यामिनर ओतोसिक जे ते जम्मा इसिउ वाज़ जेपैऱ्या। डा निताव पाँ कै जैद थैन्या? जे ज़ सैच्यो,” है दाद, १६ अदालतनी यापले-क्यो। १७ हाःत ज़ भन नोराए धर्मसास्त्र फ़िमलाव याघेप्पा सोस्थेनेसलाई क्योःद अदालत डाक ज़ प्रोकेर। खाली गलियोनए घाइ ज़ मारादोक्यो।

परमेस्वरए ओपाँ एफिससल सुरू ओताव

१८ पावल कोरिन्थ सहरल सर्बा ज़ लिद यायुँ हुबोराए ल्योनी बिदा निद, ‘सिरिया खन्ददा ओल्द बान्या’ लिद री जहाजल पसिके। ओलस अकिलास सोनो प्रिस्किलानिलाई ब निलाँक्यो। नोकिन डादा कोरिन्थ लापकाव किंक्रिया सहरल किज्या भाःद ओचेम ब एन्क्यो। १९ नकिन री जहाजल एफिसस सहर पै बाद अकिलास सोनो प्रिस्किलानिलाई

नल ज़ निख्यानैक्यो। ओल ते जाँवा पै वाज़ लिद धर्मसास्त्र फ़िमल बाद यहूदीरास खर्लेसिकेर। २० नकिन नोराए, “गेस ज़ जाँवा पै ल्यो ताके,” है यादोक ते, पावलए माभैःद, २१ “परमेस्वरए उयुँ ओताकिन फरी डाहुया ज़,” है दाद री जहाजल पसिद एफिससनी बाके।

२२ सिरिया खन्दलाव कैसरियाल केस्द जहाजतिन भरिद यरूसलेम पै बाद नलाव मन्दलीस दैसिद एन्तिओखियादा बाके। २३ नल जाँवा लिद गलातिया सोनो फ़िगिया खन्द जीलाव पो पोक लिऱ्याव येसुए ओपाँत बाऱ्याव भरिरास दैसिद परमेस्वरए ओपाँत यायुँ सभैःद याएक्यो।

अपोल्लोस एफिससल ओबाव

२४ अलेक्जेन्द्रिया सहरलाव तोबो अपोल्लोस यादोऱ्याव यहूदी एफिससल केस्हुके। नो मिँए ओपाँ बनै डमो, धर्मसास्त्रलाव पाँ ब बनै ओसैऱ्याव। २५ प्रभुए ओपाँ ब सर्बा ज़ सिऊसिद बनै जाँगरस येसुए ओपाँ सथैद चावस ज़ पलास्द ओराएऱ्याव। खाली यूहन्नाए ओरासछैँऱ्याव वाज़ ओसैऱ्याव। २६ नोए धर्मसास्त्र

फिमल बनै घ्योःव युँस परमेस्वरए ओपाँ ओरासथैज्याव। अकिलास सोनो प्रिस्किलानी नोए ओपाँ थैद नोलाई निफिमदा लाँद येसुए उजूनी ओमासैज्याव पाँ भरी पलास्दिक्नी।

२७नकिन अपोल्लोस अखैयादा बान्या युँ दोक्यो। है जैद नलाव यायुँ हुबोराए उयुरँ सभैःदद्याद, ‘आव मिँलाई चावस नैच्यो’ लिद होडाव यायुँ हुबोरालाई तोबो चिथी परींद याराएकेर। अपोल्लोस होड केस्द परमेस्वरए उयुँ ओगराँवनी यायुँ हुबोरालाई कुधु ज़ यासघैक्यो। २८प्राइँए याड़ाक यहूदीराए यापाँ पल्लैदद्याद, ‘येसु ज़ परमेस्वरए खतैद उपरीव खीस’ लिद धर्मसास्त्रनी थःरैद याएक्यो।

पावल एफिससल ओल्द उहुव

१९ अपोल्लोस कोरिन्थल उलिज्याक पावल रूनिकाव घ्याँ हुद एफिसस सहरल केस्हुके। नल रूवा रूवा येसुए ओपाँत बाज्याव-रास दैसिद, २“जे येसुए ओपाँत जेहुव बेलाक छैँव पुरूस दैद जेमानै?” है ओरादोक ते, नोराए, “छैँव पुरूसए उमिन आःपै गेमाथैताए,” है दोकेर। ३नकिन पावलए, “हिताव ताकिन ते, जे काताए ओपाँनी जेसछैँसिउ की?” है ओरादोक ते, “गे ते यूहन्नाए

ओपाँनी गेसछैँसिउ ची,” है दोकेर। ४है जैद पावलए याबिरैव भरी चावस पलास्दद्याद, “रील सछैँज्याव यूहन्नाए मिँरालाई यादोव पापनी यायुँ फकैँदद्याद ओलकिन छीनी हुज्याव येसुए ल्योदा यायुँ सुहुपदचान्याए जूनी ओरासछैँज्याव ची,” है ओरादोक ते, ५नोराए निताव पाँ थैद प्रभु येसुए उमिननी ज़ सछैँसिकेर। ६नकिन पावलए याक्याँत उकुइ नैद ओरायो प्राइँना छैँव पुरूस याक्याँत हुद नोर छुत छुत खामनी ब पाँकेर, छैँव पुरूसनी अचम्बलाव पाँर ब पाँकेर। ७नोर बाह जनावा याल्यो।

८नकिन सोमैना पै पावलए धर्म-सास्त्र फिमल परमेस्वरए ओराज्या-लाव पाँर सथैद नोरास खल्लैसिद नोरालाई सभैःन्यात बनै ज़ धामा दोक्यो। ९हितावत मनी रूवा रूवाराए परमेस्वरए ल्योदा यायुँ जात ज़ माफकैँद, भन ज़ एकोहोज्यासो जैसिद माहोल्याराए याड़ाक येसुए ओपाँ बले-व पैकेर। है जैद पावल येसुए ओपाँत हुव भरिरास ननी भाःसिद हाःकिन तुरान्नस इस्कुलल यादुप्सिज्याव। १०नेरिम भरी नल दुप्सिद एसिया खन्द भरिल लिज्याव यहूदीर सोनो छुत जातलाव मिँराए परमेस्वरए ओपाँ थैन्या मौका दैकेर।

मन्तर तन्तरलाव यापोस्तोकोर

याराख्याव

११ परमेस्वरए पावलए ओक्यांनी अचम्बलाव ओयेनर सतैद ओरा-एज्याव। १२ क्वार रैद पावललाई छापो परींद याजोरो हुवर लाँद याराएक, नो याजोरो हुवर यागराँ-ज्याव, माचाव पुरूसर ब पुलुस्द याबाज्याव।

१३ यहूदीराए याखार्ल मनी माचाव पुरूसर पले-न्यार यालिज्याव। नोराए माचाव पुरूसरालाई प्रभु येसुए उमिननी पले-न्या धामा दाद, “गे है गेदाचिज्या, पावलए ओरासथैज्याव येसुए उमिननी जे पुलुस्द बाचिके,” है यारादोज्याव। १४ तोबो स्केवास यादोज्याव यहूदी मुख्या पुजारीए सात भाइ ओजाराए मनी निताव येन यादोज्याक, १५ नो माचाव पुरूसए, “येसुलाई डासरेस्ज्या, पावललाई मनी डासरेस्ज्या, जेलाई ते डामासरेस्चिए,” है दाद, १६ नो माचाव पुरूसए क्योःद ओनैज्याव मिँए नोरालाई खपद हारैद, नोर नो भिमनी नाङग्या पात्या, भीघर्यामनी मघर्यामोर ताद पुलुस्द धोंःकेर। १७ एफिससल लिज्याव भरिराए, यहूदीर सोनो छुत जातलावर, आव पाँर थैद बनै ज़ छेःकेर। है जैद प्रभु

येसुए उमिन बनै घ्योःद ओमान ब रहिके।


१८ प्रभु येसुए ओपाँत हुवर मनी कुधुए डादाकिनकाव माचाव यायेनर प्राइँए याडाक मामोंद ज़ यापाँज्याव। १९ डादाकिन मन्तर तन्तर दाज्यावराए ते यापोस्तोकोर रैद दुपद प्राइँए याडाक ज़ यारामुकेर। नो यारामुव पोस्तोकोराए याएः याजाँचिक चाँदीए सिक्का पचास हजारा ओल्यो। २० है जैद परमेस्वरए ओपाँ प्राइँनी प्राइँनी ज़ घ्योःद आदा होदा बनै ज़ उफीजिज्याव।

२१ आव भरी ओतावत पावलए उयुँल, माकेदोनिया सोनो अखैयालाव घ्याँ बाद फरी यरूसलेमदा बान्या थःरैक्यो। ‘हुकिन छीनी रोम सहरदा मनी बाव ताके’ है उलिज्याव। २२ है जैद ओसेवा दाज्यावनी, तिमोथी सोनो इरास्तसनिलाई, ओलकिन डादा ज़ माकेदोनियादा निपरीक्यो। ओल ते जाँवा पै एसिया खन्दल ज़ लिके।

पावलए ओपाँत एफिससल

यामचिउ

२३ हाः बेलाक एफिसस सहरल येसुए ओपाँत छ्याल्दिउ खैलानी बैला माताके। २४ तोबो देमेत्रियस यादोज्याव सोनारए, आर्तेमिस देबीए



पावल तेस्रोलाव ओबाव

ओसाचीर १८:२३-२१:१७

जिम्जा जिम्जा चाँदीए अडग्यार जैद सहरलाव तुप्न्यारालाई कुधु फाइदा जैद ओराएज्याव। २५तछा नोरालाई सोनो छुत नो मिताव येन दाज्यावरालाई दुप्द, “अ डादाज्यु भाइर, जे ज़ जेसैज्या, आव गेयेननी ज़ चाव कमाइ ताज्या। २६नो पावलए भन आव गेसहरल सोनो एसिया भरिल, ‘कुइए जैसिउ अडग्यार काता देवतार ब माःक’ है दाद कुधु मिँरालाई तँदा ज़ याजैक्यो। २७है

जैद नोए ओपाँए ज़ आव गेयेन वाज़ माःक, भन आर्तेमिस गेदेवत्यानीए ओमन्दिर ब कान्ल ज़ गनिसिन्या माले। हिताव ओताकिन ते एसिया भरिल सोनो मानुवाताव मिँराए गेमानिज्याव देवत्यानीए ओज़गै मगै ब मान्या ओछ्यास लिज्या,” है ओरादोक ते, २८प्राई ज़ यारिस बनै चोद, “एफिससल लिज्याव आर्तेमिस देवत्यानी जय जय,” है लिद बनै किकेर। २६नो पाँत सहरलाव

मिँर कुधु ज़ मचिद माकेदोनियानी हुव पावलए ओनैनी गायस सोनो अरिस्तार्खसनिलाई क्योःद राम दान्या पोल सेले सेले यारालाँकेर। ३० पावलए नो पाँ थैद ओनैनी निजूनी राम दान्या पोदा बाव ओपैँज्याव, नलाव यायुँ हुबोराए भैःद माएकेर। ३१ एसिया खन्दलाव सरकारए ओयेन दाज्याव रूवा रूवा ओनैराए मनी, “राम दान्या पोदा ताबानी,” लिद ओल्योदा था परींकेर।

३२ नल बावर रूवाराए ‘आव ज़’, रूवाराए ‘हो ज़’ लिद बनै याक्रिक सुए ज़ काता ज़ माथरैधुकेर। खाली कुधु मिँराए ‘काराव यादुप्सिउ’ लिन्या ब यामासैँज्याव। ३३ छीनी नलाव यहूदीराए तोबो अलेक्जेन्दरलाई जवाप याव परींकेर। है जैद नोए, ‘आदा थैचिके’ लिद उकुइए सान दाद याएक्यो। ३४ खाली नोराए ‘यहूदी ज़ ओल्यो’ लिन्या सरेस्द प्राइँए यागाँ तोबो जैद, “एफिससल लिज्याव आर्तेमिस देवत्यानी जय जय,” है लिद नेघन्ता भरी क्रिउका क्रिउ ज़ लिकेर।

३५ बल्ल बल्लड नो सहरलाव प्रधानए नोरालाई चाप चुप जैद, “अ एफिससलाव मिँर, आदा थैचिके। नो नमतिन तेव माहान देवत्यानी आर्तेमिस सोनो होए ओमन्दिर आव गेसहरल गेमीं ज़ लिज्या लिन्या

प्राइँए ज़ सैँज्यार सानी। ३६ ‘माःक’ लिन्या सु ज़ मालेर। जे काराव जेमचिज्याव? चिम दोचिके, मुखलाव येन तादोच्यो। ३७ आव सेल्द जेररैव मिँनी ते गेमन्दिरनी काता ब माहाइनी, गेदेवताए उमिन ब बले-द मायासिर। ३८ है जैद देमेत्रियस सोनो ओलसकाव ओनैराए यामुद्दा कातार उलिकिन अदालतल बाद उजुर ओदोरक। ३९ छुत यापाँ उलिकिन जनताराए कचरी मनी लिज्या सानी। ४० खाली अत्ताकलाव आछिमकाव जेदोज्याव मिताव ते दान्या माःक, मानी रोमी सरकारए गेलाई गेगल्ली थरैदद्यान्या ओछ्यास लिज्या। मचिन्या निउँ काता ज़ ओमाल्योए गे काता जवाप यान्या?” ४१ है दाद प्राइँलाई भाःसिउ यापरींक्यो।

पावल माकेदोनिया सोनो ग्रीसदा ओबाव

२० राउँनी भ्याउँ ओखेमोत पावलए नलाव यायुँ हुबोरालाई दुप्द परमेस्वरए ओपाँनी यायुँ सभैःदद्याद, बिदा निद माकेदोनिया खन्ददा बाके। २ नदाडाव यायुँ हुबोरालाई मनी परमेस्वरए ओपाँर सथैद यायुँ सभैःद याएक्यो। नकिन ग्रीस देसदा बाद, ३ नल सोमैना पै लिके। ननी री जहाजनी

सिरिया खन्ददा बाव ओपैज्याक, 'यहूदीराए पावललाई सैःव पैज्यार दी' लिन्या थैद नो येमनी माबाद फरी माकेदोनियालाव घ्याँ बान्या थःरैक्यो। ४ओलस छुत मिँर मनी बाकेर। नोराए यामिनर आवर ज़ — बेरिया सहरलाव पुरसए ओज़ा सोपात्रोस, थेसलोनिके सहरलाव अरिस्तार्खस सोनो सिकन्दसनी, दर्बी सहरलाव गायस, तिमोथी, सोनो एसिया खन्दलाव तुखिकस सोनो त्रोफिमसर ज़। ५नोर गेकिन ड़ादा बाद त्रोआस सहरल याकींसिज़्याव। ६माँदा भरेस ज़्यान्या पर्ब ओमाखेमा पै फिलिप्पी सहरल गेलिके। पर्ब ओखेमोत री जहाजल पसिद पाँच दिनत त्रोआसल केस्द ड़ादा बावरास दैसिद, नल सात दिन गेलिके।

पावल त्रोआसलाव यायुँ हुबोरास यादुप्सिउ

७सातालाव उस०कताव छचाम रिमक त्रोआसलाव यायुँ हुबोरास दुप्सिद प्रभु-भोज गेमानिज़्याव। पावल हो पराःती बाव ओपैज्यावए आधा री पै परमेस्वरए ओपाँ ओसथै-सिज़्याव। ८नो दुप्सिद गेलिज़्याव ओतर्ताव तालल कुधु बत्तीर तैःसिउ यालिज़्याव। ९भयालत तोबो धापाज़ाकाव युतिकस यादोज़्याव

चुसिद उउज़िज़्याव। पावलए ओपाँ बनै ओख्योःवए नो छोज्या घेप्पा ड़लत बाद सोताल्यातिन तेके। नोलाई याचानाक सिउ दैकेर। १०पावल रूतिन भरिद नो छोज्यालाई लापुद प्राइँलाई, "जेयुँ होलाँ जैचिके, उस० लिज़्या," है दाद, ११फरी रोट बाद येसुए उमिनताव भरेस केःद भाःदचाद, नम उसँवा पै परमेस्वरए ओपाँर सथैद ननी पुलुस्द बाके। १२नो छोज्या मासिद ओबाँचिउए प्राइँए यायुँ बनै होलाँ ताद फ़िमक लाँकेर।

त्रोआसकिन मिलेतस पै

१३पावल त्रोआसकिन अस्सोस सहरक पै उखँनी ज़ बान्या थःरैद गेलाई री जहाजल बाव परींसिक्यो। ओल अस्सोसकिन वाज़ री जहाजल पसिन्या युँ ओदोवए, १४नल ओल गेस दैसिद हाःकिन री जहाजल गेस ज़ बाके। मितिलेने सहरल गेकेसोत, १५हो पराःती खियस तापुए ओसोराक गेबाके। हुकिन सामोस तापुल बाद, हुकिनकाव हो पराःती मिलेतस सहरल गेकेस्के। १६पावलए, 'एसिया खन्दल गेबाकिन यरूसलेमलाव पेन्तिकोस पर्बदा गेमातापनाधुया' लिद बनै घल्सिद एफिसस सहरदा माबान्या जैक्यो। १७बुरु एफिससलाव मन्दलीलाव सेररालाई

मिलेतसनी थार परींद ओल्योदा ज़
याथाक्यो।

पावलए एफिससनी ओराथाव
सेररास यादैसिउ

१८ एफिससलाव मन्दलीलाव
सेरर पावलए ओल्योक याकेस्हुवत
पावलए, “डा एसियाल डाकेस्हुव
छचामकिन डादोव भरी जे ज़
जेसैङ्या। डा जेस लिद, १९ यहूदीराए
ल्योनी कुधु दुखर डादैङ्यावत ब,
जेजूनी डा सज़िमिसिद परमेस्वरए
ओसेवा दाद डाप्रिलर ब डारास्के।
२० जेलाई ओचाहित ल्यो पाँर सथैन्या
माअन्कनिद ज़ जेदुप्सिङ्याव पो पोक,
जेफिमक जेफिमक ब डासथैचिके।
२१ जेदेसलाव यहूदीर सोनो छुत
जातलाव मिँरालाई, ‘जेपापलाई रास्द,
परमेस्वरए ल्योदा सखैसिद, गोप्रभु
येसु ख्रीसए ओपाँत जेयुँ सुहुच्चिके,’
लिद प्राइँलाई ज़ डारासथैके।

२२ “अब ते छैँव पुरूसए है ओदाँव
भैःद यरूसलेमदा डाबाङ्या। होड
केस्द ‘अइ डातारिङ्या’ लिन्या ते
डामासैए। २३ खाली जो सहरल
डाबादी ब छैँव पुरूसए, ‘नजुँ आव
ज़ — दुखर दैन्या सोनो भ्यालखानाल
लिन्या’ लिद है दाँङ्याव। २४ हैदी ब
डाजिउए मया माले, खाली डायेन
भरी सुदुम्द, प्रभु येसुए डालाई

ओयाँव येनलाई सयो·न्यात वाज़
डायुँ थू ताङ्या। नो ओयाँव डायेन ते,
‘परमेस्वर गेल्योदा उयुँ ओगराँव’ है
लिन्या चाव था सथैन्या ज़।

२५ “अबकिन ते जे परमेस्वरए
ओराज्यालाव पाँ जेल्योडाव डासथै-
चिउ मिँराए फरी डाडा: रँ:व दैन्या
जेमाले लिन्या डासैङ्या। २६ है जैद जे
आछिम आव सैचिके — जे सुवाराए
तछा परमेस्वरए ओसजा जेदैकिन, नो
डा डागल्ती तान्या माले। २७ परमेस्वरए
ओगोइँ भरी ओपो·स ज़ जेल्योड
सथैद डासयो·के।

२८ “है जैद जे परमेस्वरए ओबगाल-
लाव यालोम्बार, छैँव पुरूसए
ओखतैचिउर, जेक्याँलाई जोगोइद
ख्रीसए उभीए ओरालँ:व परमेस्वरए
ओमन्दलीलाई पाथस याराछोच्यो।
२९ डा डाबाव छीनी जेबगालल छे छे
डमिसिउ प्रर स्यासोर पसिद रन्दनी बन्द
जैन्या लेर। ३० जेखालाँव मिँराए मनी
रूवा रूवार तँदा जैसिद परमेस्वरए
ओपाँताव मिँरालाई याल्योदा जैन्याए
जूनी धुत पाँर ब पैन्या लेर। ३१ है जैद
जे सैसिद लिच्यो। डा जेल्योडाव
सोरिम भरी लाकनी रील परमेस्वरए
ओपाँर तोबो तोबोनी पैद डाप्रिलर
डारासो ब तामें:च्यो।

३२ “अब ते डा जेलाई परमेस्वरए
ओपासल डाभा:चिङ्या। गराँव

ओपाँ ब जेस ज़ लिज़्या। नो पाँए जेलाई थ०रिउ जैद, परमेस्वरए उमिनत लिज़्यावरास जेलाई मनी परमेस्वरनिकाव जुँ दैन्या जैचिरि-ज्याव। ३३डा जेस डालिज़्याक सुए जेल्योनी ब पैसार क्वाराए लोभ डामादोए। ३४जे ज़ जेसैज़्या, डा सोनो डानैरालाई ओचाहिज़्याव भरी आव डाकुइए ज़ येन दाद गेडासिके। ३५है जैद प्राइँनी ज़ जेल्योड मनी डासतैके — गेकुइए येन बनै दाद माधुन्यारालाई मनी सघैव ताके। आवए जूँनी गेप्रभु येसुए ओपाँ ब तामें:च्यो — ‘छुतए ल्योनी दैन्या देखा, छुतलाई यान्या पाथ लिज़्या।’ ”

३६पावल आव भरी पाँद उघूँदानी तिकिसिद नो भरिरास प्राइँए पोंखारिकेर। ३७हा:त ज़ यायुँ माचाव दाद पावललाई लाप्ट, माइँ दाद प्राइँ ज़ घर्केर। ३८‘जे डाडा: फरी रँ:व दैन्या जेमाले’ है ओल्योए, होए ज़ प्राइँरानी यायुँ माचाव जैद ओरायो। हा:त ज़ पावललाई री जहाजक पै सारैनाकेर।

पावल यरूसलेमदा ओबाव

२१ गे नोरास भा:सिद पावलस री जहाजल पसिद एक-सब्दचा कोस तापुदा गेबाके। हो

परा:ती रोदस तापुल गेबाके। नकिन पतारा सहरल केस्द, २फोनिके खन्ददा बान्या री जहाजलाई दैद होल ज़ गेबाके। ३साइप्रस तापु रँ:न्याक केस्द, तापुकिन दखिनलाव घ्याँ बाद सिरिया खन्द पै सिधा गेबाके। नो जहाजलाव मालसामान हाइन्याए जूँनी तुरोस सहरल ज़ गेथकनिके। ४नलाव यायुँ हुबोरास दैसिनाद नोरास सात दिन गेलिके। ना: भरिल नोराए परमेस्वरए उपुरूसनी पावललाई, “यरूसलेमदा बान्या मा:क,” है दाव ज़ यानैज़्याव। ५है यादोज़्यावत ब जहाज बान्या बेला ओतावत गे ननी पुलुस्द फरी गेबाके। नोर खेपा मेंमार याज़ारास ज़ गेलाई सहरनी जहाजक पै सारैसिहुकेर। समुन्द्र छयोक गेघूँदानी तिकिसिद पोंखारिद, ६प्राइँलाई जेरो दाद जहाजल गेपसिके। नोर ओल्द याफिमदा बाकेर।

७है जैद तुरोसनी तोलेमाइस सहरल बाद नलाव यायुँ हुबोरास दैसिद, तरी नोरास गेलिके। ८नकिन हो परा:ती फरी जहाजल बाद कैसरिया सहरल केस्द जहाजतिन हाइसिद नो सात जनारासकाव परमेस्वरए ओपाँ सथैज़्याव फिलिपए उफिमक बाद नोस ज़ गेलिके। ९नोए ओज़ार

चार जना रे मादोताव मेंमार यालि-
ज़्याव। नोर प्राइँ परमेस्वरए उपरूसनी
पाँज़्यावर यालिज़्याव।

१०फिलिपस गेल्यो सोंला चार दिन
गेतावत तोबो अगाबस यादोज़्याव
अगमबक्ता यहूदिया खन्दनी गेस
दैसिहुद, ११पावलए ओवाँ:फो बैद
ओल ज़ उखँ उकुइर किद, “छैँव
पुरूसए है लिज़्या, ‘यरूसलेमलाव
यहूदीराए आव वाँ:फोए ओर्गेलाई
अइ जैद किद, छुत जातलावरालाई
सुँपिरिज़्यार,’ ” है लिके।

१२नोए ओपाँ थैद, पावललाई,
“यरूसलेमदा ताबानी,” है लिद गे
सोनो नलाव यायुँ हुबोराए है दाव ज़
गेनैके। १३खाली पावलए भन, “जे
काता जेजैसिज़्याव इताव, घदर्चाद
नदा बान्या डायुँ के:द जेयाँज़्याव? डा
किसिन्या वाज़ मा:क, यरूसलेमल
बाद प्रभु येसुए उमिनत सिन्या ब
तयार ज़ डालिज़्या,” है दासिक्यो।
१४है जैद गे कै जैद ब गेमासभै:धुवए,
‘परमेस्वरए उयुँ ज़ ओताक’ लिद
च्रिम गेदोके।

१५हुकिन ते गे भरी भा:सिद
यरूसलेमदा बान्या गेथूसिके।
१६कैसरियालाव यायुँ हुबोर मनी
तोबो नेब्लो गेस ज़ बाद यरूसलेमदा
मनासोनए उभिमक पै लाँसिकेर।
नो मिँ साइप्रसनी हुव, ड़ादाकिन येसुए

ओपाँत हुव मिँ ज़ ओल्यो। है जैद नोए
ओल्योक गेबासिके।

पावल याकूबस ओदैसिउ

१७यरूसलेमलाव यायुँ हुबोराए
गेलाई रँ:द खुसी ताद चावस ज़
सुम्मिकेर। १८हो परा:ती गे पावलस
याकूबए ल्योदा गेदैसिनाके। मन्दली-
लाव सेरर मनी याकूबए ल्योक
दुप्सिद यालिज़्याव। १९पावलए
नोरालाई जेरो दाद, परमेस्वरए
ओय़ेननी ज़ छुत जातलाव मिँरालाई
याक्याँताव ओदोव भरी तोबो तोबोनी
है दाद यासथैक्यो। २०नो पाँ थैद
नोर परमेस्वरए ल्योदा बनै खुसी
ताद धन्याबाद चरै:केर। नकिन
पावललाई, “भाइ, यहूदी जातलाव
मिँराए मनी हजारका हजारए ज़ येसुए
ओपाँत यायुँ हुप्के। खाली नोराए
मोसाए ओकानुन ब बनै सघ्यो:ज़्यार।
२१नँ नजूनी ब थैद नैर। रूवा रूवाराए
नँलाई, ‘पावलए मोसाए ओपाँकिन
तँदा जैसिद छुत देसल लिज़्याव
यहूदीरालाई याचलन भरी रासो परींद
याज़ारालाई मनी ‘क्यालन्या सरेस
जेमाराजैदी ब ताए’ है यादोज़्याव दी,’
है दींज़्यार। २२गे कै लिन्या ओताव?
अब ते ‘हुके दी’ लिन्या ब थैन्या
लेर। २३है जैद अइ जैव ताके —
गेसकाव चार जना मिँराए मोसाए

ओकानुन मितावनी किज्या भाःद नैर। २४पुजारीराए ल्योक चोखोइसिद याचेम एन्न्या वाज्र बाँखी लिज्या। है जैद नँ नोरास बाद यास ज़ चोखोइसिद नलाव खर्च भरी नँ ज़ फोःव ताके। हो ताकिन नो याथैव पाँ भरी ‘माथोरिउ ची ओल्यो’ है लिन्या लेर। ‘मोसाए ओकानुन ब ओदोऽयाव ओल्यो’ लिन्या ब सैन्या लेर। २५खाली छुत जातलाव यायुँ हुबोराए दान्या येन ते आव ज़ थःरैद सर्द गेनै — अङ्ग्यालाई चरैःसिउ ज़्यावर माऽयान्या, भी माऽयान्या, ओधें फर्लेद सैःसिउ स्याकरी माकैन्या, पातज्या पातर्नी ब माजैसिन्या,” है दोकेर।

२६है जैद हो पराःती पावलए नो चार जना मिँरालाई ध्यान फिमक लाँद नोरास चोखोइसिद, ‘सात दिनत किज्या खेम्द मार ब चरैःन्या गेले’ लिद भकल दोकेर।

पावललाई याक्योःव

२७नो सात दिन ओयोःनावत एसिया खन्दनी हुव यहूदीराए पावललाई ध्यान फिमल रँःद नकाव मिँरालाई मचैद, पावललाई क्योःद, २८“अ इस्राएली गेदाज्यु भाइर, चाँदो हुचिके। आकाव मिँए संसार भरी

दुलिद गेजातलाई सज़िम्द, मोसाए ओकानुनलाव पाँलाई ख्याद, ध्यान फिमए उमिन ब बलेःदयासिज्याव। भन ग्रीक मिँरालाई ध्यान फिमल रैद चोखो गेपो ब छुदयासिक्यो,” है दाद यारामचैकेर। २९नोर डादा सहरल त्रोफिमस यादोऽयाव एफिससलाव मिँलाई पावलस यारँःवए, ‘ध्यान फिमल मनी रैद नैऽयाखेहो’ लिन्या यासम्जिज्याव।

३०है जैद सहरलाव मिँर बनै ज़ मचिद प्राइँनी ज़ धोःहुद, पावललाई क्योःद, ध्यान फिमनी सेल्द, ग्रामर गल्केर। ३१नोलाई सैःव यापैँज्याक ज़ नकाव रोमी सेनापतीए ‘यरूसलेम भरी बनै खैलानी बैला ताके दी’ लिन्या थैद, ३२हतप्त ज़ सिपाईर सोनो कप्तानरालाई लाँद नो मचिज्यावराए ल्योदा धोःनाकेर। नो माहोल्याराए नोर याहुज्याव रँःद पावललाई प्रोन्या चिम दोकेर।

३३हाःत ज़ नो सेनापतीए पावललाई क्योःद नेब्लो साँगलए किव परींद, माहोल्यारालाई, ‘आव मिँ सु ओताव, काता येन ओदोव?’ है लिद ओरासुधिक ते, ३४ख्वाराए ‘आव ज़’, ख्वाराए ‘हो ज़’ लिद बनै राउँनी भयाउँ लिकेर। सुए यापाँ ब ओमाथःरैधुवए

उसिपाईरालाई पावललाई थानाक लाँव यापरींक्यो। ३५थानालाव थप्काक याकेसोत माहोल्यार यारिसए बनै ज़ याछुइसिहुवए सिपाईराए पावललाई छींद लाँकेर। ३६नो माहोल्यार थानाक पै याछीं याछीं ज़ हुद, “आवलाई खदम ज़ ख्यान्या,” है लिद बनै ज़ क्रिकेर।

माहोल्यारालाई पावलए जवाप ओरायो

३७हाःत ज़ पावललाई थानाल लाँव यापैंज्याक, पावलए सेनापतीलाई, “डा नँस तोबो पाँव डादैक,” है ओदोक ते, नो सेनापतीए, “नँ ग्रीक पाँ कातानी नसैव? ३८डा ते नँलाई छुत ची है डाल्यो। नँ नो तालाडाव सरकारकिन तँदा जैसिद चार हजार गुन्दारालाई मचैज्याव इजिपी माःक रो?” है ओदोक ते, ३९पावलए, “डा हो माःक। डा ते किलिकियालाव तार्सस सहरल जर्मिउ यहूदी ची। नो पो बनै उमिन थासो, छ्याल्ल्यु सहर ब माःक। नँस डाबिन्ती तोबो लिज्या — आव माहोल्यारास तखेप पाँव डादैक,” है ओदोक ते, ४०नो सेनापतीए पावललाई भैःदिक्यो।

पावल थप्कात च्याँःसिद, ‘चिम दोचिके’ लिद उकुइए सान दाद याएक्यो। प्राइँ चिम यादोवत पावलए हिब्रू खामनी अइ लिद पाँके,

२२ “अ डादाज्यु भाइर, डासेरर, डा डापाँ ब तखेप थैदच्याँचिके,” है ओरादोक ते, २हिब्रू खामनी ओपाँज्याव थैद माहोल्यार भन ज़ चाप चुप ताकेर।

३है जैद पावलए, “डा यहूदी जातलाव मिँ ज़, किलिकियालाव तार्सस सहरल डाजर्मिउ। ननी सरिद आल यरूसलेमल डाडासिके। गमलिएलए उसिस ब ताद, गेजिज्यु बाज्युकिनकाव हुव चलन भरी माबिरैद ज़ पैसिद, जे माँःती परमेस्वरए ल्योदा बनै ध्यावना डादोज्याव। ४येसुए ओपाँत बाज्याव खेपा मेंमार यामासिवा पै याखिरी पसिद, रूवा रूवारालाई क्योःद भयालखानाल ब डाराभाःके। ५अछादी प्रधान पुजारी सोनो घ्योःव कचरीलाव सेररालाई यारासुधिचिके, याज़ सैज्यार। तछा नोराए ल्योनी दमस्कसलाव यहूदी दाज्यु भाइराए यामिनताव चिथील नलाव यायुँ हुबोरालाई मनी क्योःद सजा यान्याए जूँनी यरूसलेमदा किद रैन्या हक दैद नदा ज़ डाबाके।

६“येमत डाबाज्याक अधमर लाक दमस्कस डाकेस्नाक, उमँःजानी बनै मी भीःन्या ज़गै नमतिन हुद डाल्योक बनै म्याल्याकनी मिलिक ताके। ७हाःत ज़ नामक डाधलिउत, कातानी

तोबो गा अइ लिद ओपाँज्याव डाथैके, 'अ साऊल, अ साऊल, नँ काराव डाखिरी नपसिज्याव?' है ओदाँक ते, ९'नँ सु प्रभु?' है डादोके। नो गा फरी हुद, 'डा नो डाखिरी नपसिज्याव नासरतलाव येसु ज़' है दाँक्यो। ९नो डास बाज्याव डानैराए ते ज़गै वाज़ रँ:केर, डास पाँज्याव गा ते माथ-रैधुकेर। १०हा:त ज़, 'डा काता येन दान्या, प्रभु?' है डादोक ते, 'नँ सोद दमस्कसल बान्केदा, नड ज़ नँ दान्या येन भरी थैन्या नले,' है दाँक्यो। ११नो ज़गैए डालाई अन्दनी मुन्द ओजैनावए डानैराए डाकुइनी दोरैद दमस्कसल लाँनाकेर।

१२"नल तोबो हननिया यादोज्याव मोसाए ओकानुन माबिरैद दाज्याव धर्मी मिँ उलिज्याव। नलाव यहूदीराए नोलाई बनै चाव थ-रैद यानैज्याव। १३नो मिँ डाल्योक हुद, 'अ भाइ साऊल, नमी ओरै:क,' है ओदाँव प्राइँना डामी फैसिद रँ:धुन्या डाताके।

१४"हा:त ज़ नोए, 'गेजिज्यु बाज्युकिनकाव गेपरमेस्वरए नँलाई उयुँलाव मिताव पाँर सतैँन्या जूँनी खतैद नैनिड। छैँव ओज़ा नल्योक सरैँ:दद्याद, ओर्गा थैन्या ब जैनिक्यो। १५है जैद आव नरँ:व नथैव भरित प्राइँ मिँराए डाक येसुए ओसाची तान्या नले। १६है जैद मातेन्सिद ज़

नँ आख सोद नपापलाई छैन्याए जूँनी येसुए उमिन हाइद रील सछैँसिन्के,' है दाँक्यो।

१७"नकिन छीनी यरूसलेमदा ओल्द बाद, तछा ध्यान फ़िमल डापोँखारिज्याक ज़ नल फ़जल्किद, येसुलाई डारँ:के। १८नोए, 'नँ चाँदो ज़ घल्सिद, यरूसलेमनी हाइसिद बान्के। आल डाजूँनी नराएज्याव गोहाई भैँ:न्या मालेर,' है ओदाँक ते, १९डा फरी, 'काराव प्रभु? याज़ सैँज्यार — डा यासकाव ताद धर्मसास्त्र फ़िम फ़िमक बाद नपाँ दोज्याव भरिरालाई सापद क्यो:द कैताक प्रोद भयालखानाल ब डाराभा:ज्याव। २०नसाची स्तिफनसलाई लुँए भे:द यासै:व बेलाक डा मनी नोरास खैद नक च्याँ:सिद नो भे:ज्यावराए याक्वार समारिद डाराएज्याव,' है डादोके।

२१"हा:त ज़ येसुए, 'नँ घबानी। तादा तादाड लिज्याव छुत जातलाव मिँराए ल्योदा डापरीँनिरिज्या,' है दाँक्यो।"

पावलए ओपाँ थैज्यावर यारसिड

२२नो माहोल्याराए ना:पै पावलए ओपाँ चावस ज़ थैकेर। खाली छुत जातराए यामिन ओहाइव प्राइँना माहोल्यार बनै मचिद, "निताव मिँलाई काताए उजूँनी नैन्या? बुरू सै:किन

पाथ लिज्या,” है लिद, २३याक्वार सिउःद ख्याद, धुइरो ब सिमे सिमे नमदा ख्याद बनै क्रिकेर।

२४है जैद सेनापतीए उसिपाईरालाई पावललाई थानाल लाँव परींद, “काताए जूँनी नाः याक्रिज्याव? आवलाई रीःद खोले-व ताके, कसा मापाँए,” है दाद, २५पावललाई किद रीःव यापैँज्याक, नकाव च्याँःसिद लिज्याव कप्तानलाई पावलए, “डा रोमी नागरिकलाई डागलती माथ-रैद अइज्ज रीःन्या ओताज्याव रो?” है दोक्यो।

२६नो कप्तानए नो पाँ थैद सेनापती-लाई, “कै जैन्या नपैँज्याव? आव मिं ते रोमी नागरिक ची ओल्यो, नमासैँए रो?” है ओदोक ते, २७नो सेनापती पावलए ल्योक बाद, “साचो नँ रोमी नागरिक रो?” है ओदोक ते, “डा रोमी नागरिक ज़,” है दोक्यो। २८नकिन नो सेनापतीए, “डा कुधु पैसार फोःद वाज़ नागरिक डाताके,” है ओदोक ते, पावलए, “डा ते रोमी नागरिक ज़ डाजर्मिउ ची,” है दोक्यो।

२९हाःत ज़ पावललाई खोले-ना हुवर नो पाँ थैद याछींदा तेन्सिकेर। सेनापती मनी, “अन्नाकल ज़ रोमी

नागरिकलाई ची डाकिउ ओल्यो’ लिद छे-के।†

पावललाई घ्योःव कचरील यालाँव

३०हो पराःती नो सेनापतीए पावललाई पला-द, ‘यहूदीराए काराव आवलाई खत यालैँज्याव’ लिद थ-रैन्याए जूँनी मुख्या पुजारीर सोनो घ्योःव कचरीलाव मिँरालाई दुप्द, पावललाई याड़ाक सच्याँक्यो।

२३ पावलए नो कचरीलाव मिँराए ल्योदा भाल्सिद अइ लिद जवाप याएक्यो, “दाज्यु भाइर, डा आःपै परमेस्वरए ओड़ाक छैँव युँस ज़ डालिज्या,” है ओरादोव प्राइँना, ३प्रधान पुजारी हननियाए नकाव च्याँःसिद लिज्यावरालाई पावलए ओयाःत लफरैव यापरीँक्यो। ३हाःत ज़ पावलए उरिस चोद, “ए पाखात वाज़ चाव जैसिज्याव, नँलाई तछा परमेस्वरए लफरैनिरिज्याव। नँ मोसाए ओकानुननी फाल्न्या जैसिज्यावए कै जैद नो कानुनलाई उल्लतैद डालाई प्रोव नरापरीँज्याव?” है ओदोक ते, ४नकाव च्याँःसिद लिज्यावराए, “नँ कै जैद नाःल्लिदउ परमेस्वरनी खतैसिउ प्रधान पुजारीस याः नदोज्याव?” है यादोक ते,

५ पावलए, “दाज्यु भाइर, नो प्रधान पुजारी ओल्यो लिन्या डा डामासैए। धर्मसास्त्रल मनी इताव सर्सिउ लिङ्या, ‘राज्या चलैङ्याव घेप्पाराए याडैत माचाव पाँन्या माताए।’ ”

६ नो घ्योःव कचरील तभा सदुकी दललावर, तभा फरिसीर यालिङ्याव सैद, याडाक च्याँःसिद प्राईंलाई, “अ दाज्यु भाइर, डा फरिसीए ओजा फरिसी ज़। डा, ‘सिद मनी अजम्बरी जुनीए आस लिङ्या,’ है डालिङ्यावनी ज़ आछिमकाव मुद्दाल डापरिके,”

७ है ओरादोव प्राईंना नलाव सदुकीर सोनो फरिसीर या या माखैद बनै खल्लेसिकेर। ८ सदुकीराए ते, ‘अजम्बरी जुनी ब माले, परमेस्वरए ओचाकज्यार ब मालेर, पुरूसर ब मालेर’ है यालिङ्याव। फरिसीराए फरी, ‘कै जैद ओमालिङ्याव? नो भरी लिङ्या ज़’ है यालिङ्याव। ९ है जैद नोर बनै राउँनी भ्याउँ जैद, फरिसीरासकाव यासास्त्रीर च्याँःसिद बनै रसिद, “आवए माचाव काता दाद ओनैङ्याव? है उलिङ्याव मिताव परमेस्वरए ओचाकज्या कितर परमेस्वरए उपुरूस हुद ओलस ज़ ओपाँव ताक्या,” है लिंकेर। १० है जैद या याज़ माखैद

भन ज़ मचिनाद पावललाई हो ज़ सेल्ल्या, हो ज़ छुइन्या जैकेर। निताव रँःद नो सेनापतीए सैःज्या लिद छेःद उसिपाईंरालाई पावललाई करस ज़ पलेःव परींद थानाक लाँक्यो।

११ हो छ्याम रील ज़ प्रभु पावलए ओडाक सरँःसिद, “नयुँ तासतेयो, नयुँ होलाँ ओताक। किताव आल यरूसलेमल डासाची जैसिद डापाँ नरासथैव, हिताव ज़ रोमल मनी डासाची नतानारिङ्या,” है दोक्यो।

पावललाई सैःन्या बुद्धी

१२ हो पराःती छकाल्ल्या यहूदीर दुप्सिद पावललाई सैःन्या बुद्धी कलैद, “नोलाई गेमासैःवा पै ज़्यान्या ब गेमाङ्यु, ओन्या ब गेमाओ,” लिद किज्या ब भाःकेर। १३ निताव किज्या भाःङ्यावर चालीसकिन यादा ज़ याल्यो। १४ नोर मुख्या पुजारीर सोनो सेरराए ल्योक बाद, “गे भरी पावललाई गेमासैःवा पै काता ज़ ज़्यान्या गेमाले लिद किज्या भाःद गेनै। १५ है जैद जे घ्योःव कचरी दाव जैसिद, सेनापतीए ल्योदा ‘पावललाई चावस फाल्ल्याए जूँनी आदा रैके’ लिद था परींव ताके। हो बेलाक ज़ गे येमक वैसिद

नोलाई गेसैःरिज़्या,” है दाद सल्ला याराएकेर।

१६हाः बेलाक पावलए ओभान्जए यासल्ला भरी थैद, थानाक बाद ओबागे पावललाई है दोनाक्यो। १७पावलए फरी कप्तानलाई खुल्द, “आव छोज्यालाई सेनापतीए ल्योक लाँदचाव ताके, होस तोबो पाँ पाँरिज़्या दी,” है ओदोक ते, १८नोए नो छोज्यालाई सेनापतीए ल्योक लाँद, “आवए ओपाँ तोबो लिज़्या दी। कैदी पावलए डालाई नल्योक सारैव परीनाक्यो,” है ओदोक ते, १९नो सेनापतीए नो छोज्यालाई उकुइनी क्योःद तँदा अलगज़ा लाँद, “काराव, डालाई है दाँके,” है दोक्यो।

२०नकिन नो छोज्याए, “पराःती यहूदीर घ्योःव कचरी दाव जैसिद, ‘पावललाई चावस फाल्न्याए जूँनी आदा रैके’ लिद नँस बिन्ती दोरिज़्यार दी। २१खाली नँ नोराए यापाँ ताभैःनी। चालीसकिन यादाडाव मिँर पावललाई सैःन्या लिद येमक वैसिद लेर। नोराए, ‘पावललाई गेमासैःवा पै ज़्यान्या ब गेमाज़्यु, ओन्या ब गेमाओ,’ लिद किज्या भाःद नैर। नँ नपाँलाई वाज़ कींद नैर,” है ओदोक ते, २२नो सेनापतीए, “आव पाँर डालाई है नदाँव सुलाई ज़ है तारादोयो,” है दाद नो छोज्यालाई उक्किमदा परीक्यो।

पावललाई कैसरियादा यासारैव

२३नो सेनापतीए नेब्लो कप्तान-निलाई खुल्द, “पते रील नौ बजेवाक, जिन पावललाई कैसरियादा लाँन्याए जूँनी खँनी बान्या सिपाईर नेसय, घोरा चेपद बान्यार सत्तरी सोनो ज़लरास बान्यार नेसय जना तयार याराजैचिन्के। २४पावललाई मनी घोरात जोगोइद हाकिम फेलिक्सए ल्योदा पाथस सारैव ताके,” है निदोक्यो।

२५नो सेनापतीए फरी, हाकिमए ल्योदा तोबो चिथी अइ लिद सर्द परीक्यो,

२६“डा क्लौदियस लुसियसए डाल्योनी, नँ माननिय हाकिम फेलिक्सलाई जेरो लिज़्या।

२७आव नल्योदा डापरींज़्याव मिँलाई यहूदीराए क्योःद सैःव यापैंज़्याव। रोमी नागरिक ज़ ओल्यो लिन्या सैंद डा ड़ासिपाईरास बाद नोलाई ड़ाजोगोइके। २८ओगल्ती काता ओताव लिद थःरैन्याए जूँनी यहूदीराए घ्योःव याकचरील ब ड़ालाँके। २९नल याधर्मए उजूँनी वाज़ यामाखैज़्याव ओल्यो लिन्या ड़ाथःरैके। नोलाई भ्यालखानाल भाःन्या सोनो सैःन्या सजा

स्यासो ते काता ज़ डामादैके।
 ३०हितावत ब यहूदीराए नोलाई
 सैःन्या बुद्धी याकलैज़्याव
 ओल्यो। निताव डासैवत हतप्त
 ज़ नल्योदा डापरींके। ओडैत
 पाँज़्यावरालाई मनी, 'जेमुद्दा
 कातार उलिकिन हाकिमए ल्योदा
 लाँचिके,' लिद हुकुम डाराएके।
 डापाँ आःज़, जेरो।”

३१है जैद नो सेनापतीए है
 ओरादोव मिताव ज़ सिपाईराए
 हो छचाम रील ज़ पावललाई
 एन्तिपात्रिस सहरक पै लाँकेर।
 ३२हो पराःतीकिन नो खँनी बाज़्यावर
 ओल्द, घोरा चेप्ट बाज़्यावरालाई
 वाज़ पावलस यारापरींकेर। ३३नो
 घोरा चेप्ट बाज़्यावर कैसरियाल
 केस्द हाकिमलाई चिथी बुभैद
 पावललाई मनी बुभैकेर। ३४है जैद
 नो हाकिमए नो चिथी प्ररिद, पावलए
 उजिल्ला सुधिद किलिकियालाव
 ओल्यो लिन्या सैद, ३५पावललाई,
 “नजगज्यार मनी याहुवत आव नमुद्दा
 डाथैया,” है दाद पावललाई हेरोदए
 ओदरबारल नैव यापरींक्यो।

हाकिम फेलिक्सए ओड़ाक पावल

२४ पाँच दिन ओतावत प्रधान
 पुजारी हननिया तोबो
 नेब्लो यहूदीराए यासेररास कैसरियाल

हुद, हाकिमए ल्योक बाद पावलए
 उजूनी उजुर दोनाकेर। नोरास तोबो
 तर्तुल्लस यादोज़्याव वकिल ब
 रैद यानैज़्याव। २है जैद मुद्दा चलैद
 पावललाई यारैवत तर्तुल्लसए अइ
 लिद पाँके, “माननिय फेलिक्स
 ज्यू, नँ गेपोडाव हाकिम ताद,
 नदयानी गेदेस बनैद नयासिउए
 गे प्राइँडावरालाई बनै सन्च ताद
 फाबिउ ज़ गेलिज़्या। ३होए उजूनी
 गे प्राइँनी ज़ नगुनर मामेंःद मानिउ
 ज़ गेलिज़्या। ४खाली आछिम नर्च्या
 मासैःद गेल्योदा दया दाद आव तोबो
 जिम्ज़ा गेपाँ वाज़ थैद नयासिकिन
 ताखेहो है गेलिज़्या। ५खास गेपाँ
 आव ज़ — आकाव नल्योक रैद
 यानैज़्याव मिँ ते बनै नाल क़्याव
 माचाव मिँ लिज़्या। नासरी दललाव
 यागुर्बा ताद संसार भरिल दुलिद
 यहूदीरालाई बनै ज़ यामचैज़्याव।
 ६ध्यान भिमलाई भन भुथो जैव
 ओपैँज़्याक बल्ल गेक्योःके। [मोसाए
 ओकानुननी गे ज़ फालो गेपैँक ते,
 ७कप्तान लुसियस हुद भन नोलाई
 गेल्योनी जबरज्यास्ती नैद, ८गे
 ओजगज्यारालाई मनी नँ नल्योदा
 हुव परींसिक्यो।] है जैद आवलाई
 नबिचारिक उजुर गेदोव पाँ भरी
 साचो ज़ ओल्यो लिन्या थःरैन्या
 नले,” है दोक्यो।

६नोस हुव यहूदीराए मनी ओपाँ जोर्दिकेर।

हाकिमलाई पावलए ओयो जवाप

१० हाःत ज़ हाकिमए पावललाई सान दाद ओएक ते पावलए अइ लिद पाँके, “माननिय हाकिम, नँ आव राज्याल कुधु बर्सकिन ज़ मिँरालाई नराफाल्ज़्यावए डा नड़ाक डायुँ हुपद ज़ डापाँज़्या। ११ डा यरूसलेमदा परमेस्वरए ओध्यान दाना डाबाव आछिम बाह दिन वाज़ ताके। आव डापाँ साचो सैं माःक नँ ज़ थःरैधुन्या नले। १२ नाः भरिल डाकिन तँदाडावराए ना डा सुरास ध्यान फ़िमल डाखल्लेसिज़्याव यारँःनाव, ना धर्मसास्त्र फ़िमराल ना सहरल मिँरालाई डारामचैज़्याव यारँःनाव। १३ है जैद आव डाडैताव भाःव यापैँज़्याव पाँर काता ज़ थःरिन्या माले। १४ खाली आव तोबो भन्या हैज़, गेजिज्यु बाज्युकिनकाव ओसेवा गेदोहुज़्याव परमेस्वरलाई डा मनी साःरो येमनी ओसेवा डादोज़्या। आवराए भन ‘तँनिकाव येम’ है दाँज़्यार। है यादाँदी ब मोसाए ओकानुन सोनो अगमबक्तराए यासरो पाँ भरित डायुँ हुपज़्या। १५ आवराए यादोज़्याव मिताव डा मनी ‘तछा चाव माचाव दाज़्याव प्राइँ मिँर परमेस्वरए

ओड़ाक च्याँःसिरिज़्यार,’ है लिद परमेस्वरए ल्योदा आस डादोज़्या। १६ है जैद नो पाँर चेतैद डा परमेस्वरए ओड़ाक सोनो मिँराए याड़ाक छैव युँस दान्या वाज़ धामा डादोज़्या।

१७ “है जैद डा छुत देस जीदा नेरिम सोरिम भरी दुलिद, ‘डादेसलाव दुखिरालाई सघैद परमेस्वरलाई मनी भिती चरैःन्या’ लिद फरी यरूसलेमल डाहुके। १८ होए उजुँनी ध्यान फ़िमल डालिज़्याव बेलाक यहूदीराए दैनाकेर। हो बेलाक ज़ भर चोखोइसिद डालिज़्याव, ध्यान फ़िमल खैलानी बैला ब काता ज़ ओमालिज़्याव। हाःत ज़ एसिया खन्दनी हुव यहूदीराए डालाई सरेस्द नलाव मिँरालाई यारामचैकेर। १९ नोराए डाडैत भाःन्या पाँ कातार ओल्यो ताकिन नोर याज़ आछिम हुद उजुर दाव परिन्या ओल्यो। २० अथबा, यहूदीराए घ्योःव याकचरील काता डागलतीर यादैव ताकिन आकाव हुद लिज़्यावराए ओपाँरक ते। २१ सैं नो कचरीलाव सिउनी सैंसिन्याए जूँनी डापाँवनी आछिमकाव मुद्दा याचलैज़्याव ओताव?” है यादोक्यो।

२२ हाःत ज़ नो हाकिम फेलिक्सए नाः थैद, “डा आव जेपाँ भरी कप्तान लुसियस उहुवत डाबिचारिया,” है दाद भाःसिउ यापरींक्यो। ओल ते

उपुर्कावराकिन येसुए ओपाँ सर्बा ज़ ओसैँज्याव। २३ है जैद नोए पावललाई गुन्याए जूँनी सिपाईराए याकमान्दरए उजिम्बाल नैद, “आवलाई जाँ आदा होदा ल्यो ब यान्या, दैसिना हुज्याव ओनैरालाई मनी तारावैयो,” है लिद हुकुम एक्यो।

२४ नेला सोलावात फेलिक्स, यहूदी ओज्या द्रसिल्लास हुद, येसु ख्रीसनिकाव येम किताव उलिज्याव लिद चावस थैन्याए जूँनी पावललाई खुल्द पलासो परीक्यो। २५ है जैद पावलए ओअर्थ भरी पलास्दद्याद, परमेस्वरए उयुँलाव मिताव येन दान्या, तहस लिन्या, सोनो परमेस्वर-निकाव फाल्न्या छ्यामए उजूनी उनिसथैवत, फेलिक्सए उयुँल बनै छे-द, “आछिम नाःत ज़ नैकेदा बान्के। बुरू तछा फरी डाधाःक डाकिन्यादा नसथैना,” है दोक्यो। २६ हाःकिन, ‘पावलए ओल्योनी घुस ब डादैए सैँ’ लिद पावललाई घरी पाला ज़ खुल्द सिप सिप ज़ निपाँज्याव।

२७ नेरिम ओतावत फेलिक्सए ओपाला तोसिद तोबो पर्किअस फेस्तस हाकिम ताके। फेलिक्सए ते नो येन ओरास्क यहूदीरालाई खुसी जैन्याए जूँनी पावललाई मारास्द कैतल ज़ नैक्यो।

साःरो हाकिम फेस्तस

२५ साःरो हाकिम फेस्तस यहूदिया खन्दल उहुव सोला ओतावत कैसरियानी पुलुस्द यरूसलेमदा बाके। २ यरूसलेम ओकेसोत नलाव मुख्या पुजारीर सोनो यहूदीराए याघेप्पाराए पावलए ओडैताव याभाःव पाँर सम्जैद, ३ ‘यरूसलेमल सारैन्या’ लिद बिन्ती दोकेर। नोर खास येमत वैसिद सैःन्या बुद्धी कलैद यानैज्याव। ४ फेस्तसए नोराए यापाँ भैःद मायाद, “पावललाई कैसरियाल थुनाल थुनैद नैर, डा मनी जाँवाक नदा ज़ डाबारिज्या। ५ है जैद जे नोए उजूनी जेपाँ कातार उलिकिन तोबो नेब्लो जेसेररालाई डास ज़ बान्या यारापरीच्यो। होए ओगल्ती कातार उलिकिन नोराए ज़ उजुर दोज्या,” है लिद यासम्जैक्यो।

६ हाकिम यरूसलेमल ओल्यो आथ दस दिन ओतावत कैसरियादा ओल्द बाके। ओकेसो हो पराःती अदालतल बाद पावललाई रैव यापरीक्यो। ७ पावल अदालतल उहुवत, यरूसलेमनी हुव यहूदीर प्राईँ ओल्योक गुरिगाँ जैसिद घ्योःव घ्योःव माथोरिउ पाँर ओडैत भाःदिकेर।

८ पावलए नोरालाई जवाप याद हाकिमलाई, “डा यहूदीराए

याकानुनलाई तादी ब, ध्यान भिमलाई तादी ब, माहाराजालाई तादी ब, काता ज़ बले-द डामाराए,” लिद है ओदोक ते, ६फेस्तसए यहूदीरालाई ओल्योदा जैन्याए जूनी पावललाई, “हुकी नँ यरूसलेमदा बान्केदा आव पाँर होड ज़ फसेला डाजैया, कै ताके?” है ओदोक ते, १०पावलए, “डा सरकारए अदालत डाक ज़ डालिज़्या, आल ज़ फाल्सिउ परिए। यहूदीरालाई ते काता ज़ बले-द डामाराए है डाल्यो ते नँ ज़ नसैंज्याखेहो सानी। ११डा माचाव येन दाद, डालाई सैःन्या मिताव गलती कातार उलिकिन ते थिक ज़, डालाई जेसैःनादी ब ताए ज़। खाली आवराए डाडैताव भाःद यायाँज्याव पाँर ओमाथ०रिउ ताकिन नँ डालाई याल्योदा सूपिन्या नहक ब माले। है जैद डा आख ज़ माहाराजाए ल्योदा बिन्ती दान्या डापैज्या,” है दोक्यो।

१२हाःत ज़ फेस्तसए ओलसकाव सल्ला याज्यावरास जलफल दाद पावललाई, “नँ माहाराजाए ल्योदा बिन्ती दान्या नपैव प्राईना नदा ज़ बान्या नले,” है दोक्यो।

**फेस्तसए राजा अग्रिपासस सल्ला
ओदोव**

१३नेला सोला ओतावत तोबो अग्रिपास राजा ओबैनी बरनिकीस

कैसरियाल फेस्तसस दैसिना हुकिनी। १४नोनी सर्बा कुधु दिन नल लिन्या बिचार निदोवए हाकिम फेस्तसए पावलए उजूनी राजा अग्रिपासस सल्ला दाद, “डाकिन डादाडाव हाकिम फेलिक्सए तोबो कैदीलाई डा डाजिम्बाल ख्यानैक्यो। १५डा तछा यरूसलेमल डालिज़्याव बेलाक नलाव मुख्या पुजारीर सोनो यहूदीराए यासेरर डाल्योक हुद नोए ओडैत ओखत पले-दद्याद होक ज़ सजा ब याव पैकेर। १६डा फरी नोरालाई, ‘रोमी कानुननी बादी पर्तीनी जोरन जैद, नो पर्तीवालाए ओडैत भाःद यायो पाँ भरिए ओजवाप याव ओमादैवा पै नोलाई अडज़ सूपिन्या माताए,’ है डारादोके। १७है जैद नो मुद्दा याज्यावर आल ज़ हुकेर। धिलो मादाद हो पराःती डा कचरी जैद पावललाई मनी अदालतल रैव डारापरीके। १८नोर च्याँःसिद ओडैत भाःद यापाँक डा बनै अचम्ब डाताके। अपराधी मिताव येन ते काता ज़ डामाडम्सिके। १९अडज़ याधर्म रोक मेक ओतावए यामाखैज्याव ओल्यो। तोबो सिउ येसु यादोज्यावए उजूनी पावलए ‘जीदो ज़ लिज़्या’ है ओरादोवनी बनै यारसिउ ओल्यो। २०डा याधर्मलाव पाँ जाँ मासैंद कातानी फाल्न्या ओताव लिद

पावललाई, 'आव पाँर फाल्न्याए जूँनी नँ यरूसलेमदा नमाबाके?' है डादोक ते, २१ पावलए भन, 'डा नदा डामाबा, बुरू आव पाँर फाल्न्याए जूँनी माहाराजाए ल्योदा डामाबावा पै आल ज़ डालिरिज़्या,' है लिके। है जैद डा नोलाई माहाराजाए ल्योदा परींन्या मौका ओमाहुवा पै आल ज़ डानैज़्या," है दोक्यो। २२ अग्रिपासए नो भरी थैद, "डा मनी नोए ओपाँ तखेप थैव डादैक," है ओदोक ते, फेस्तसए, "ताए, नोए ओपाँ परा:ती ज़ नथैया," है दोक्यो।

पावल अग्रिपासए ओड़ाक ओपाँव

२३ हो परा:ती अग्रिपास सोनो बरनिकी बनै तह महौ जैसिद, सेनापतीर सोनो सहरलाव घेप्पारास सिप ज़ कचरी दान्या महलल हुकेर। प्राइँ यादुप्सिउत फेस्तसए उसिपाईरालाई पावललाई रैव यापरींक्यो।

२४ हा:त ज़ फेस्तसए प्राइँलाई, "राजा अग्रिपास सोनो आल हुद लिज़्यावर, आव डापाँ थैचिके। आव जेड़ाकाव च्याँ:सिद लिज़्याव मिँए उजूँनी यरूसलेमलाव यहूदीर सोनो आलाव यहूदीर बनै रसिद डाल्योक हुद, सै:न्या सजा याव यापैंज्याव। २५ आवलाई डाबिचारिक फरी सै:न्या

सजा यान्या स्यासो ते काता ज़ डामादैके। हा:त ज़ माहाराजाए ल्योदा बिन्ती दान्या ओपैवए नदा ज़ परींन्या डाथ:रैके। २६ खाली नदा डापरींकिन माहाराजालाई आवए उजूँनी सदर्यान्या मिताव पाँर ते काता ज़ माले। है जैद आछिम जे भरिए जेड़ाक सोनो खास ते नँ राजा अग्रिपासए नड़ाक आव मिँलाई सच्याँद डानै, कसा आवए उजूँनी तोबो नेब्लो सन्या पाँर मापुलुस्त्रिज़्या। २७ मानी ना:ल्दिउ राजाए ल्योदा बिनु गल्ती कै जैद परींन्या?" है यादोक्यो।

२६ हा:त ज़ राजा अग्रिपासए पावललाई, "नपाँ काता उलिज़्याव, पाँनिके," है ओदोक ते, पावलए उकुइए सान दाद अइ लिद जवाप एक्यो,

२ "डालाई यहूदीराए डाडैत भा:द यायाँव खतए ओजवाप नँ राजा अग्रिपासए नड़ाक पाँव डादैवए, डा आछिम बनै डाभागी ल्यो ज़ डालिज़्या। ३ नँ यहूदी चलन भरी बनै सैन्या मिँ ज़ नलिज़्या। है जैद आछिम पै डालाई सहिद डापाँ भरी चावस थैयो लिद बिन्ती डाचरै:निज़्या।

४ "डा डाजर्मिउ पो सोनो यरूसलेम सहरल यहूदी जातलावराए याखार्ल ज़ डाघ्यो:के। है जैद यहूदी भरी प्राइँए ज़ जिम्ज़ाकिन डादोहुज़्याव येनर चावस

सैंज्यार। ५हाः बेलाक फरिसी ब डाजैसिके। गेधर्म मानिज्याव भरिरानी फरिसीराकिन कर्रा सु ज़ मालेर। है जैद डालाई नो येनत डादाकिन ज़ सरैस्द नैनार। नो पाँए उजूनी है यालिकिन है लिधुन्या ज़ लेर। ६नोराए भन आछिम डा 'गेसाखा पुर्खारालाई परमेस्वरए ओरायो याका सयो-दद्यासिक्यो' है डारादोवनी ज़ डालाई सजा याव पैंज्यार। ७नो याकाए उजूनी ज़ गेमीं बाह थरलाव मिंराए आस दाद लाकनी रील ध्यान दाद खिमो ज़ नैज्यार। अ राजा, डा नो खिमो ज़ यानैज्यावलाई थ-रैद डारायोनी ज़ यहूदीराए माभैःद आछिम नल्योक रैद नैनार। ८'परमेस्वरए सिउरालाई यासोचोइज्याव' है डालिज्याव पाँत के जैद अचम्ब ताद जेमापतिज्याव?

९'डा मनी डादा नासरतलाव येसुए उमिन बनै सोद ओपाँलाई जुनी ब वैव डापैंज्याव। १०है जैद यरूसलेमल नोए उउपत बनै धामा दाद, मुख्या पुजारीराए ल्योनी क्योःन्या हक रैद येसुए छैव उमीं कुधुरालाई भयालखानाल ब डाराभाःके। सैःन्या याथ-रैक डा मनी 'हैज' लिद यापाँ जोर्द डाराएज्याव। ११कैताक धर्मसास्त्र भिम भिमक बाद नोरालाई दुख याद, कसा मारस्स लिद कर ब डारालैज्याव। डारिस बनै माचाव

ओतावए छुत देसलाव सहर जीदा मनी दुलिद नोरालाई सापे सापे याखिरी डापसिज्याव।

१२'अ राजा, तछा निताव येनए जूनी मुख्या पुजारीराए ल्योनी हक रैद दमस्कसदा डाबाज्याव बेलाक, १३अधमर लाक निमीकिन ब ओभार ल्यो ज़गै नमतिन हुद, डानैरास गेल्योक म्याल्याकनी मिलिक रैःहुके।

१४गे भरी प्राइँ नामक गेधलिउत तोबो गा हिबू खामनी डास, 'अ साऊल, अ साऊल, नँ काराव डाखिरी नपसिज्याव? नँ सैंज्यावत ब ज़पत लातए थेंद ननैज्याव मिताव ज़ नलिज्या,' है ओदाँक ते, १५डा, 'नँ सु प्रभु?' है डादोके। प्रभुए फरी, 'डा नो डाखिरी नपसिज्याव येसु ज़।

१६नँ सोद च्याँःसिन्केदा, डा नँलाई डानोकोर जैन्याए जूनी आछिम नल्योक डासरैःसिके। आछिम डालाई नरँःनावए नँ डासाची ताद, छीनी सतैद डाईरिज्याव पाँए ओसाची ब नतारिज्या। १७यहूदीराए ल्योदा सोनो छुत जातलावराए ल्योदा डापरीनिक नोराए ल्योनी डाजोगोइनिरिज्या। १८नँ होरालाई डापाँ सथैद यामी फैदचान्या नले। चुम चुमो सैतानए ओराज्यानी पले-द, ओजगै ल्यो परमेस्वरए ओराज्याल लाँन्या नले। हुनी ज़ नोर डालाई यायुँ हुपद यापापर क्याल्सिद,



परमेस्वरस खैवरास स्वर्गताव बताहा दैन्याकावर तान्या लेर,' है दाँक्यो।

१६“है जैद, राजा अग्रिपास, डा नो नमतिन हुव पाँकिन तँदा माबाद, २०दमस्कसल येसुए ओपाँ सथैन्यात डाथूसिके। नकिन यरूसलेमलावर, यहूदिया खन्द जीदाडावर, सोनो छुत जातलावराए याल्योदा मनी बाद, ‘जेपापलाई रास्द, परमेस्वरए ल्योदा जेयुँ फकैद, साचो हो मिताव येन ब दोव ताके,’ लिद सथैव ज़ डारानैज्याव। २१होए उजूनी ज़ डा ध्यान फ़िमल डालिज्याव बेलाक यहूदीराए डालाई क्योःद सैःव पैकेर। २२खाली परमेस्वरए डालाई पाथस ओनैनावए आछिम पै घेप्पा ज़िम्ज़ारालाई ओसाची याव ज़ डालिज्या। नो डापाँल मोसा सोनो अगमबक्तराए, ‘इताव इताव तारिज्या’ है याल्यो पाँकिन डा छुत काता ज़ चरैःद डामापाँए। २३होराए पाला, ‘ख्रीस दुखर सहिद, सिउनी सैसिउ प्राइरानी डात ताद, यहूदीर सोनो छुत जातलाव मिँरालाई अजम्बरी जुनील बान्या येम सतैद याएरिज्याव,’ है लिद मिँरालाई यारासथैकेर।”

२४पावल निताव ओपाँज्याक ज़ फेस्तस बनै चोइस क्रिद, “पावल,

नँ दासानी बिसा ताद नले। कुधु प्रिद चबनै बूलिउ स्यासो नताके,” है ओदोक ते, २५पावलए, “माननिय फेस्तस ज्यू, डा बूलिउ माःक। साचो थंरिउ पाँ ज़ डापाँज्याव ची। २६आव पाँ भरी राजा अग्रिपासए मनी सैज्याखेहो लिद ओडाक डायुँ हुपद ज़ डापाँज्या। आव मोसिउलाव पाँ स्यासो ते माःक। है जैद ‘ओमासैव ब काता ज़ मालिखेहो’ लिद डायुँ हुपद ले,” है दाद, २७राजा अग्रिपासलाई मनी, “अ राजा, अगमबक्तराए यासरो पाँ नमापतिज्या? नपतिज्याखेहो,” है ओदोक ते, २८अग्रिपासए, “आव छ्यावा नपाँए डालाई ब ख्रीस्त्यान जैव नपैज्याव रो?” है ओदोक ते, २९पावलए फरी, “परमेस्वरए ओडाक डाबिन्ती आव ज़ लिज्या — छ्यावानी तादी ब, कुधुनी तादी ब, जे आछिमकाव डापाँ थैज्याव भरिए, डालाई सुर्सिउ साँगलराकिन बाहेक, डा स्यासो जेताकिन ताखेहो है डालिज्या,” है यादोक्यो।

३०हाःत ज़ राजा अग्रिपास, हाकिम फेस्तस, बरनिकी सोनो यास चुसिद लिज्याव भरी च्याँःसिद लाँःदा पुलुस्द, ३१या या पाँसिद, “साचो ज़ ओल्यो, आवलाई सैःन्या





(२७:८)

सजा अथवा भयालखानाल भाःन्या सजा यान्या स्यासो ते माले,” है लिकेर। ३२नकिन राजा अग्रिपासए फेस्तसलाई, “आव मिँए माहाराजाए ल्योदा बिन्ती दान्या ओमापैव ताकिन गे नोलाई रास्न्या गेल्यो,” है दोक्यो।

पावल रोमदा ओबाव

२७ पावललाई इतालिया देसदा लाँन्या याथःरैवत छुत कैदीरास माहाराजाए ओफौजी-लाव कप्तान युलियस यादोज़्यावए ओपासल ज़ भाःकेर। २है जैद गे तोबो एद्रामितेनोस सहरनी हुव एसियालाव समुन्द्र छचोकाव पो पोक बाज़्याव री जहाजल पसिद गेबाके। गेस माकेदोनिया खन्दलाव

थेसलोनिके सहरनी हुव तोबो अरिस्तार्खस ब उलिज़्याव।

३गेबाव हो पराःती सीदोन सहरल केस्द जाँवा पै गेलिके। युलियसए पावललाई दया दाद, “ननैरास दैसिद नचाहिन्यार होराए ल्योनी रैयो,” है दोक्यो। ४नकिन फरी री जहाजल गेबाक गेड़ानी बतास उहुवए, साइप्रस तापुए बतास ओथोरोलाव घ्याँ गेबाके। ५नकिन किलिकिया सोनो पामफिलिया खन्द झाकाव घ्योःव समुन्द्रलाव घ्याँ बाद, लुकिया खन्दलाव माइरा सहरड केस्द, नो ज़ादाडाव जहाजनी भरिद, ६गेसकाव कप्तानए तोबो अलेक्जेन्द्रिया सहरनी हुव इतालियादा बाज़्याव जहाज दैद नल भाःसिक्यो। ७नो जहाजल मनी, बतास गेड़ानी हुद कुधु दिनत बल्ल

कनीदस सहर नजिकक गेकेस्के। हुकिन होदा, गे बाव गेपैज्याव येमदा बतासए बाव ओमायासिउए फरी क्रेत तापुए बतास ओथोज्याव सालमोने यादोज्याव पोलाव घ्याँ गेबाके। ८नकिन बनै ज़ धो धो तापु छयो छयो बाद लासिया सहर लापकाव 'चाव बन्दरगाह' यादोज्याव जहाज थकनैन्या पोल गेबाके।

९नक पै केस्न्या कुधु दिन गेभाःधुवए ज़्यूँःव साहा हुनाद उलिज्याव। नो साहाक बतास दाद समुन्द्रल बान्या बनै ओछ्यास ल्यो ओताज्याव। है जैद पावलए नो जहाज चलैज्यावरालाई, १०“अ डादाज्यु भाइर, गे आथ पाला गेबाकिन जहाजलाव सामानर सोनो जहाजलाई मनी कुधु नोक्सान तारिज्या। गेजिउलाई मनी ओछ्यास ल्यो ज़ लिज्या,” है ओरादोज्यावत ब, ११नोए ओपाँ कप्तानए काता माँःती माडमिसद, बुरू जहाजए ओर्गे सोनो जहाज चलैज्यावनी निपाँ कोसै भैःके। १२हो सोनो ज़्यूँःव साहाक नो जहाज थकनैन्या पोल लिन्या जाँ माज्यासो उलिज्यावए नो जहाजत बाज्यावर जाँकोसैए नो क्रेत तापुत छ्यावा होकसैकाव फोनिक्स सहरदा बान्या जैकेर। नो सहर दखिन-पछ्युँ सोनो उतर-

पछ्युँदा फर्किउ जहाज नैन्या पो थुमो उलिज्यावए युँदा भरी नक ज़ लिन्या थःरैकेर।

समुन्द्रलाव आँधी

१३हाःत ज़ दखिन त०नी बनै चाव बतास स० स० हुद जहाज चलैज्यावराए 'अब ते गेकेस्या' लिद नो जहाजलाई अदैज्याव भँए साँगललाई रीनी सेल्द क्रेत तापु छयो छयो ज़ गेबाके। १४हाःत ज़ उमँःजानी उतर त०निकाव तापुनी ल्यो माल्यो बतास गेतर्त हुद, १५जहाजलाई आदानी होदा ख्याक्यो। बतास त०दा गेमालाँधुवए जहाजलाई गेरास्क, बतासए भन समुन्द्र माँजल ज़ लाँसिक्यो। १६बल्ल बतासलाई जाँ थोज्याव क्लौदा यादोज्याव जिम्ज़ा तापु छींक गेकेस्नाक जहाजए ओर्मेःताव सुर्सिउ आदा होदा लिन्या दोङ्गालाई सेल्द बनै दुखस छींद जहाजल गेभाःके। १७'रीए जहाजलाई मनी सुफुवा' लिद घेप्पा तारए बनै ज़ कस्कैकेर। लिबिया छयोकाव उर्जी माल्यो बगरल गैन्या ओछ्यास ओतावए नो जहाजलाई सेल्ज्याव क्वार सतेदचाद बतासए ओभरत ज़ रास्केर। १८हो पराःती आँधीए जहाजलाई पा·वा पा·वा ओजैवए जहाजलाव



(२७:१३-४०)

सामानर ब हाइद रील याराख्याकेर।
१६हुकिनकाव हो परा:ती जहाजए
ओजार ब याराख्याकेर। २०कुधु
दिन पै आंधी बाबत ताद निमी सोरोर
ब यामारै:ज्यावए, 'गेमारहिके ब'
लिद गेयुंर स्यासे गेसतेके।

२१ज्यावर गेमाज्युव कुधु दिन
ओतावत पावल प्राइंए डाक
च्याँ:सिद, "अ डादाज्यु भाइर,
डा जेलाई है डादाचिउ पाँर भै:द
क्रेत तापु जेमारासो ताकिन आ:
नोक्सान तान्या ओमाल्यो। २२हैदी
ब जेयुं स्यासे तासतेच्यो — जहाज
वाज्ज खदम तारिज्या, गे मिँर ते

सु ज़ सिन्या गेमाले। २३आछचा रील
ओसेवा डादोज्याव डापरमेस्वरए
ओचाकज्या डाल्योक सरै:सिद,
२४'पावल, ताछे:नी। नँ जुनी ब
माहाराजाए ओडाक नच्याँ:सिरिज्या।
नँस बाज्याव ननैर मनी परमेस्वरए
ओदयानी बाँचिरिज्यार,' है दाँक्यो।
२५है जैद डानैर, जेयुं होलाँ जैचिके।
परमेस्वरए है ओदाँव मिताव जुनी
ब तान्या ज़ ले लिद डायुं हुबो ज़
लिज्या। २६खाली गे तोबो तापुत उर्जी
माल्योल गर्न्या गेले," है दासिक्यो।

री जहाज उचिसो

२७बतास ओदोव चौध रात
ओतावत एद्रियास समुन्द्रल
बतासए गेजहाजलाई आदा होदा
उहुतैनाज्याव। आधा रील री
छचोदा गेहुव मिताव डम्सिद
जहाज चलैज्यावराए, २८'उर्जी खा
उलिज्याव' लिद यागोईक चालीस
मितर ताके। नकिन जाँ होकसैकावक
फरी यागोईक तीस मितर ताके।
२९'जहाज घ्यो:व घ्यो:व पहर जीदा
थुक्सिया' लिन्या छचासए जहाज
अदैन्या भँए साँगलर ओर्मै:तिन चारता
यारासतेकेर। हा:किन 'नम खर्क सँके'
लिद कींद ज़ गेभा:के। ३०हा:त ज़
नो जहाज चलैज्यावराए धों:न्या निउँ
तोबो जैद, 'जहाजए उसुनी धूँलाव

भँर मनी पला-द सतेव ताके' लिद नो आदा होदा लिन्या जिम्जा दोङ्गालाई रील भरैकेर। ३१ पावलए याचाल सैंद कप्तान सोनो सिपाईरालाई, “आवर जहाजल गेस यामारहिकिन, गे भरी बाँचिन्या गेमाले,” है ओरादोक ते, ३२ नो सिपाईराए दोङ्गाए ओघेंर चन्द्र बगैद याराएकेर।

३३ नम उसंनाक पावलए प्राईंलाई यायुँर सभें:दचाद, “आछिम पै जेसोगोए काता ज़ माज़्याद जेल्यो चौध दिन जेताके। ३४ है जैद आछिम जेसार् सपरीन्याए जूनी ज़्यावर ब ज़्युव ताके। गे सु ज़ मासिद तोबो गेमुल ब गलिन्या माले,” है दाद, ३५ उकुइत भरेस रैद प्राईंए याङ्गाक परमेस्वरलाई धन्याबाद चरै:द के:द ज़्युक्यो। ३६ हा:त ज़ उपुर्काव भरिए पाला यायुँ होलाँ जैद या मनी ज़्युकेर। ३७ नो जहाजल लिज़्यावर, गे भरी प्राईं भा:द, नेसय छयहत्तर जना गेल्यो। ३८ है जैद गे भरी गेफू तसी ज़्याद, जहाजए उगुर सोबोमन्याए जूनी नो गेसयेलो गेदा भरी रील याराख्याकेर।


३९ नम छेलाला उसंवत ‘आव काता पो ओताव?’ लिद सुए ज़ माथ-रैधुकेर। खाली तोबोक ओधाँद माल्यो छेरारा-व पो रैं:द ‘गेधुवा पै जहाजलाई नड ज़ लाँव ताके’ है लिद, ४० नो जहाजलाई अदैज़्याव

सतेसिउ भँए सांगलर चन्द्र रील ज़ ख्यानैद, जहाजए ओडै आदा होदा दलकैज़्याव दाबीलाई मनी चलैन्याए जूनी पला-केर। नकिन बतासए फुलैद जहाजलाई सेल्ल्याव क्वार तङ्गैद नो छेरारा-व पोदा यालाँज्यावत ज़, ४१ री जीलाव बालुवा बोर्सिउत तोल्द जहाज होल ज़ गैके। ओडै बनै चोइस उतूंसिउए कै जैद ब माहाइधुकेर। उछीनीकाव रीए छल्काए जहाजलाई बनै प्रोद पा-नाक्यो।

४२ हा:त ज़ सिपाईराए, ‘आलाव कैदीर हाइसिद धों:ज्या’ लिद सै:व पैकेर। ४३ खाली कप्तानए पावललाई जोगोइव ओपैज्याव। है जैद नोरालाई भें:द मायाद, “जे रील चेलन्या सैंज्यावर डादा रील ज़ो:द पाखादा पुलुसचिके। ४४ चेलन्या मासैंज्याव भरी जहाजलाव फल्यार, काता कातार हाइद नत ज़ बाचिके,” है लिद याअर्थैक्यो। है जैद तोबो ब कै मै माताद ज़ प्राईं पाखात गेपुलुस्के।

माल्ता तापुत

२८ गे भरी कैज़ माताद पाखात गेपुलुसो प्राईंना ‘आव तापुए उमिन माल्ता ची ओल्यो’ लिन्या गेसैंके। २ नकाव लिज़्याव मिंराए गेलाई रैं:द यायुँ नाद दया दासिकेर। नम फाइ फाइनी फुइ फुइ जैद बनै उज़्युँ:वए में:र



पावल रोमदा ओबाव

ओसाचीर २७:१-२८:१६

दादयासिकेर। ३ पावलए सीं तकर रैद में:ल ओभा:क में:ए ओघम्काए घुल तोबो पुलुस्द पावलए उकुइ दा-दिक्यो। ४ नो तापुताव मिंराए उकुइत घुल उभुन्दिउ रें:द, “ओहो! आव मिं ते ज्यानमारा ज़ ओल्यो ताखेहो। ना:ल्दिउ रीनी उजुगिदी ब न्यायनी ते बाँचिउ मादैक्यो,” है लिकेर। ५ खाली पावलए उकुइ फरैद घुललाई में:ल ख्याक्यो, ओल ते कैज़ माताके। ६ तापुताव मिंराए ते, ‘जुनी ब गोद सिए’ लिद चिऊद यानैज्याव। कुधु पै चिऊद ब कैज़ ओमातावए, हा:किन “आव मिं ते देवता ची ओल्यो,” है लिकेर।

७ नो तापुताव याघेप्पा पब्लियसए ओएँ:र उफ़िमर नजीदा ज़ यालि-ज्याव। है जैद नोए गेलाई दया दाद सोला पै बनै चावस ज़ नैसिक्यो। ८ नोए ओबाबु फू बान्या बेथाए ओजोरो हुद थलिद उलिज्याव। पावलए नोलाई चिऊनाद परमेस्वर-लाई पॉंखारिद, ओक्याँत उकुइ नैद ओयोत, होक ज़ गराँके। ९ हा:किन नो तापुताव मिंराए ‘पावलए अइ जैक्यो’ लिन्या थैद याजोरो हुवर प्राइँ ओल्योक हुद यासगराँसिहुज्याव। १० है जैद गेलेवा भरी नो तापुताव मिंराए गेलाई बनै मानस ज़ नैद,

गेबान्या छचाम ओतावत येमताव
गेज्यावर ब भाःदचासिकेर।

रोम याकेसो

११माल्ता तापुत स्रोमैना गेतावत
तोबो अलेक्जेन्द्रिया सहरनी हुव
जहाजत गेबाके। नो जहाज युँदा
भरी नो तापुत नैसिउ उलिज्याव,
ओडैत जोडोल्या देवता यादोज्यावए
ओअडग्या खुपिसिउ उलिज्याव।
१२माल्ताकिन सुराकुसाई सहरक
बाद स्रोला पै नक ज गेलिके।
१३नकिन फरी बाद इतालिया
देसलाव रेगियन सहरल गेकेस्के।
नल तछा गेतावत दखिन त०नी बतास
चलिद नेलात ज पतिओली सहरल
गेकेस्के। १४नो सहरल येसुए ओपाँत
बाज्यावरास गेदैसिक, नोराए ‘गेस
ल्यो ताके’ है यादासिक ते नोरास
तसाता पै गेलिके। नकिन बल्ल
रोम सहरदा ज गेबाके। १५रोमलाव
यायुँ हुबोराए ‘हुज्यार दी’ लिन्या
थैद ख्वार अप्पियस बजारक पै,
ख्वार तीन-भत्ती बजारक पै गेलाई
चिहुसिकेर। पावलए नोरालाई
रँःद उयुरं होलाँ ताद परमेस्वरलाई
धन्याबाद चरैःक्यो।

१६रोम गेकेसोत पावललाई तोबो
सिपाईए ओपासल भयालखानाकिन
अछतड तोबो फिमल ल्यो एकेर।

पावलए रोमलाव यहूदीरालाई ओरासथैव

१७पावल स्रोला ओतावत नलाव
यहूदीराए याघेप्पारालाई दुप्द अइ
लिद यासथैक्यो, “अ डादाज्यु
भाइर, डा गेजिज्यु बाज्युराए याचलन
स्रोनो गेजातलाव मिँरालाई काता ज
बले-द डामाराएदी ब, यरूसलेमलाव
यहूदीराए डालाई क्योःद रोम सरकारए
ल्योदा सूपिनाकेर। १८रोमीराए डापाँ
फाल्द डालाई सैःन्या स्यासो काता
ज मादैद रासो यापैज्याव। १९डामीं
यहूदी दाज्यु भाइराए याउपत काता
खतर लैन्या पाँ ज ओमाल्यो, खाली
यहूदीराए ते भन डालाई रास्य्या
पाँलाई यामाभैःवए माहाराजाए
ल्योदा बिन्ती दान्या कर ज लागिके।
२०खास डा इस्राएलीराए आस दाद
यानैज्याव ख्रीसए उजूनी है डारादोवनी
ज डालाई इताव साँगलए किद नैनार।
है जैद नो पाँर जेलाई है दान्याए जूनी
आछिम डारखुल्चिउ,” है ओरादोक ते,
२१नोराए, “गे आःपै यहूदिया देसनी
नँ नजूनी काता चिथी ज गेमादैताए।
ननी हुज्याव गेमींराए यायाःनी ब
नजूनी माचाव काता ज गेमाथैताए।
२२खाली प्राइँड ज जे ख्रीस्त्यानराए
जेजूनी ‘आवराए यापाँ थिक माले’ है
यालिज्याव वाज गेथैज्या। है जैद जेपाँ

किताव उलिङ्ग्याव, गे मनी तखेप थैव ताके,” है दोकेर।

२३ है जैद ‘आव छचाम दुप्सिउ ताके’ लिन्या याथऱैव छचाम यहूदीर पावलए उक्किमक ओपाँ थैना काला मुलु हुकेर। हो छचाम छकालन्याकिन रिमक पै पावलए नोरालाई परमेस्वरए ओराज्यालाव पाँर पलास्दद्याद, मोसाए ओकानुन सोनो अगमबक्तराए येसुए उजूनी यासरो भरिनी थऱैदद्याद यायुँ सुहुप्दद्यान्या धामा दोक्यो।

२४ नोर ख्वाराए ओपाँ चावस थैद नो पाँत यायुँ हुप्के, ख्वाराए ते माभैःकेर।

२५ है जैद या या माखैद ननी पुलुस्द याबाङ्ग्याक पावलए आव तोबो पाँ याङ्गैत भाःद याएक्यो, “जेजिज्यु बाज्युरालाई छैव पुरूसए है ओरादोव पाँ ते थिक ज़ ताद ले। नो पाँ यसैया अगमबक्ताए अइ लिद सर्द नैद यायो,

२६ ‘आव मिँरालाई है यादोनाके,

थैन्या ते जेथैङ्ग्या, जेमातीधुइ।

रँःन्या ते जेरँःङ्ग्या, जेमासरेस्थुइ।

२७ आवराए यायुँ काता ज़

मातीधुन्या भुत्यासो ताद ले।

यार्ना ब सूइसिउ मिताव ताद ले।

यामी ब च्चिम जैद यानैङ्ग्याव मिताव लिङ्ग्या।

निताव यामाताव ताकिन

आः भरी यामीए रँःधुखेरहो,

यार्नाए थैधुखेरहो,

यायुँल तीधुखेरहो।

डाल्योदा यायुँ फर्कैधुखेरहो।

सोजोकावर ब डाराजैधुखेहो।’

२८ है जैद आव ब सैच्यो — आछिम-काव जेथैव परमेस्वरनिकाव हुव बाँचैन्या पाँर जेल्योड मारहिद छुत जातलाव मिँराए ल्योदा बारिङ्ग्या। नोराए ते भन थैन्या लेर।” २६ [पावलए आव पाँ है ओरादोवत यहूदीर या या खर्लेसिद पुलुस्द बाकेर।]

३० पावल रोम सहरल किमए किराया फोःद नेरिम भरी नल ज़ लिके। उक्किमक हुङ्ग्याव भरिरालाई चावस सुम्द, ३१ परमेस्वरए ओराज्या-लाव पाँर सथैद, घ्योःव युँस प्रभु येसु ख्रीसए उजूनी ब पलास्द ओराएङ्ग्याव। नो येनत सुए ज़ यामावैङ्ग्याव।